

ओं नमः परमात्मने, श्री महागणपतये नमः,

श्री गुरुभ्यो नमः

हरिः ओं

कृष्ण यजुर्वेदीय तैत्तिरीय संहिता

पञ्चमं काण्डं

Note: Please refer to the book, TS Kandam 1 for notes and conventions used in this Compilation.

Table of Contents

5 कृष्ण यजुर्वेदीय तैत्तिरीय संहितायां पञ्चमं काण्डं	3
5.1 पञ्चमकाण्डे प्रथमः प्रश्नः - उख्याग्निकथनं.....	3
5.2 पञ्चमकाण्डे द्वितीयः प्रश्नः - चित्युपक्रमाभिधानं.....	30
5.3 पञ्चमकाण्डे तृतीयः प्रश्नः - चितीनां निरूपणं.....	60
5.4 पञ्चमकाण्डे चतुर्थः प्रश्नः - इष्टकात्रयाभिधानं.....	84
5.5 पञ्चमकाण्डे पञ्जमः प्रश्नः - वायव्यपश्चाद्यानं निरूपणं.....	111
5.6 पञ्चमकाण्डे षष्ठः प्रश्नः - उपानुवाक्याभिधानं.....	138
5.7 पञ्चमकाण्डे सप्तमः प्रश्नः- उपानुवाक्यावशिष्टकर्मनिरूपणं.....	164

ओं नमः परमात्मने, श्री महागणपतये नमः,
श्री गुरुभ्यो नमः , हरिः ओं

5 कृष्ण यजुर्वेदीय तैत्तिरीय संहितायां पञ्चमं काण्डं

5.1 पञ्चमकाण्डे प्रथमः प्रश्नः – उख्याग्निकथनं

5.1.1.1

सा॒वि॒त्राणि॑ जु॒होति॑ प्र॒सू॒त्यै चतुर्गृ॑ही॒तेन॑ जु॒होति॑ चतु॒ष्पादः॑ प॒शवः॑
प॒शूने॒वाऽव॑ रु॒न्धे च॑त॒स्रो दि॒शो दि॒क्ष्वेव॑ प्र॒ति ति॑ष्ठति॒ छन्दा॑ऽसि
दे॒वेभ्यो॑ ऽपा॒ऽक्रामन्॑ न वो॒ भागा॑नि ह॒व्यं व॑क्ष्याम॒ इति॑ तेभ्य
ए॒तच्च॑तु॒र्गृही॑तम॒-धा॒रयन्॑ पु॒रोऽनु॑ वा॒क्यायै॑ या॒ज्यायै॑ दे॒वता॑यै
व॒षट्का॑राय॒ यच्च॑तुर्गृही॒तं जु॒होति॑ छन्दा॑ऽस्येव॒ तत् प्री॑णाति॒ तान्य॑स्य
प्री॒तानि॑ दे॒वेभ्यो॑ ह॒व्यं व॑हन्ति॒ यं का॒मये॑त -[] 1

5.1.1.2

पा॒पी॒या॒न्थ् स्या॑दि॒त्येकै॑कं॒ तस्य॑ जु॒हुया॑-दा॒हुती॑भिरे॒वैन॑मप॒ गृह्णा॑ति
पा॒पी॒या॒न् भव॑ति॒ यं का॒मये॑त॒ वसी॑या॒न्थ् स्या॑दि॒ति सर्वा॑णि

तस्या॑ऽनु॒द्रु॒त्य जु॒हुया॑दाहु॒त्यैवैन॑म॒भि क्र॑मयति वसी॑यान् भवत्यथो॑
य॒ज्ञस्यै॑वैषा-ऽभिक्रान्तिरेति॑ वा ए॒ष य॒ज्ञमु॒खा-दृ॒द्ध्या यो॑ऽग्नेर्दे॒वता॑या
ए॒त्यष्टा॑वे॒तानि॑ सा॒वित्रा॑णि भवन्त्यष्टाक्षरा॑ गाय॒त्री गाय॑त्रौ - [] 2

5.1.1.3

ऽग्नि॑स्तेनै॒व य॒ज्ञमु॒खादृ॒द्ध्या अ॒ग्नेर्दे॒वता॑यै नै॒त्यष्टौ॑ सा॒वित्रा॑णि
भव॑न्त्याहु॒तिर्न॑वमी॒ त्रिवृ॑तमे॒व य॒ज्ञमु॒खे वि॒यात॑यति यदि॒ काम॑येत
छन्दा॑ँसि य॒ज्ञय॑श॒सेना॑ ऽर्प॒येय॑मित्यृ॒चम॑न्त॒मां कुर्या॑च्छन्दा॑ँस्ये॒व
य॒ज्ञय॑श॒सेना॑ऽर्पयति॒ यदि॒ काम॑येत यज॒मानं॑ य॒ज्ञय॑श॒सेना॑-ऽर्प॒येय॑मिति॒
यजु॑रन्त॒मं कुर्या॑द्-यज॒मान॑मे॒व य॒ज्ञय॑श॒सेना॑-ऽर्प॒यत्यृ॒चा स्तोम॑ँ
सम॑र्द्धयेत्या - [] 3

5.1.1.4

-ह॒ समृ॑द्ध्यै चतु॒र्भिर॑भि॒मा द॑त्ते च॒त्वारि॑ छन्दा॑ँसि छन्दा॑ँभिरे॒व
दे॒वस्य॑ त्वा स॒वितुः॑ प्र॒सव॑ इत्याह॒ प्रसू॑त्या अ॒ग्निर्दे॒वेभ्यो॑ नि॒लाय॑त
स वे॒णुं प्रा॑ऽवि॒शथ् स ए॒तामू॑तिम॒नु स॑म॒चर॑द्-यद्-वे॒णोः सु॑षिरँ
सु॒षिरा॑-ऽभि॒र्भव॑ति स॒योनि॑त्वाय॒ स य॒त्रय॑त्रा॒ऽवस॑त् तत् कृ॒ष्णम॑भवत्

कल्माषी॑ भवति॑ रूपस॑मृद्ध्य॑ उभयतः॑ क्षूण॑र्भवती॑तश्चाऽ-()
 -मु॒तश्चाऽर्क॑स्या-वरु॑द्ध्यै व्याम॑मात्री भवत्ये॑ताव॒द्वै पु॒रुषे॑ वी॒र्यं॑
 वी॒र्यस॑मि॒ता ऽप॑रि॒मिता॑ भवत्य-प॑रि॒मितस्याऽ॑ वरु॑द्ध्यै यो वन॑स्पती॒नां
 फल॑ग्र॒हिः स ए॑षां वी॒र्या॑वान् फल॑ग्र॒हिर्वे॑णु-वै॒णवी॑ भवति॑ वी॒र्यस्या॑
 वरु॑द्ध्यै । 4

(काम॑र्य॒त - गा॒यत्रो॑ - ऽर्द्ध॑येति॑ - च - स॒प्तवि॑ंशतिश्च) (A1)

5.1.2.1

व्यू॒द्धं वा॑ ए॒तद्-य॒ज्ञस्य॑ यद॒यजु॑ष्के॒ण क्रि॒यत॑ इ॒माम॑गृ॒भ्णन्
 र॒शना॑-मृ॒तस्ये॑त्य॒श्वाभि॑धानी॒मा द॑त्ते यजु॑ष्कृत्यै य॒ज्ञस्य॑ स॒मृद्ध्यै॑ प्र॒तूर्तं॑
 वा॒जिन्ना॑ द्र॒वेत्य॑श्च॒मभि॑ द॒धाति॑ रू॒पमे॒वा॒स्यैत॑न् म॒हिमा॑नं वा॒च॒ष्टे
 यु॒ञ्जाथा॑ रा॒सभं॑ यु॒वमि॑ति॒ गर्द॑भम॒सेत्ये॒व गर्द॑भं प्र॒ति ष्ठा॑पयति
 तस्मा॑द॒श्वाद्-ग॑र्दभोऽ॒सत्त॑रो यो॒गेयो॒गे तव॑स्तर॒मित्या॑ह - [] 5

5.1.2.2

यो॒गेयो॒ग ए॒वैनं॑ यु॒ङ्क्ते॑ वा॒जेवा॑जे ह॒वाम॑ह इ॒त्याहा॑न्नं वा॒जो-ऽन्न॑मे॒वाव॑
 रु॒न्धे स॒खाय॑ इ॒न्द्रमू॑तय॒ इत्या॑हेन्द्रि॒यमे॒वाव॑ रु॒न्धे ऽग्नि॑र्दे॒वेभ्यो॑ नि॒लाय॑त

तं प्र॒जाप॑तिर॒न्ववि॑न्दत् प्रा॒जाप॑त्योऽश्वोऽश्वेन॑ सं भ॒रत्य॑नु॒वित्त्यै॑
पाप॑वस्यसं वा ए॒तत् क्रि॑यते यच्छ्रे॑यसा च पापी॑यसा च स॒मानं॑ कर्म
कुर्व॑न्ति पापी॑यान्- [] 6

5.1.2.3

ह्य॒श्वाद्-ग॑र्दभोऽश्वं पूर्वं॑ नय॑न्ति पाप॑वस्य-सस्य॑ व्यावृ॑त्त्यै
तस्मा॑च्छ्रे॒याꣳसं॑ पापी॑यान् प॒श्चाद॑न्वेति बहु॑र्वे भवतो॑ भ्रातृ॑व्यो
भव॑तीव खलु॒ वा ए॒ष योऽग्निं॑ चिनु॑ते वज्र॑यश्चः प्र॒तूर्व॑न्नेह्य॒व-क्रा॑मन्न-
श॑स्तीरि॒त्याह॑ वज्रे॑णैव पाप्मानं॑ भ्रातृ॑व्यम॒व क्रा॑मति रु॒द्रस्य॑
गा॒णप॑त्यादि॒त्याह॑ रौ॒द्रा वै प॒शवो॑ रु॒द्रादे॒व- [] 7

5.1.2.4

प॒शून् नि॒र्या॑च्याऽऽत्म॑ने कर्म॑ कुरु॑ते पू॒ष्णा स॒युजा॑ स॒हेत्या॑ह पू॒षा वा
अ॒ध्वनाꣳ स॒न्नेता॑ सम॑ष्ट्यै पु॒रीषा॑यतनो वा ए॒ष यद॑ग्निरङ्गि॑रसो वा
ए॒तम॑ग्रे दे॒वता॑नाꣳ सम॑भरन् पृथि॑व्याः स॒धस्था॑दग्निं पु॒रीष्य॑-
मङ्गि॑रस्व-दच्छे॒हीत्या॑ह सा॒यत॑नमे॒वैनं॑ दे॒वता॑भिः सं भ॒रत्य॑ग्निं
पु॒रीष्य॑-मङ्गि॑रस्व-दच्छे॒म इत्या॑ह येन॑- [] 8

5.1.2.5

सङ्गच्छते वाजमेवास्य वृद्धे प्रजापतये प्रतिप्रोच्याग्निः सम्भृत्य
इत्याहुरियं वै प्रजापतिस्तस्या एतच्छ्रोत्रं यद्वल्मीकोऽग्निं पुरीष्य-
मङ्गिरस्वद्-भरिष्याम इति वल्मीकवपामुप तिष्ठते साक्षादेव
प्रजापतये प्रतिप्रोच्याऽग्निं सं भरत्यग्निं पुरीष्य-मङ्गिरस्वद्-भराम
इत्याह येन संगच्छते वाजमेवास्य वृद्धे ऽन्वग्निरुषसामग्र- [] 9

5.1.2.6

मख्यदित्याहा-नुख्यात्या आगत्य वाज्यध्वन आक्रम्य वाजिन्
पृथिवीमित्याहेच्छत्येवैनं पूर्वया विन्दत्युत्तरया द्वाभ्यामा क्रमयति
प्रतिष्ठित्या अनुरूपाभ्यां तस्मादनुरूपाः पशवः प्रजायन्ते द्यौस्ते पृष्ठं
पृथिवी सधस्थमित्याहैभ्यो वा एतं लोकेभ्यः प्रजापतिः समैरयद्
रूपमेवास्यै-तन्महिमानं व्याचष्टे वज्री वा () एष यदश्वो
दद्-भिरन्यतोदद्भ्यो भूयां लोमभिरुभयादद्भ्यो यं द्विष्यात्
तमधस्पदं ध्यायेद्-वज्रेणैवैनं स्तृणुते । 10 (आह - पापीयान् -
रुद्रादेव - येना - ऽग्रं - वज्री वै - सप्त दश च) (A2)

5.1.3.1

उत्क्रामो-द॒क्रमी॒दिति॒ द्वाभ्यामु॒त्क्रम॑यति॒ प्रति॑ष्ठित्या॒ अनु॑रूपाभ्यां
तस्मा॑दनु॒रूपाः प॒शवः॑ प्र॒जाय॑न्ते ऽप॒ उप॑ सृजति॒ यत्र॑ वा आप॒ उप॑
गच्छ॑न्ति तदोष॑धयः॒ प्रति॑ तिष्ठन्त्योष॑धीः॒ प्रतिति॑ष्ठन्तीः प॒शवोऽनु॑
प्रति॑ तिष्ठन्ति प॒शून् य॒ज्ञो य॒ज्ञं य॑जमानो॒ यज॑मानं प्र॒जास्तस्मा॑दप॒ उप॑
सृज॑ति प्रति॑ष्ठित्यै॒ यदध्व॑र्यु-र॒न॒ग॒नावा॑हुतिं जुहु॒याद॒न्धो॑ ऽध्व॑र्युः-[] 11

5.1.3.2

स्याद्-रक्षा॑ँसि॒ य॒ज्ञं ह॑न्युर्.हि॒रण्य॑मुपास्य जुहोत्यग्नि॒वत्ये॒व
जुहो॑ति नान्धो॑-ऽध्व॑र्युर्भवति॒ न य॒ज्ञं रक्षा॑ँसि घ्नन्ति॒ जिघ॑र्म्यग्निं
मन॑सा घृ॒तेने॒त्याह॑ मन॑सा हि पु॒रुषो॑ य॒ज्ञम॑भिगच्छति॒ प्रति॑क्ष्यन्तं
भुव॑नानि॒ विश्वे॑त्याह॒ सर्व॑ँ ह्येष॒ प्रत्य॑ङ् क्षेति॒ पृथुं॑ ति॒रश्वा व॑यसा
बृ॒हन्त॑मित्याहाऽल्पो॒ ह्येष॑ जा॒तो म॒हान् -[] 12

5.1.3.3

भव॑ति व्यचि॑ष्ठमन्नं॒ रभ॑सं वि॒दान॑मित्याहा ऽन्न॒मेवाऽस्मै॑ स्वदयति॒
सर्व॑मस्मै स्वद॑ते य॒ एवं वे॑दा ऽऽत्वा जिघ॑र्मि वच॑सा घृ॒तेने॒त्याह॑
तस्मा॑द्-यत् पु॒रुषो॑ मन॑सा-ऽभि॒गच्छ॑ति तद्-वा॒चा व॑दत्य॒ रक्ष॑सेत्याह॒

रक्ष॑साम॑प॒हत्यै॑ मर्य॑श्रीः स्पृ॒हय॑द्-व॒र्णो॑ अ॒ग्निरि॒त्याहा॑-प॒चिति॑मे॒वा-
ऽस्मिन् दधा॑त्य-प॒चिति॑मान् भव॒ति य ए॒वं -[] 13

5.1.3.4

वे॒द मन॑सा त्वै॑ तामा॑प्तुम॒र्हति॑ याम॑ध्व॒र्युर॑-न॒ग्नावा॑हु॒तिं जु॑होति
मन॑स्वती॒भ्यां जु॑हो॒त्याहु॑त्यो॒राप्त्यै॑ द्वा॒भ्यां प्र॑ति॒ष्ठित्यै॑ य॒ज्ञमु॒खे य॒ज्ञमु॒खे
वै क्रि॒यमा॑णे य॒ज्ञञ् रक्षा॑ञ्सि जिघा॑ञ् सन्त्ये॒तर्हि॒ खलु॒ वा ए॒तद्-
य॒ज्ञमु॒खं य॑र्ह॒न्दाहु॑तिर॒नुते॑ परि॒ लिख॑ति रक्ष॑साम॑प॒हत्यै॑ तिसृ॒भिः
परि॑ लिख॑ति त्रि॒वृद्वा अ॒ग्निर्या॑वाने॒वा-ऽग्नि॑स्तस्मा॒द्-रक्षा॑ञ्स्यप
हन्ति॑- [] 14

5.1.3.5

गाय॑त्रिया परि॒ लिख॑ति ते॒जो वै गाय॑त्री तेज॑सै॒वैनं॑ परि॒गृह्णा॑ति त्रि॒ष्टुभा॑
परि॑ लिख॑तीन्द्रि॒यं वै त्रि॒ष्टुगिन्द्रि॑येणै॒वैनं॑ परि॒ गृह्णा॑त्यनु॒ष्टुभा॑ परि॒
लिख॑त्यनु॒ष्टुप् सर्वा॑णि छन्दा॑ञ्सि परि॒भूः पर्या॑प्त्यै मध्य॑तोऽनु॒ष्टुभा॑
वाग्वा अनु॒ष्टुप् तस्मा॑न् मध्य॑तो वा॒चा व॑दामो गाय॑त्रिया प्र॒थम॑या परि॒
लिख॑त्यथा-ऽनु॒ष्टुभाऽथ त्रि॒ष्टुभा॑ ते॒जो वै गाय॑त्री () य॒ज्ञो

ऽनुष्टु॑गिन्द्रि॒यं त्रि॒ष्टुप् तेज॑सा चै॒वेन्द्रि॑येण चो॒भय॑तो य॒ज्ञं परि॑ गृह्णाति ।

15 (अ॒न्धो॑ऽ॒ध्वर्यु॑ - म॒हान् - भ॒वति॑ य ए॒व - ह॑न्ति -
त्रि॒ष्टुभा॑ ते॒जो वै गा॑यत्री - त्रयो॑दश च) (A3)

5.1.4.1

दे॒वस्य॑ त्वा स॒वितुः॑ प्र॒सव॑ इति खनति प्र॒सूत्या॑ अथो धू॒ममे॒वैतेन॑
जनयति॑ ज्योति॒ष्मन्तं॑ त्वा॒ग्ने सु॒प्रती॑क॒मित्या॑ह ज्योति॒रेवैतेन॑ जनयति॑
सो॒ऽग्नि॒र्जातः॑ प्र॒जाः शु॒चाऽऽर्प॑यत् तं दे॒वा अ॒र्धर्चे॑ना-शमयच्छिवं
प्र॒जाभ्यो॑ऽहि॒ स॒न्तमि॑त्याह प्र॒जाभ्य॑ ए॒वैन॑ शमयति॑ द्वाभ्यां॑ खनति॑
प्रति॑ष्ठित्या अ॒पां पृ॒ष्ठम॒सीति॑ पुष्कर॒पर्णमा॑ - [] 16

5.1.4.2

हर॑त्य॒पां वा॑ ए॒तत् पृ॒ष्ठं य॑त् पुष्कर॒पर्णं॑ रू॒पेणै॒वैन॑दा हरति॑
पुष्कर॒पर्णेन॑ सं भ॒रति॑ योनि॒र्वा अ॒ग्नेः पुष्कर॒पर्णं॑ स॒योनि॑मे॒वाग्नि॑
संभ॑रति कृ॒ष्णाजि॑नेन संभ॒रति॑ य॒ज्ञो वै कृ॒ष्णाजि॑नं य॒ज्ञेनै॒व य॒ज्ञं
संभ॑रति॑ यद् ग्रा॒म्याणां॑ प॒शूनां॑ च॒र्मणा॑ संभ॒रेद् ग्रा॒म्यान्
प॒शूञ्छु॒चाऽर्प॑येत् कृ॒ष्णाजि॑नेन संभ॒रत्यार॑ण्याने॒व प॒शून्- [] 17

5.1.4.3

शु॒चाऽर्प॑यति॒ तस्मा॑त् स॒माव॑त् प॒शूनां॑ प्र॒जाय॑मानाना-मार॒ण्याः प॒शवः॑
 कनी॑याऽसः शु॒चा ह्य॑ता लो॒मतः॑ संभ॒रत्य॑तो ह्य॒स्य मे॒ध्यं कृ॑ष्णाजि॒नं
 च पु॑ष्कर॒पर्णं च स॑ स्तृ॒णाती॑यं वै कृ॑ष्णाजि॒नम॒सौ पु॑ष्कर॒पर्ण-
 मा॒भ्या-मे॒वैन॑-मु॒भय॑तः परिगृ॒ह्णात्य॑-ग्नि॒र्देवे॑भ्यो नि॒लाय॑त तमथ॒र्वा-
 ऽन्व॑पश्य॒दथ॑र्वा त्वा प्र॒थमो॑ निर॒मन्थ॑द॒ग्न इ॒त्या- [] 18

5.1.4.4

-ह॒ य ए॒वैन॑मन्वपश्यत् तेनै॒वैन॑ संभ॒रति॑ त्वा॒मग्ने॑ पु॑ष्करा॒दधी॑त्याह
 पु॑ष्कर॒पर्णे ह्ये॒नमु॑पश्रित-मवि॒न्दत् तमु॑ त्वा दध्य॒ङ्घ्रि॑रित्याह दध्य॒ङ्वा
 आ॒थर्व॑ण-स्तेज॒स्व्यासी॑त् तेज ए॒वास्मि॑न् दधाति॒ तमु॑ त्वा पा॒थ्यो
 वृ॒षेत्या॑ह पूर्॒वमे॒वोदि॑त-मु॒त्तरे॑णा॒भि गृ॑णाति - [] 19

5.1.4.5

चत॑सृ॒भिः संभ॑रति च॒त्वारि॑ छन्दा॒सि छ॑न्दोभिरेव गाय॒त्रीभिर्ब्रा॑ह्मणस्य
 गाय॑त्रो हि ब्रा॒ह्मण-स्त्रि॒ष्टुग्भी॑ राज॒न्यस्य॑ त्रै॒ष्टुभो॑ हि राज॒न्यो यं
 काम॑येत वसी॒यान्त्-स्या॑दित्यु॒भयी॑भिस्तस्य संभ॒रेत् तेज॑श्चै॒वाऽस्मा॑
 इन्द्रि॑यं च समी॒ची द॑धात्यष्टा॒भिः संभ॑रत्यष्टाक्षरा गाय॒त्री गाय॑त्रो

ऽग्नि॒र्यावा॑ने॒वाऽग्नि॑स्त॒ऽ सं॑भरति॒ सीद॑ हो॒तरि॑त्या- () -ह दे॒वता॑
 ए॒वास्मै॑ स॒ऽ सा॑दयति॒ नि हो॑तेति॒ मनु॑ष्यान्थ् स॒ऽ सीद॑स्वेति॒
 वया॑ऽसि॒ जनि॑ष्वा हि जे॒न्यो अ॒ग्रे अ॒ह्नामि॑त्याह दे॒व मनु॑ष्याने॒वाऽस्मै॑
 स॒ऽस॒न्नान् प्र॑जनयति । 20 (ऐ - व प॒शू - नि॑ति - गृणाति -
 हो॒तरि॑ति - स॒प्तवि॑ऽशतिश्च) (A4)

5.1.5.1

क्रू॒रमि॒व वा अ॑स्या ए॒तत् करो॑ति॒ यत् खन॑त्यप॒ उप॑ सृज॒त्यापो॒ वै
 शान्ताः॑ शान्ताभि॒रेवाऽस्यै॑ शुच॒ऽ शम॑यति॒ सं ते वा॒युर्मा॑तरि॒श्वा
 दधा॑त्वित्याह प्रा॒णो वै वा॒युः प्रा॒णेनै॒वास्यै॑ प्राण॒ऽ सं दधा॑ति॒ सं ते
 वा॒युरि॑त्याह तस्माद्-वा॒युप्र॑च्युता दि॒वो वृ॑ष्टिरी॒र्ते तस्मै॑ च दे॒वि
 वष॑डस्तु- [] 21

5.1.5.2

तुभ्य॑मित्याह षड्वा ऋ॒तव॑ ऋ॒तुष्वे॒व वृ॑ष्टिं दधाति॒ तस्मा॑त् सर्वा॒नृ॒तून्
 वर्॑षति॒ यद्-वष॑ट्कुर्याद्-या॒तया॑माऽस्य वष॑ट्कारः स्याद्यन्न
 वष॑ट्कुर्याद् रक्षा॑ऽसि य॒ज्ञऽ ह॒न्युर्वडि॑त्याह प॒रोक्ष॑मे॒व वष॑ट् करोति॒

नास्य॑ या॒तया॑मा व॒षट्का॑रो भ॒वति॑ न य॒ज्ञः र॒क्षाः॑सि घ्नन्ति॑ सु॒जातो॑
ज्योति॑षा स॒हेत्य॑नु॒ष्टुभो॑प न॒ह्यत्य॑नु॒ष्टु- [] 22

5.1.5.3

-प॒सर्वा॑णि छ॒न्दाः॑सि छ॒न्दाः॑सि खलु॑ वा अ॒ग्नेः प्रि॒या त॒नूः
प्रि॒ययै॑वैनं॑ त॒नुवा॑ परि॑ दधाति॒ वेदु॑को वा॒सो भ॒वति॑य ए॒वं वे॑द वा॒रुणो॑
वा अ॒ग्निरु॑प॒नद्ध॑ उ॒दु तिष्ठ॑ स्व॒ध्वरो॒र्ध्व ऊ॒ षुण॑ ऊ॒तय॑ इति॒
सा॒वित्री॑भ्यामु॒त् तिष्ठ॑ति स॒वितृ॑प्र॒सूत॑ ए॒वास्यो॒र्ध्वा व॑रुणमे॒निमु॒त्
सृ॒जति॑ द्वाभ्यां॒ प्रति॑ष्ठित्यै॒ स जा॒तो गर्भो॑ अ॒सि- [] 23

5.1.5.4

रो॒दस्यो॑रि॒त्याहे॑मे वै रो॒दसी॑ तयो॒रेष गर्भो॑ यद॒ग्नि-स्त॑स्मा-दे॒वमा॑हा॒ग्ने
चा॒रुर्वि॑भृ॒त ओष॑धीष्वि॒त्याह॑ यदा॒ ह्येतं॑ वि॒भर॑न्त्यथ चा॒रुत॑रो भ॒वति॑ प्र
मा॒तृभ्यो॑ अ॒धि क॑नि॒क्रद॑द्-गा इ॒त्याहौष॑धयो॒ वा अ॒स्य मा॒तर॑स्ताभ्य
ए॒वैनं॑ प्र॒च्याव॑यति स्थि॒रो भ॒व वी॒ड्वङ्ग॑ इति॒ गर्द॑भ
आ सा॒दय॑ति- [] 24

5.1.5.5

सं न॒ह्यत्ये॒वैन॑मे॒तया॑ स्थे॒म्ने ग॑र्द॒भेन॑ सं॒भर॑ति तस्मा॑द् ग॒र्दभः॑ प॒शूनां॑
 भार॑भा॒रित॑मो ग॒र्दभेन॑ सं भ॒रति॑ तस्मा॑द् ग॒र्दभो॑-ऽप्य॑ना॒लेशो॑-ऽत्य॑न्यान्
 प॒शून् मे॒घत्य॑न्न॒ ह्ये॒नेना॑ऽर्क॒ सं॒भर॑न्ति ग॒र्दभेन॑ सं॒भर॑ति तस्मा॑द्
 ग॒र्दभो॑ द्वि॒रेताः॑ सन् क॒निष्ठं॑ प॒शूनां॑ प्रजा॑यतेऽग्नि॒र्ह्यस्य॑ योनिं॑
 निर्द॑हति प्रजा॒सु वा ए॒ष ए॒तर्ह्यारू॑ढः- [] 25

5.1.5.6

स ई॒श्वरः॑ प्रजाः॒ शुचा॑ प्रद॒हः शि॒वो भ॑व प्रजा॒भ्य इ॒त्याह॑ प्रजा॒भ्य
 ए॒वैन॑ श॒मय॑ति मा॒नुषी॑भ्यस्त्वम॒ङ्गिर॑ इ॒त्याह॑ मा॒नव्यो॑ हि प्रजा॒ मा
 द्या॒वापृ॑थि॒वी अ॒भि शू॑शु॒चो मा॑ऽन्तरि॒क्षं मा॑ वनस्प॒तीनि॒त्याहै॑भ्य ए॒वैनं॑
 लो॒केभ्यः॑ श॒मय॑ति प्रै॒तु वा॒जी क॒निक्र॑ददित्याह वा॒जी ह्ये॒ष ना॒नद॑द्-
 रा॒सभः॑ प॒त्वेत्या॑- [] 26

5.1.5.7

-ह रा॒सभ॑ इति ह्ये॒तमृ॑षयोऽव॒दन् भ॑रन्न॒ग्निं पु॑री॒ष्यमि॒त्याहा॑ऽग्निं
 ह्ये॒ष भ॑रति मा पा॒द्यायु॑षः पु॒रेत्या॑हाऽऽ*यु॒रेवा॑ऽस्मिन् दधा॒ति
 तस्मा॑द् ग॒र्दभः॑ सर्व॒मायु॑रेति तस्मा॑द् ग॒र्दभे॑ पु॒राऽऽयु॑षः प्र॒मीते॑ बि॒भ्यति॑

वृषा॒ऽग्निं॑ वृ॒षणं॑ भ॒रन्नि॒त्याह॑ वृषा॒ ह्येष॑ वृषा॒ऽग्निर॒पां गर्भ॑- [] 27

5.1.5.8

समु॒द्रि॒य-मि॒त्याहा॒ऽपा॒ ह्येष॑ गर्भो॒ यद॒ग्नि॒रग्न॑ आ या॒हि वी॒तय॑ इति॒ वा
इ॒मौ लो॒कौ व्यै॒ताम॒ग्न आ या॒हि वी॒तय॑ इति॒ यदा॒हा ऽन॒योर्लो॒कयो-
र्वी॒त्यै प्र॒च्युतो॒ वा ए॒ष आ॒यत॑ना॒दगतः॑ प्र॒तिष्ठा॑ स ए॒तर्ह्य॑ध्व॒र्यु च
यज॑मानं च ध्या॒यत्यृ॒त स॒त्यमि॒त्याहे॒यं वा ऋ॒तम॒सौ- [] 28

5.1.5.9

स॒त्यम॒नयो॑रे॒वैनं॑ प्र॒ति ष्ठा॒पय॑ति ना॒ऽऽ*ति॒माच्छ॑त्यध्व॒र्युर्न यज॑मानो
वरु॑णो वा ए॒ष यज॑मानम॒भ्यैति॑ यद॒ग्निरु॒पन॑द्ध ओष॒धयः॑ प्र॒ति
गृ॒ह्णी॒ताग्नि॑मे॒त-मि॒त्याह॑ शान्त्यै॒ व्यस्य॑न् वि॒श्वा अ॒मती॑र॒राती॑-रि॒त्याह॑
रक्ष॑साम॒पहत्यै॑ नि॒षीद॑न् नो॒ अप॑ दु॒र्मति॑ ह॒नदि॒त्याह॑ प्र॒तिष्ठि॒त्या
ओष॑धयः प्र॒तिमो॑दध्व- [] 29

5.1.5.10

मे॒नमि॒त्याहौ॑ष॒धयो॒ वा अ॒ग्नेर्भा॑ग॒धेयं॑ ताभि॒रेवैन॑ सम॒र्धय॑ति
पु॒ष्पाव॑तीः सु॒पिप्प॒ला इ॒त्याह॑ तस्मा॒दोष॑धयः फ॒लं गृ॒ह्णन्त्य॑ यं वो॒ गर्भ॑

ऋ॒त्वि॒यः प्र॒त्न॑ꣳ स॒ध॒स्थ॒मा-ऽस॒द॒दि॒त्याह॒ याभ्य॑ ए॒वैनं॑ प्र॒च्याव॑यति
तास्वे॒वैनं॑ प्र॒तिष्ठा॑पयति द्वाभ्या॑मु॒पाव॑हरति प्र॒तिष्ठि॑त्यै । 30

(अ॒स्त्व - नु॒ष्टु - ब॒सि - सा॒दय॑त्या - रू॒ढः - प॒त्वेति॑ - गर्भ॑ -
म॒सौ - मो॑द॒ध्वं - द्वि॑च॒त्वारि॑ꣳश॒च्च) (A5)

5.1.6.1

वा॒रु॒णो वा अ॒ग्निरु॑प॒नद्धो॑ वि पाज॑सेति वि॒स्रꣳस॑यति स॒वितृ॑प्र॒सूत॑
ए॒वा॒स्य वि॒षूचीं॑ व॒रु॒णमे॑निं वि॒सृ॒ज॒त्यप॑ उप॒ सृ॒ज॒त्यापो॑ वै शा॒न्ताः
शा॒न्ताभि॑रे॒वा॒स्य शु॒चꣳ श॑मयति ति॒सृ॒भि॒रुप॑ सृ॒जति॑ त्रि॒वृ॒द्धा
अ॒ग्निर्या॑वा॒नेवा-ग्नि॑स्तस्य शु॒चꣳ श॑मयति मि॒त्रः सꣳसृ॒ज्य
पृ॒थि॒वीमि॑त्याह मि॒त्रो वै शि॒वो दे॒वानां॑ ते॒नैवै- [] 31

5.1.6.2

-नꣳ सꣳ सृ॒जति॑ शा॒न्त्यै यद्ग्रा॒म्याणां॑ पा॒त्राणां॑ क॒पालैः
सꣳसृ॒जेद्-ग्रा॒म्याणि॑ पा॒त्राणि॑ शु॒चाऽर्प॑ये॒दर्म॑क॒पालैः॑ सꣳ सृ॒जत्ये॒तानि॑
वा अनु॑पजीवनी॒यानि॑ ता॒न्येव॑ शु॒चाऽर्प॑यति शर्क॑रा॒भिः सꣳ सृ॒जति॑
धृ॒त्या अथो॑ श॒न्त्वाया॑ जलो॒मैः सꣳ सृ॒जत्ये॒षा वा अ॒ग्नेः प्रि॒या

त॒नूर्य॑द॒जा प्रि॒ययै॑वैनं॑ त॒नुवा॑ स॒ꣳ सृ॑ज॒त्यथो॑ तेज॒सा कृ॑ष्णाजि॒नस्य॑
लोम॑भिः स॒ꣳ -[] 32

5.1.6.3

सृ॑जति य॒ज्ञो वै कृ॑ष्णाजि॒नं य॒ज्ञेनै॑व य॒ज्ञꣳ स॒ꣳ सृ॑जति रु॒द्राः
संभृ॑त्य पृथि॒वीमि॒त्याहै॒ता वा ए॒तं दे॒वता॑ अ॒ग्रे स॒मभ॑रन् ताभि॒रेवैन॑ꣳ
संभ॑रति म॒खस्य॑ शिरोऽसी॒त्याह॑ य॒ज्ञो वै म॒खस्त॑स्यैत-च्छि॒रो यदु॑खा
तस्मा॑दे॒वमा॒ह य॒ज्ञस्य॑ प॒दे स्थ॑ इत्या॒ह य॒ज्ञस्य॑ ह्येते - [] 33

5.1.6.4

प॒दे अथो॑ प्र॒तिष्ठि॑त्यै प्रा॒न्याभि॑-र्य॒च्छत्य॑न्व॒न्यै-र्मन्त्र॑यते मिथु॒नत्वाय॑
त्र्यु॒द्धिं करो॑ति त्रय॑ इ॒मे लो॒का ए॒षां लो॒काना॑माप्त्यै छन्दो॑भिः करोति
वी॒र्यं वै छन्दा॑ꣳसि वी॒र्येणै॑वैनां॑ करोति य॒जुषा॑ बिलं करोति व्यावृ॑त्त्या
इय॑तीं करोति प्र॒जाप॑तिना य॒ज्ञमु॒खेन॑ संमि॒तां द्वि॒स्तनां॑ करोति
द्यावा॑पृथि॒व्योर्दो॑हाय चतुः स्त॒नां करो॑ति प॒शूनां॑ दोहाया॒ष्टास्त॒नां
करो॑ति छन्द॑सां दोहाय नवा॑श्चि-मभि॒चरतः॑ () कुर्यात् त्रि॒वृ॒तमे॒व
वज्र॑ꣳ संभृ॑त्य भ्रातृ॒व्याय॑ प्र॒हरति॑ स्तृ॒त्यै कृ॒त्वाय॑ सा म॒हीमु॒खामि॑ति

नि दधाति देवतास्वेवैनां प्रतिष्ठापयति । 34

(तेनैव – लोमभिः स – मेते – अभिचरत – एकविंशतिश्च) (A6)

5.1.7.1

सप्तभिर्धूपयति सप्त वै शीर्षण्याः प्राणाः शिर एतद्-यज्ञस्य
यदुखा शीर्षन्नेव यज्ञस्य प्राणान् दधाति तस्मात् सप्त शीर्षन्
प्राणा अश्वशकेन धूपयति प्राजापत्यो वा अश्वः सयोनित्वाया-
दितिस्त्वेत्याहेयं वा अदितिरदित्यैवादित्यां खनत्यस्या अकूरंकाराय
न हि स्वः स्वः हिनस्ति देवानां त्वा पत्नीरित्याह देवानां- [] 35

5.1.7.2

वा एतां पत्नयोऽग्रेऽकुर्वन् ताभिरेवैनां दधाति धिषणास्त्वेत्याह विद्या
वै धिषणा विद्याभिरेवैनामभीन्धे ग्नास्त्वेत्याह छन्दांसि वै ग्नाः
छन्दोभिरेवैनां श्रपयति वरूत्रयस्त्वेत्याह होत्रा वै वरूत्रयो
होत्राभिरेवैनां पचति जनयस्त्वेत्याह देवानां वै पत्नी- [] 36

5.1.7.3

–र्जन॑यस्ताभि॑रेवैनां॑ पचति॑ षड्भिः॑ पचति॑ षड्वा ऋ॒तव॑ ऋ॒तुभि॑रेवैनां॑
 पचति॑ द्विः पच॑न्त्वित्याह॑ तस्माद् द्विः सँव॑त्सरस्य॑ सस्यं॑ पच्यते
 वारु॑ण्युखाऽभी॑द्धा मै॒त्रियो॑पैति॑ शान्त्यै॑ दे॒वस्त्वा स॒वितो॑द्-वप॑त्वित्याह॑
 सवि॑तृप्रसू॒त ए॒वैनां॑ ब्र॒ह्मणा॑ दे॒वता॑भि॒रुद्-वप॑त्यप॒द्यमा॑ना पृथि॒व्याशा॑
 दि॒श आ पृ॑णे- [] 37

5.1.7.4

–त्याह॑ तस्मा॑दग्निः॒ सर्वा दि॒शोऽनु॑ वि॒भात्यु॑त्तिष्ठ॑ बृ॒हती भ॑वोर्ध्वा तिष्ठ॑
 ध्रु॒वा त्वमि॑त्याह॑ प्रति॑ष्ठित्या॒ असुर्यं॑ पा॒त्रम॑नाच्छृ॒णमा-च्छृ॑णत्ति
 दे॒वत्रा-ऽकर॑जक्षी॒रेणा-ऽऽच्छृ॑णत्ति पर॑मं वा ए॒तत् प॒यो यद॑जक्षी॒रं
 पर॑मेणै॒वैनां॑ प॒यसा॑ऽऽच्छृ॑णत्ति य॒जुषा॑ व्यावृ॑त्यै छन्दो॑भिरा॒ च्छृ॑णत्ति
 छन्दो॑भिर्वा ए॒षा () क्रि॑यते छन्दो॑भिरे॒व छन्दा॑ऽस्या च्छृ॑णत्ति । 38

(आह॑ दे॒वानां॑ – वै प॒त्नीः – पृ॒णै – षा – षट्- च) (A7)

5.1.8.1

एक॑विंश॒त्या मा॑षैः पु॒रुष॑शीर्ष-म॒च्छैत्य॑मे॒ध्या वै मा॑षा अमे॒ध्यं
 पु॒रुष॑शीर्ष-ममे॒ध्यैरे॒वा-स्या॑-मे॒ध्यं नि॒रव॑दाय॒ मेध्यं॑ कृ॒त्वा

ऽऽहर॑त्ये॒कवि॑ञ्शति॒-र्भव॑न्त्ये॒कवि॑ञ्शो॒ वै पु॑रु॒षः पु॑रु॒षस्याऽऽप्त्यै॑
व्यृ॒द्धं वा॑ ए॒तत् प्रा॒णैर॑मे॒ध्यं य॑त् पु॒रुष॑शी॒र्षञ् स॑प्त॒धा वि॑तृ॒ष्णां
व॑ल्मीक॒वपां॑ प्र॒ति नि॑ द॒धाति॑ स॒प्त वै शी॑र्ष॒ण्याः प्रा॒णाः
प्रा॒णैरे॒वैन॑त्-स॒मर्ध॑यति॒ मे॒ध्यत्वा॑य॒ याव॑न्तो - [] 39

5.1.8.2

वै मृ॒त्युब॑न्ध॒वस्तेषां॑ य॒म आ॑धि॒पत्यं॑ प॒रीया॑य॒ यम॑गा॒थाभिः॑ परि॒गाय॑ति
य॒मादे॒वैन॑द्-वृ॒द्धे ति॒सृभिः॑ परि॒गाय॑ति॒ त्रय॑ इ॒मे लो॒का ए॒भ्य
ए॒वैन॑ल्लो॒केभ्यो॑ वृ॒द्धे तस्मा॑द्-गा॒यते॑ न दे॒यं गा॒था हि॑ तद्-वृ॒द्धे
ऽग्नि॑भ्यः प॒शूना॑ ल॒भते॑ का॒मा वा॑ अ॒ग्नयः॑ का॒माने॑वा॒व रु॒न्धे यत्
प॒शून् नाऽऽ*ल॑भे॒ताऽन॑वरु॒द्धा अ॒स्य - [] 40

5.1.8.3

प॒शवः॑ स्यु॒र्यत् प॑र्य॒ग्निकृ॑तानु॒त्-सृ॒जेद्-य॑ज्ञ॒वेश॑सं॒ कुर्या॑द्-य॒त्
सञ्स्था॑पये॒द्-या॑तया॒मानि॑ शी॒र्षाणि॑ स्यु॒र्यत् प॑शूना॒लभ॑ते तेनै॒व
प॒शून॑व रु॒न्धे यत् प॑र्य॒ग्निकृ॑तानु॒त्-सृ॒जति॑ शी॒र्ष्णा-म॑या॒तया॑म॒त्वाय॑
प्रा॒जाप॑त्ये॒न सञ्स्था॑पयति॒ यज्ञो॑ वै प्र॒जाप॑तिर्य॒ज्ञ ए॒व य॑ज्ञं

प्रतिष्ठापयति प्रजापतिः प्रजा असृजत स रिरिचानोऽमन्यत स एता
आप्रीरपश्यत् ताभिर्वै स मुखत- [] 41

5.1.8.4

आत्मानमा ऽप्रीणीत यदेता आप्रियो भवन्ति यज्ञो वै प्रजापति-
र्यज्ञमेवैताभिर्मुखत आ प्रीणात्य-परिमितच्छन्दसो भवन्त्यपरिमितः
प्रजापतिः प्रजापतेराप्त्या ऊनातिरिक्ता मिथुनाः प्रजात्यै लोमशं वै
नामैतच्छन्दः प्रजापतेः पशवो लोमशाः पशूनेवाऽव रुन्धे सर्वाणि वा
एता रूपाणि सर्वाणि रूपाण्यग्नौ चित्यै क्रियन्ते तस्मादेता
अग्नेश्चित्यस्य - [] 42

5.1.8.5

भवन्त्ये कविं शतिं सामिधेनीरन्वाह रुग्वा एकविंशो रुचमेव
गच्छत्यथो प्रतिष्ठामेव प्रतिष्ठा ह्येकविंश-श्चतुर्विंशतिमन्वाह
चतुर्विंशतिरर्धमासाः सँवथ्सरः सँवथ्सरोऽग्निर्वैश्वानरः साक्षादेव
वैश्वानरमव रुन्धे पराचीरन्वाह पराडिव हि सुवर्गो लोकः
समास्त्वाऽग्न ऋतवो वर्धयन्त्वित्याह समाभिरेवाऽग्निं वर्धय-[] 43

5.1.8.6

तृ॒तुभिः॑ सँ॒वथ्स॑रं वि॒श्वा आ॑ भा॒हि प्र॒दिशः॑ पृ॒थिव्या॑ इत्या॒ह
तस्मा॑द॒ग्निः सर्वा॑ दि॒शोऽनु॑ वि॒भाति॑ प्र॒त्यौह॑ताम॒श्विना॑
मृ॒त्युम॑स्मादि॒त्याह॑ मृ॒त्युमे॒वाऽस्मा॑दप॒ नुद॑त्यु॒द्वयं॑ तम॒सस्प॑रीत्या॒ह पा॒प्मा
वै तमः॑ पा॒प्मान॑मे॒वास्मा॑दप॒ हन्त्य॑गन्म॒ ज्योति॑रु॒त्तम॑-मि॒त्याहा॑ऽसौ वा
आ॒दि॒त्यो () ज्योति॑रु॒त्तम॑-मा॒दि॒त्यस्यै॒व सा॒युज्यं॑ गच्छति॒ न
सँ॒वथ्स॑रस्तिष्ठति॒ नास्य॑ श्री॒स्तिष्ठति॑ यस्यै॒ताः क्रि॒यन्ते॒ ज्योति॑ष्मती-
मु॒त्तमा॑मन्वा॒ह ज्योति॑रे॒वास्मा॑ उप॒रिष्ठाद्॑ दधाति॒ सुव॑र्गस्य
लो॒कस्यानु॑ख्यात्यै । 44

(याव॑न्तो - ऽस्य - मुख॑त - श्रि॒त्यस्य॑ - वर्द्ध॑य - त्या॒दित्यो॑ -
ऽष्टा॒विंश॑तिश्च) (A8)

5.1.9.1

षड्भि॑र्दीक्षयति॒ षड्वा॑ ऋ॒तव॑ ऋ॒तुभि॑रे॒वैनं॑ दीक्षयति॒ सप्त॑भिर्दीक्षयति॒
सप्त॑ छन्दा॒सि छन्दा॑भिरे॒वैनं॑ दीक्षयति॒ विश्वे॑ दे॒वस्य॑ ने॒तुरि॑त्य-
नुष्टु॑भो॒त्तमया॑ जुहोति॒ वाग्वा॑ अनुष्टु॒प् तस्मा॑त् प्रा॒णानां॑ वा॒गुत्त॑मै-
क॒स्माद॑क्षरा॒दना॑प्तं प्रथ॒मं पदं॑ तस्मा॒द्-यद्-वा॒चोऽना॑प्तं तन्मनु॒ष्या

उप जीवन्ति पूर्णया जुहोति पूर्ण इव हि प्रजापतिः – [] 45

5.1.9.2

प्रजापतेरापत्यै न्यूनया जुहोति न्यूनाद्धि प्रजापतिः प्रजा असृजत
प्रजानां सृष्ट्यै यदर्चिषि प्रवृज्याद्-भूतमव रुन्धीत यदङ्गारेषु
भविष्यदङ्गारेषु प्रवृणक्ति भविष्य देवाव रुन्धे भविष्यद्धि भूयो भूताद्-
द्वाभ्यां प्रवृणक्ति द्विपाद्-यजमानः प्रतिष्ठित्यै ब्रह्मणा वा एषा यजुषा
संभृता यदुखा सा यद्विद्येताऽऽर्तिमाच्छे- [] 46

5.1.9.3

-यजमानो हन्येताऽस्य यज्ञो मित्रैतामुखां तपेत्याह ब्रह्म वै मित्रो
ब्रह्मन्नेवैनां प्रतिष्ठापयति नाऽऽर्तिमाच्छेति यजमानो नास्य यज्ञो हन्यते
यदि भिद्येत तैरेव कपालैः स सृजेथ् सैव ततः प्रायश्चित्तिर्यो गतश्रीः
स्यान्मथित्वा तस्याव दध्याद्-भूतो वा एष स स्वां- [] 47

5.1.9.4

देवतामुपैति यो भूतिकामः स्याद्य उखायै संभवेथ् स एव तस्य
स्यादतो ह्येष संभवत्येष वै स्वयंभूर्नाम भवत्येव यं कामयेत
भ्रातृव्यमस्मै जनयेयमित्य-न्यतस्तस्या-ऽऽहत्याऽव दध्याथ्

सा॒क्षादे॒वास्मै॑ भ्रा॒तृव्यं॑ ज॒नय॑त्य॒म्बरी॒षाद॒न्न॑ का॒मस्या॑व द॒ध्यादं॑ब॒रीषे॑ वा
अ॒न्नं भ्रि॑यते स॒योन्ये॑वान्न- [] 48

5.1.9.5

-मव॑ रु॒न्धे मु॒ञ्जान॑व द॒धात्यूर्वे॑ मु॒ञ्जा ऊ॒र्जमे॑वास्मा॒ अपि॑
द॒धात्य॒ग्निर्दे॒वेभ्यो॑ नि॒लाय॑त स क्रु॒मुकं॑ प्रा॒ऽवि॒शत् क्रु॒मुक॑मव द॒धाति॑
यदे॒वास्य॑ तत्र न्य॒क्तं तदे॒वाव रु॒न्धे आ॒ज्येन॑ सं यौ॒त्येत॑द्वा अ॒ग्नेः प्रि॒यं
धा॒म यदा॑ज्यं प्रि॒येणै॒वैनं॑ धा॒म्ना स॑म॒र्धय॑त्यथो तेज॒सा - [] 49

5.1.9.6

वै कं॑क॒तीमा॑ द॒धाति॑ भा ए॒वाव रु॒न्धे श॑मी॒मयी॑मा द॒धाति॑ शान्त्यै
सीद॑ त्वं मा॒तुर॒स्या उ॒पस्थ॑ इति॒ तिसृ॑भिर्जा॒तमु॒प तिष्ठ॑ते त्रय॑ इमे
लो॒का ए॒ष्वेव॑ लो॒केष्वा॒विदं॑ गच्छ॒त्यथो॑ प्रा॒णाने॒वाऽऽत्म॑न् ध॒त्ते । 50

(प्र॒जाप॑तिर् - ऋ॒च्छेथ् - स्वा - मे॒वान्नं॑ - तेज॒सा -
चतु॑स्त्रिं॒शच्च॑) (A9)

5.1.10.1

न ह॑ स्म॒ वै पु॒राऽग्नि॑र॒पर॑शुवृ॒क्णं द॑हति तद॒स्मै प्र॒योग॑
 ए॒वर्षि॑र॒स्वद॑यद्-यद॒ग्ने या॒नि का॒नि चेति॑ स॒मिध॒मा
 द॒धात्य॑पर॒शुवृ॒क्ण-मे॒वास्मै॑ स्वदयति सर्व॒मस्मै॑ स्वद॒ते य ए॒वं
 वे॒दौदु॑म्बरी॒मा द॒धात्यू॒र्वा उ॒दुम्ब॑र ऊ॒र्जमे॒वास्मा॑ अपि दधाति
 प्र॒जाप॑तिर॒ग्नि-म॑सृ॒जत॑ त॒ञ् सृष्ट॑ञ् र॒क्षाञ् स्य- [] 51

5.1.10.2

-जिघा॑ञ् स॒न्त्स ए॒तद्-रा॒क्षोघ्न॑मपश्यत् तेन॒ वै स॒रक्षा॑ञ् स्यपा॒ऽहत॑
 यद्-रा॒क्षोघ्नं॑ भवत्य॒ग्नेरे॒व तेन॑ जा॒ताद्-र॒क्षाञ् स्य॑प ह॒न्त्याश्च॑त्थी॒मा
 द॒धात्य॑श्च॒त्थो वै व॒नस्प॑तीनाञ् स॒पत्न॑सा॒हो वि॒जित्यै॑ वैक॒ङ्कती॑मा
 द॒धाति॑ भा ए॒वाव॑ रु॒न्धे श॑मी॒मयी॑मा द॒धाति॑ शान्त्यै॒ सञ् शि॑तं मे
 ब्र॒ह्मोदे॑षां बा॒हू अति॑र॒मित्यु॑त्तमे औदु॒म्बरी - [] 52

5.1.10.3

वाच॑यति ब्र॒ह्मणै॒व क्ष॒त्रञ् सञ् श्य॑ति क्ष॒त्रेण॑ ब्र॒ह्म तस्मा॑द् ब्रा॒ह्मणो
 रा॒ज॒न्य॒वा॒न॒त्य॒न्यं ब्रा॒ह्मणं॑ तस्मा॑द्-रा॒ज॒न्यो ब्रा॒ह्मण॑वा॒न॒त्य॒न्यञ्
 रा॒ज॒न्यं मृ॒त्युर्वा ए॒ष यद॑ग्नि॒रमृ॑तञ् हिर॒ण्यञ् रु॒क्मम॑न्तरं

प्रति॑मुञ्च॒ते ऽमृत॑मे॒व मृत्यो॑रन्त॒र्धत्त॑ एक॒विंश॑तिनिर्बा॒धो
भव॑त्येक॒विंश॑तिर्वै दे॒वलो॒का द्वाद॑श मा॒साः पञ्च॑र्तवस्त्रय॒ इमे
लो॒का अ॒सावा॑दि॒त्य- [] 53

5.1.10.4

एक॒विंश॑ ए॒ताव॑न्तो वै दे॒वलो॒कास्ते॑भ्य ए॒व भ्रातृ॑व्यमन्त॒रेति॑
निर्बा॑धैर्वै दे॒वा अ॒सुरा॑न् निर्बा॒धेऽकु॑र्वत तन्निर्बा॒धानां॑ निर्बा॒धत्वं
निर्बा॑धी भव॒ति भ्रातृ॑व्याने॒व निर्बा॑धे कुरु॒ते सा॒वि॒त्रिया॑ प्रति॒मुञ्च॒ते
प्र॒सू॒त्यै न॒क्तो॒षासे॑त्युत्तरया ऽहो॒रात्रा॑भ्यामे॒वैन-मु॑द्यच्छते दे॒वा
अ॒ग्निं धा॑रयन् द्र॒वि॒णो॒दा इ॒त्याह॑ प्रा॒णा वै दे॒वा द्र॒वि॒णो॒दा
अ॒हो॒रात्रा॑भ्यामे॒वैनमु॑द्यत्य - [] 54

5.1.10.5

प्रा॒णैर्दा॑धारा ऽऽसी॒नः प्रति॑मुञ्च॒ते तस्मा॑दासी॒नाः प्र॒जाः प्र॒जाय॑न्ते
कृ॒ष्णाजि॑नमुत्तरं तेजो वै हि॒रण्यं॑ ब्र॒ह्म कृ॒ष्णाजि॑नं तेज॒सा चै॒वैनं॑
ब्र॒ह्मणा॑ चोभयतः परिगृ॒ह्णाति॑ षडु॒द्याम॑ शि॒क्यं भव॑ति षड्वा ऋ॒तव॑
ऋ॒तुभि॑रे॒वैन-मु॑द्यच्छते यद् द्वाद॑शोद्याम॑ सँव॒त्सरे॑णै॒व मौ॒ञ्जं

भ॒व॒त्यू॒र्ग्वै॒ मु॒ञ्जा॒ ऊ॒र्जै॒वैन॒ꣳ स () म॒र्धय॑ति सु॒पर्णो॑ऽसि
 ग॒रु॒त्मानि॑त्य॒वैक्ष॑ते रू॒पमे॒वा॒स्यै॒तन्म॑हि॒मानं॑ व्या॒चष्टे॑ दि॒वं ग॑च्छ सु॒वः
 प॒तेत्या॑ह सु॒वर्ग॑मे॒वैनं॑ लो॒कं ग॑मयति । 55 (र॒क्षाꣳस्यौ॑ – दु॒र्ब॑रि –
 आ॒दि॒त्य – उ॒द्य॒त्य – सं – च॑तुर्विं॒शति॑श्च) (A10)

5.1.11.1

स॒मि॒द्धो अ॒ञ्जन् कृ॑द॒रं म॒तीनां॑ घृ॒तम॑ग्ने म॒धुम॑त् पि॒न्वमा॑नः ।
 वा॒जी वह॑न् वा॒जिनं॑ जा॒तवे॑दो दे॒वानां॑ व॒क्षि प्रि॒यमा॑ स॒धस्थं॑ ।
 घृ॒तेना॒ञ्जन्त्सं॑ प॒थो दे॒वयाना॑न् प्र॒जान॑न् वा॒ज्यप्ये॑तु दे॒वान् ।
 अनु॑ त्वा स॒प्ते प्र॑दि॒शः स॒चन्ताꣳ स्व॑धा॒मस्मै॑ यज॒माना॑य धे॒हि ।
 ई॒ड्य॒श्चासि॑ व॒न्द्यश्च॑ वा॒जिन्ना॑शुश्चा॒सि मे॒ध्यश्च॑ स॒प्ते ।
 अ॒ग्निष्ट्वा–[] 56

5.1.11.2

दे॒वैर्व॑सु॒भिः स॒जोषाः॑ प्री॒तं व॑हिं व॑हतु जा॒तवे॑दाः ।
 स्ती॒र्णः ब॒र्हिः सु॒ष्ट्री॒मा जुषा॑णो॒रु पृ॒थु प्र॑थ॒मानं॑ पृ॒थिव्यां॑ ।
 दे॒वेभि॑र्यु॒क्तम॑दि॒तिः स॒जोषाः॑ स्यो॒नं कृ॑ण्वाना सु॒विते॑ द॒धातु॑ ।

ए॒ता उ॑ वः सु॒भगा॑ वि॒श्वरू॑पा वि॒पक्षो॑भिः श्रय॑माणा उ॒दातैः॑ ।
 ऋ॒ष्वाः स॒तीः क॒वषः॑ शु॒म्भमा॑ना द्वा॒रो दे॒वीः सु॒प्राय॑णा भव॑न्तु ।
 अ॒न्तरा॑ मि॒त्रावरु॑णा च॒रन्ती॑ मु॒खं य॒ज्ञाना॑मभि सँ॒विदाने॑ ।
 उ॒षासा॑ वाꣳ - [] 57

5.1.11.3

सु॒हि॒रण्ये सु॒शि॒ल्ये ऋ॒तस्य॑ यो॒नावि॑ह सा॒दयामि॑ ।
 प्र॒थमा॑ वाꣳ स॒रथि॑ना सु॒वर्णा॑ दे॒वौ पश्य॑न्तौ भु॒वनानि॑ वि॒श्वा ।
 अ॒पिप्र॑यं चो॒दना॑ वां मि॒माना॑ हो॒तारा॑ ज्यो॒तिः प्र॒दिशा॑ दि॒शन्ता॑ ॥
 आ॒दि॒त्यैर्नो॑ भा॒रती॑ व॒ष्टु य॒ज्ञꣳ स॒रस्व॑ती स॒ह रु॒द्रैर्न॑ आ॒वीत् ।
 इ॒डोप॑हू॒ता व॒सुभिः॑ स॒जोषा॑ य॒ज्ञं नो॑ दे॒वीर॒मृते॑षु ध॒त्त ।
 त्व॒ष्टा वी॒रं दे॒वका॑मं ज॒जान॑ त्व॒ष्टुर्वा॑ जा॒यत आ॒शुर॑श्चः () । 58

5.1.11.4

त्व॒ष्टेदं वि॒श्वं भु॒वनं॑ ज॒जान॑ ब॒होः क॒र्तार॑मि॒ह य॒क्षि हो॑तः ।
 अ॒श्वो घृ॑तेन त्म॒न्या स॒मक्त॑ उप॒ देवाꣳ ऋ॒तुशः॑ पाथ॒ एतु॑ ।
 व॒नस्प॑ति-दे॒वलोकं॑ प्र॒जान॑न्न॒ग्निना॑ ह॒व्या स्व॑दि॒तानि॑ व॒क्षत् ।

प्र॒जा॒प॒ते॒स्त॒प॒सा वा॒वृ॒धा॒नः स॒द्यो जा॒तो द॒धि॒षे य॒ज्ञ॒म॒ग्ने ।
स्वा॒हाकृ॒तेन॑ ह॒विषा॑ पु॒रोगा॑ या॒हि सा॒ध्या ह॒विर॑दन्तु दे॒वाः । 59
(अ॒ग्नि॒ष्ट्वा - वा - म॒श्वो - द्वि॒च॒त्वा॒रि॒ञ्श॒च्च) (A11)

Prasna Korvai with starting Padams of 1 to 11 Anuvaakams :-

(सा॒वि॒त्रा॒णि - व्यृ॒द्ध - मु॒त्क्रा॒म - दे॒वस्य॑ ख॒नति॑ - क्रू॒रं - वा॒रु॒णः
- स॒प्त॒भि - रे॒क॒वि॒ञ्श॒त्या - षड्भि॑ - न ह॑ स्म - स॒मि॒द्धो अ॒ञ्ज
- त्रे॒का॒द॒श)

Korvai with starting Padams of 1, 11, 21 Series of Panchaatis :-

(सा॒वि॒त्रा - प्यु॒त्क्रा॒म - क्रू॒रं - वा॒रु॒णः - प॒श॒वः स्यु॒ -
न ह॑ स्म - न॒व॒प॒ञ्चा॒श॒त्)

First and Last Padam of First Prasnam of 5th Kandam

(सा॒वि॒त्रा॒णि - ह॒विर॑दन्तु दे॒वाः)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे

प्रथमः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.2 पञ्चमकाण्डे द्वितीयः प्रश्नः – चित्युपक्रमाभिधानं

5.2.1.1

विष्णु॑मुखा॒ वै दे॒वाः छन्दो॑भिरिमान् लो॒कानन॑पजय्य म॒भ्यज॑यन्
यद्-विष्णु॑क्र॒मान् क्रम॑ते विष्णु॑रेव भू॒त्वा यज॑मानः छन्दो॑भिरिमान्
लो॒कानन॑पजय्यम॒भि जय॑ति विष्णोः॑ क्रमो॑ऽस्य-भिमातिहेत्याह
गाय॑त्री वै पृथि॒वी त्रैष्टु॑भमन्तरिक्षं जा॒गती द्यौरानु॑ष्टुभीर्दिशः
छन्दो॑भिरेवेमान् लो॒कान् यथा॑ पूर्वम॒भि जय॑ति प्र॒जापति॑रग्निमसृजत
सोऽस्मात् सृष्टः॑ – [] 1

5.2.1.2

परा॑डैत् तमे॒तया ऽन्वैद॑क्रन्दतिति॒ तया॒ वै सोऽग्नेः॑ प्रियं॒ धामा॑ऽवारुन्ध
यदे॒तामन्वा॑हा-ग्नेरेवै॒तया॑ प्रियं॒ धामा॑ऽव रुन्ध ईश्वरो॑ वा ए॒ष परा॑ड्
प्रद॑धो यो विष्णु॑क्र॒मान् क्रम॑ते चत॒सृभि॑रा वर्तते च॒त्वारि॑ छन्दा॑ऽसि
छन्दा॑ऽसि खलु॒ वा अग्नेः॑ प्रिया॒ तनूः॑ प्रिया॒मेवा॑स्य तनु॒वम॑भि-[] 2

5.2.1.3

पर्या॑वर्त॑ते दक्षि॑णा पर्या॑वर्त॑ते स्वमे॑व वीर्य॑मनु पर्या॑वर्त॑ते तस्मा॑द्-
दक्षि॑णोऽर्ध आ॒त्मनो॑ वीर्या॑वत्तरोऽथो॑ आ॒दित्य॑स्यै॒वाऽऽ*वृ॒तमनु॑ पर्या॑वर्त॑ते
शुनः॑ शोप॑माजी॒गर्तिं॑ वरु॑णोऽगृ॒ह्णाथ् स ए॒तां वा॒रुणी॑मपश्यत् तया॒ वै
स आ॒त्मानं॑ वा॒रुण॑पाशादमुञ्चद्-वरु॑णो वा ए॒तं गृ॒ह्णाति॑ य उ॒खां
प्रति॑मुञ्च॒त उ॒दुत्त॑मं वा॒रुण॑पाश-म॒स्मदि॒त्याहा-ऽऽ*त्मान॑मे॒वैतया॑-[] 3

5.2.1.4

वरु॑णपा॒शान् मु॒ञ्च॒त्या त्वाऽ*हा॒र्षमि॒त्याहा ऽऽ*ह्ये॒नञ् ह॑रति ध्रु॒वस्ति॒ष्ठा
ऽवि॑चाच॒लिरि॒त्याह॑ प्रति॑ष्ठित्यै॒ विश॑स्त्वा सर्वा॑ वाञ्छ॒न्त्वित्या॑ह वि॒शैवैनञ्
सम॑र्धयत्यस्मिन् रा॒ष्ट्रम॑धि श्रये॒त्याह॑ रा॒ष्ट्रमे॒वास्मिन्॑ ध्रु॒वम॑क॒र्यं का॒मये॑त
रा॒ष्ट्रञ् स्या॑दिति॒ तं मन॑सा ध्यायेद्-रा॒ष्ट्रमे॒व भ॑वत्य-[] 4

5.2.1.5

-ग्रे बृ॒हन्नु॒षसा॑मू॒र्ध्वो अ॒स्थादि॒त्याहाऽग्र॑मे॒वैनञ् स॒माना॑नां करोति
निर्ज॑ग्मि॒वान् तम॑स इ॒त्याह॑ तम॑ ए॒वास्मा॑दप॒ हन्ति॑ ज्योति॒षा-
ऽऽगा॑दि॒त्याह॑ ज्योति॒रेवा-स्मिन्॑ दधाति च॒तसृ॑भिः सादयति च॒त्वारि॑

छन्दा॑ऽसि॒ छन्दो॑भिरे॒वाऽ-ति॑च्छन्दसो॒त्तमया॑ वर्ष्म॒ वा ए॒षा छन्द॑सां
 यदति॑च्छन्दा॒ वर्ष्मै॑वैन॑ऽ समाना॑नां करोति स॒द्वती - [] 5

5.2.1.6

भवति॑ सत्त्वमे॒वैनं॑ गमयति॒ वाथ्स॑प्रेणो॒प तिष्ठ॑त ए॒तेन॑ वै
 वथ्स॑प्रीर्भा॒लन्दनो॑ऽग्नेः॒ प्रियं॑ धामा॒ऽवाऽरुन्धा॑ऽग्नेरे॒वैतेन॑ प्रियं॑ धामा॒ऽव
 रुन्ध॑ एका॒दशं॑ भवत्ये॒कधै॒व यज॑माने॒ वीर्यं॑ दधाति॒ स्तोमे॑न॒ वै दे॒वा
 अ॒स्मिन् लो॒क आ॑र्धुवन् छन्दो॑भिरमुष्मिन्थ् स्तोम॑स्ये॒व खलु॑ वा
 एतद्-रूपं॑ यद्-वाथ्स॑प्रं यद्-वाथ्स॑प्रेणो॒पतिष्ठ॑त- [] 6

5.2.1.7

इममे॒व तेन॑ लो॒कम॒भि ज॑यति॒ यद्-विष्णु॑क्र॒मान् क्रम॑तेऽमुमे॒व
 तैर्लो॒कम॒भि ज॑यति॒ पूर्वे॒द्युः प्र॑क्रामत्यु॒त्तरे॒द्युरु॑प॒ तिष्ठ॑ते तस्माद्-
 योगे॑ऽन्यासां॒ प्रजा॑नां॒ मनः॑ क्षेमे॑ऽन्यासां॒ तस्माद्-या॑यावरः॒ क्षेम्य॑स्यै॒शे
 तस्माद्-या॑यावरः॒ क्षेम्य॑मध्यवस्यति॒ मुष्टी॑ करोति॒ वाचं॑ यच्छति
 यज्ञ॑स्य धृत्यै॑ । 7 (सृष्टो॑ऽ - (1) भ्ये॑ - तया॑ - भवति॑ - स॒द्वत्यु॑ -
 पतिष्ठ॑ते - द्विच॑त्वारि॒ंशच्च॑) (A1)

5.2.2.1

अ॒न्नप॒तेऽन्न॑स्य॒ नो दे॒हीत्या॑हा-ग्नि॒र्वा अ॒न्नप॒तिः स ए॒वास्मा॑ अ॒न्नं
प्र॒यच्छ॑त्यन॒मीव॑स्य॒ शु॒ष्मिण॑ इत्या॒हा-य॑क्ष्मस्येति॒ वावै॑तदा॒ह प्र॑ प्र॒दातारं॑
ता॒रिष॑ ऊ॒र्जं नो॑ धेहि॒ द्वि॒पदे॑ चतु॒ष्पद॑ इत्या॒हाऽऽ*शि॒षमे॒वैता॑मा शा॒स्त
उ॒दु त्वा॑ वि॒श्वे दे॒वा इत्या॑ह प्रा॒णा वै वि॒श्वे दे॒वाः- [] 8

5.2.2.2

प्रा॒णैरे॒वैन॑मु॒द्यच्छ॑ते ऽग्ने॒ भर॑न्तु चि॒त्तिभि॑रित्या॒ह यस्मा॑ ए॒वैनं॑
चि॒त्तायो॑द्यच्छ॑ते तेनै॒वैन॑ꣳ स॒मर्ध॑यति चत॒सृभि॑रा सा॒दय॑ति च॒त्वारि॑
छन्दा॑ꣳसि छन्दा॑भिरे॒वा-ति॑च्छन्दसो॒त्तम॑या वर्ष्म॒ वा ए॒षा छन्दा॑सां
य॒दति॑च्छन्दा॒ वर्ष्मै॑वैन॑ꣳ स॒माना॑नां करोति स॒द्वती॑ भवति
स॒त्त्वमे॒वैनं॑ गमयति॒ प्रेद॑ग्ने ज्योति॒ष्मान्- [] 9

5.2.2.3

या॒हीत्या॑ह ज्योति॒रेवा॑स्मिन् दधाति॒ तनु॑वा वा ए॒ष हि॑नस्ति यꣳ
हि॒नस्ति॑ मा हि॑ꣳसीस्तनु॒वा प्र॒जा इत्या॑ह प्र॒जाभ्य॑ ए॒वैन॑ꣳ शमयति
रक्षा॑ꣳसि वा ए॒तद्-य॒ज्ञꣳ स॒चन्ते॑ य॒दन॑ उ॒त्स॒र्ज-त्य॑क्रन्ददित्यन्वा॒ह

रक्ष॑साम॑प॒हत्या॑ अन॒सा वह॑न्-त्यप॒चिति॑-मे॒वास्मिन् द॑धाति
तस्मा॑दन॒स्वी च॑ र॒थी चाति॑थीना-मप॒चितत॑मा -[] 10

5.2.2.4

वप॑चिति॒मान् भव॑ति य ए॒वं वे॑द॒ समि॑धाऽग्निं दु॒वस्य॑तेति
घृ॒तानु॑षि॒क्ताम॑व॒सिते॑ समि॒धमा द॑धाति यथाऽति॒थय॑ आ॒गताय॑
सर्पि॑ष्वदाति॒थ्यं क्रि॑यते तादृ॒गेव॑ तद्-गाय॒त्रिया ब्रा॑ह्म॒णस्य॑ गाय॒त्रो हि
ब्रा॑ह्म॒णस्त्रि॑ष्टु॒भा राज॑न्यस्य त्रैष्टु॒भो हि राज॑न्यो ऽप्सु भस्म॒ प्र
वे॑शयत्यप्सुयोनि॒र्वा अ॒ग्निः स्वामे॑वैनं योनिं॑ गमयति तिसृ॒भिः
प्रवे॑शयति त्रिवृ॒द्धा -[] 11

5.2.2.5

अ॒ग्नि-र्या॑वाने॒वाऽग्नि॑स्तं प्रति॒ष्ठां ग॑मयति परा वा ए॒षोऽग्निं॑
वप॑ति योऽप्सु भस्म॒ प्रवे॑शयति ज्योति॒ष्मती॑भ्या-मव दधाति
ज्योति॑रे॒वाऽस्मिन् द॑धाति द्वा॒भ्यां प्रति॑ष्ठित्यै परा वा ए॒ष प्र॒जां प॒शून्
वप॑ति योऽप्सु भस्म॒ प्रवे॑शयति पुनरू॒र्जा सह॑ रय्येति पुनरू॒दैति॑
प्र॒जामे॒व प॒शूना॑त्मन् धत्ते पुन॑स्त्वाऽऽदित्या- [] 12

5.2.2.6

रु॒द्रा व॑स॒वः स॑मि॒न्धता॑-मि॒त्याहै॑ता वा ए॒तं दे॒वता॑ अ॒ग्रे स॑मै॒न्धत॑
ताभि॑रेवैन॒ꣳ स॑मि॒न्धे बो॒धा स॑ बो॒धीत्यु॑प तिष्ठते बो॒धय॑त्येवैनं
तस्मा॑त् सु॒प्त्वा प्र॒जाः प्र॑बु॒ध्यन्ते॑ यथा॒स्थान॑मु॒प तिष्ठ॑ते तस्मा॑द्-
यथा॒स्थानं॑ प॒शवः॑ पु॒नरे॒त्योप॑ तिष्ठन्ते । 13

(वै विश्वे॑ दे॒वा - ज्योति॑ष्मा - नप॑चिततमौ - त्रि॒वृद्धा॑ - आ॒दित्या॑
- द्वि॒चत्वारि॑ꣳश॒च्च) (A2)

5.2.3.1

याव॑ती वै पृ॒थि॒वी तस्यै॑ यम॒ आधि॑पत्यं प॒रीया॑य यो वै यमं
दे॒वय॑जनमस्या अनि॒र्याच्या॑ऽग्निं चि॒नुते॑ यमा॒यै न॒ꣳ
स चि॒नुते॑ऽपे॒ते-त्य॑ध्यवसाययति यममे॒व दे॒वय॑जनमस्यै नि॒र्याच्या॑-
ऽऽत्म॑नेऽग्निं चि॒नुत॑ इ॒ष्वग्रे॑ण वा अ॒स्या अ॒नामृत॑-मि॒च्छन्तो॑ नावि॒न्दन्
ते दे॒वा ए॒तद्-य॑जुरपश्यन्नपे॒तेति॑ यदे॒तेना॑-ध्यवसाययत्य- [] 14

5.2.3.2

-नामृत॑ ए॒वाग्निं॑ चि॒नुत॑ उ॒द्धन्ति॑ यदे॒वास्या॑ अमे॒ध्यं तद॑प
हन्त्य॑पोऽवो॒क्षति॑ शान्त्यै॒ सिक॑ता नि वपत्येतद्वा अ॒ग्नेर्वै॑श्चान॒रस्य॑

रूपं रूपेणैव वैश्वानरमव रुन्ध ऊषान् निवपति पुष्टिर्वा एषा
प्रजननं यदूषाः पुष्ट्यामेव प्रजननेऽग्निं चिनुतेऽथो संज्ञान एव
संज्ञानं ह्येतत् -[] 15

5.2.3.3

पशूनां यदूषा द्यावापृथिवी सहाऽऽस्तां ते वियती अब्रूतामस्त्वेव नौ
सह यज्ञियमिति यदमुष्या यज्ञियमासीत् तदस्यामदधात् त ऊषा
अभवन् यदस्या यज्ञियमासीत् तदमुष्यामदधात् तददश्चन्द्रमसि
कृष्णमूषान् निवपन्नदो ध्यायेद् द्यावापृथिव्योरेव यज्ञियेऽग्निं चिनुते
ऽयं सो अग्निरिति विश्वामित्रस्य -[] 16

5.2.3.4

सूक्तं भवत्येतेन वै विश्वामित्रोऽग्नेः प्रियं धामा ऽवारुन्धाग्नेरेवैतेन प्रियं
धामाव रुन्धे छन्दोभिर्वै देवाः सुवर्गं लोकमायन् चतस्रः प्राचीरुप
दधाति चत्वारि छन्दांसि छन्दोभिरेव तद्-यजमानः सुवर्गं
लोकमेति तेषां सुवर्गं लोकं यतां दिशः समव्लीयन्त ते द्वे
पुरस्ताथ समीची उपादधत द्वे -[] 17

5.2.3.5

पश्चात् समीची ताभिर्वै तेदिशोऽदृहन् यद्वे पुरस्तात् समीची
उपदधाति द्वे पश्चात् समीची दिशां विधृत्या अथो पशवो वै
छन्दांसि पशूनेवास्मै समीचो दधात्यष्टावुप दधात्यष्टाक्षरा गायत्री
गायत्रोऽग्नि-र्यावानेवाग्निस्तं चिनुतेऽष्टावुप दधात्यष्टाक्षरा गायत्री
गायत्री सुवर्गं लोकमञ्जसा वेद सुवर्गस्य लोकस्य -[] 18

5.2.3.6

प्रज्ञात्यै त्रयोदश लोकंपृणा उप दधात्येकविंशतिः संपद्यन्ते
प्रतिष्ठा वा एकविंशः प्रतिष्ठा गार्हपत्य एकविंशस्यैव
प्रतिष्ठां गार्हपत्यमनु प्रति तिष्ठति प्रत्यग्निं चिक्यान्स्तिष्ठति य एवं
वेद पञ्चचितीकं चिन्वीत प्रथमं चिन्वानः पाङ्गो यज्ञः पाङ्गोः
पशवो यज्ञमेव पशूनव रुन्धे त्रिचितीकं चिन्वीत द्वितीयं
चिन्वानस्त्रय इमे लोका एष्वेव लोकेषु - [] 19

5.2.3.7

प्रति॑तिष्ठ॒-त्येक॑चितीकं चिन्वीत॑ तृतीयं॑ चिन्वान॑ एक॒धा वै सु॒वर्गो॑
लो॒क एक॑वृ॒तैव सु॒वर्गं लो॒कमेति॑ पु॒रीषे॑णाभ्यू॒हति॑ तस्मा॑न्मा॒ꣳ
सेना॑स्थि॒ छन्नं॑ न दु॒श्चर्मा॑ भवति॒ य एवं वे॒द पञ्च॑ चि॒तयो॑ भवन्ति
पञ्च॑भिः पु॒रीषै॑रभ्यू॒हति॑ द॒श संप॑द्यन्ते द॒शाक्ष॑रा वि॒राडन्नं॑ वि॒राड्
वि॒राज्ये॑वाऽन्नाद्ये॑ प्रति॑तिष्ठति । 20

(अ॒ध्यव॑साययति - ह्येत - द्वि॒श्वामि॑त्रस्या - दध॒त द्वे - लो॒कस्य॑
- लो॒केषु॑ - सप्त॑च॒त्वारि॑ꣳशच्च) (A3)

5.2.4.1

वि वा ए॒तौ द्वि॑षाते यश्च॑ पु॒राऽग्नि॑र्यश्चो॒खायाꣳ समि॑तमि॒ति च॒तसृ॑भिः
सं नि॒वप॑ति च॒त्वारि॑ छन्दाꣳसि॒ छन्दाꣳसि॒ खलु॑ वा अ॒ग्नेः प्रि॒या
त॒नूः प्रि॒ययै॑वैनौ त॒नुवा सꣳ शा॑स्ति समि॑तमित्या॒ह तस्मा॑द्ब्र॒ह्मणा॑
क्षत्रꣳ समे॑ति यथ्सं॑ न्यु॒प्य वि॒हर॑ति तस्मा॑द्ब्र॒ह्मणा॑
क्ष॒त्रं व्यै॑त्यृतुभिः- [] 21

5.2.4.2

–र्वा ए॒तं दी॒क्षय॑न्ति॒ स ऋ॒तुभि॑रे॒व वि॒मुच्यो॑ मा॒तेव॑ पु॒त्रं पृ॒थिवी॑
 पु॒री॒ष्यमि॒त्याह॑–तु॒भिरे॒वैनं॑ दी॒क्षयि॑त्व॒र्तुभि॑र्वि॒ मुञ्च॑ति॒ वैश्वान॑र्या शि॒क्यमा॑
 द॒त्ते स्व॑द॒यत्ये॒वैन॑–नैर्ऋ॒तीः कृ॒ष्णा–स्ति॒स्र–स्तु॑ष॒पक्वा॑ भव॒न्ति
 निर्ऋ॒त्यै वा ए॒तद्–भा॒गधे॒यं य॑त् तुषा॒ निर्ऋ॒त्यै रू॒पं कृ॒ष्णं रू॒पेणै॒व
 निर्ऋ॒तिं नि॒रव॑द॒यत॑ इ॒मां दि॒शं य॑न्त्ये॒षा –[] 22

5.2.4.3

वै निर्ऋ॒त्यै दिक् स्वा॒यामे॒व दि॒शि निर्ऋ॒तिं नि॒रव॑द॒यते॒ स्वकृ॑त॒ इरि॑ण
 उप॑ द॒धाति॒ प्रद॑रे॒ वैत॑द्वै निर्ऋ॒त्या आ॒यत॑नं॒ स्व ए॒वाऽऽय॑त॒ने
 निर्ऋ॒तिं नि॒रव॑द॒यते॒ शि॒क्यम॑भ्युप॑ द॒धाति॒ नैर्ऋ॒तो वै पा॑शः
 सा॒क्षादे॒वैनं॑ निर्ऋ॒तिपा॑शान्–मुञ्च॑ति॒ तिस्र॑ उप॑ द॒धाति॒ त्रेधा॑वि॒हितो॒ वै
 पु॒रुषो॒ यावा॑ने॒व पु॒रुष॑स्तस्मा॒न्–निर्ऋ॒तिम॑व॒ यज॑ते॒ परा॑चीरु॒प–[] 23

5.2.4.4

द॒धाति॒ परा॑चीमे॒वास्मा॑न्–निर्ऋ॒तिं प्र॑णु॒दते॒ ऽप्र॑तीक्ष॒मा य॑न्ति
 निर्ऋ॒त्या अ॒न्तर्ःहि॒त्यै मा॒र्जयि॑त्वोप॑ तिष्ठ॒न्ते मे॒ध्यत्वा॒य गा॒र्हप॑त्यमु॒प

तिष्ठन्ते निर्ऋति॑ लो॒क ए॒व च॒रित्वा पू॒ता दे॒वलोक॑मु॒पावर्तन्त॑
 एक॑योप॒ तिष्ठन्त॑ एक॒धैव॑ यज॒माने॑ वी॒र्यं॑ दधति नि॒वेशनः॑ स॒ङ्गम॑नो
 वसू॑नामि॒त्याह॑ प्र॒जा वै प॒शवो॑ वसु॒ प्रज॑यै॒वैनं॑ प॒शुभिः॑
 सम॑र्धयन्ति । 24

(ऋ॒तुभि॑ - रे॒षा- परा॑चीरु॒पा - ष॑च॒त्वारि॑ञ्च॒) (A4)

5.2.5.1

पुरु॑षमा॒त्रेण॑ वि मि॒मीते॑ य॒ज्ञेन॑ वै पुरु॑षः संमि॒तो यज्ञ॑परुषै॒वैनं॑
 वि॒मिमी॑ते या॒वान् पुरु॑ष ऊ॒र्ध्वबा॑हु॒स्तावान्॑ भवत्ये॒तावद्वै॑ पुरु॑षे वी॒र्यं॑
 वी॒र्येणै॒वैनं॑ वि॒मिमी॑ते प॒क्षी भ॑वति न ह्य॒पक्षः॑ पति॒तु-मर्॑हत्य॒रन्निना॑
 प॒क्षौ द्रा॑घीया॒सौ भ॑वतस्तस्मात् प॒क्षप्र॑वया॒सि वया॑सि
 व्याम॑मात्रौ प॒क्षौ च पु॑च्छं च भवत्ये॒तावद्वै॑ पुरु॑षे वी॒र्यं॑ -[] 25

5.2.5.2

वी॒र्यसं॑मि॒तो वेणु॑ना वि मि॒मीत॑ आ॒ग्नेयो॑ वै वेणुः॑ सयो॒नित्वा॑य यजु॑षा
 युन॑क्ति यजु॑षा कृषति॒ व्यावृ॑त्यै ष॒ङ्गवे॑न कृषति॒ षड् वा ऋ॑तव
 ऋ॒तुभि॑रे॒वैनं॑ कृषति॒ यद् द्वा॑दश॒गवे॑न सँव॒त्सरे॑णै॒वे यं वा॑

अग्ने-रतिदाहादबिभेथ् सैतद् द्विगुणमपश्यत् कृष्टं चाकृष्टं च ततो
वा इमां नाऽत्यदहद्यत् कृष्टं चाकृष्टं च - [] 26

5.2.5.3

भवत्यस्या अनतिदाहाय द्विगुणं त्वा अग्नि-मुद्यन्तु-मर्हतीत्याहुर्यत्
कृष्टं चाकृष्टं च भवत्यग्नेरुद्यत्या एतावन्तो वै पशवौ द्विपादश्च
चतुष्पादश्च तान् यत् प्राच उथ्सृजेद्-रुद्रायापि दध्याद्-यद्-दक्षिणा
पितृभ्यो निधुवेद्यत् प्रतीचो रक्षाऽसि हन्युरुदीच उथ्सृजत्येषा वै
देवमनुष्याणां शान्ता दिक् - [] 27

5.2.5.4

तामेवैनाननूथ् सृजत्यथो खल्विमां दिशमुथ् सृजत्यसौ वा आदित्यः
प्राणः प्राणमेवैना-ननूथ्सृजति दक्षिणा पर्यावर्तन्ते स्वमेव वीर्यमनु
पर्यावर्तन्ते तस्माद्-दक्षिणोऽर्ध आत्मनो वीर्यावत्तरोऽथो
आदित्यस्यैवाऽऽवृतमनु पर्यावर्तन्ते तस्मात् पराञ्चः पशवो वि
तिष्ठन्ते प्रत्यञ्च आ वर्तन्ते तिस्रस्तिस्रः सीताः - [] 28

5.2.5.5

कृषति॑ त्रिवृ॑तमे॒व य॑ज्ञमु॒खे वि॑ या॒तय॑त्योष॒धीर्व॑पति॒ ब्र॒ह्म॒णाऽन्न॑मव॒ रुन्धे॑
 ऽर्के॑ ऽर्क॒श्ची॒यते॑ चतु॒र्द॒शभि॑र्वपति॒ सप्त॑ ग्रा॒म्या ओ॒षध॑यः स॒प्ताऽऽर॑ण्या
 उ॒भयी॑षामव॒रुद्ध्य॑ अ॒न्नस्या॑न्नस्य॒ वप॑त्यन्नस्या-न्नस्याव॒रुद्ध्यै॑ कृ॒ष्टे
 व॑पति॒ कृ॒ष्टे ह्यो॒षध॑यः प्र॒ति॒तिष्ठ॑न्त्यनु॒सीतं॑ व॒पति॒ प्र॒जा॒त्यै द्वा॒द॒शसु॑
 सी॒तासु॑ व॑पति॒ द्वा॒द॒श मा॒साः सँव॑त्सरः सँव॑त्सरेणै॒वास्मा॑
 अ॒न्नं प॑चति॒ यद॑ग्नि॒चि - [] 29

5.2.5.6

-द॒नव॑रुद्धस्या-॒श्नीया॑दव-रुद्धे॒न व्य॑ध्येत॒ ये व॒नस्प॑तीनां॒ फल॑ग्र॒हय॑-
 स्तानि॒ध्मेऽपि॑ प्रो॒क्षे-द॒नव॑रुद्धस्या-व॒रुद्ध्यै॑ दिग्भ्यो लो॒ष्टान्थ्
 स॒मस्य॑ति दि॒शामे॒व वी॒र्य॑मव॒रुध्य॑ दि॒शां वी॒र्ये॑ऽग्निं चि॒नुते॑ यं
 द्वि॒ष्याद्-य॒त्र स॑ स्यात् तस्यै दि॒शो लो॒ष्टमा॑ ह॒रेदि॑ष-मूर्ज॒मह॑मित आ
 द॒द इ॒तीष॑मेवोर्जं तस्यै दि॒शोऽव॑ () रुन्धे॒ क्षो॒धुको॑ भवति॒ यस्तस्यां॑
 दि॒शि भ॑वत्यु॒त्तर॑वेदिमु॒प व॑पत्यु॒त्तर॑वेद्या॒ ह्यग्नि॑श्ची॒यते॑ ऽथो॒ प॒शवो॑ वा
 उ॒त्तर॑वेदिः प॒शूने॒वाव॑ रुन्धे॒ऽथो॑ य॒ज्ञप॑रुषोऽन॒न्तरि॑त्यै । 30

(च भवत्येतावद्वै पुरुषे वीर्यं - यत्कृष्टञ्चाऽकृष्टञ्च - दिख्-
सीता - अग्निचि - दव - पञ्चविंशतिश्च) (A5)

5.2.6.1

अग्ने तव श्रवो वय इति सिकता नि वपत्येतद्वा अग्नेर्वैश्वानरस्य
सूक्तं सूक्तेनैव वैश्वानरमव रुन्धे षड्भिर्नि वपति षड्वा ऋतवः
सँवथ्सरः सँवथ्सरोऽग्निर्वैश्वानरः साक्षादेव वैश्वानरमव रुन्धे समुद्रं
वै नामैतच्छन्दः समुद्रमनु प्रजाः प्रजायन्ते यदेतेन सिकता नि
वपति प्रजानां प्रजननायेन्द्रो - [] 31

5.2.6.2

वृत्राय वज्रं प्राहरथ् स त्रेधा व्यभवथ् स्फ्यस्तृतीयं रथस्तृतीयं
यूपस्तृतीयं यैऽन्तः शरा अशीर्यन्त ताः शर्करा अभवन्
तच्छर्कराणां शर्करत्वं वज्रो वै शर्कराः पशुरग्नि-र्यच्छर्कराभिरग्निं
परिमिनोति वज्रेणैवास्मै पशून् परि गृह्णाति तस्माद्-वज्रेण पशवः
परिगृहीतास्तस्मात् स्थेयानस्थेयसो नोप हरते त्रिसप्ताभिः
पशुकामस्य - [] 32

5.2.6.3

परि॑ मि॒नुया॑त् स॒प्त वै शी॑र्ष॒ण्याः प्रा॒णाः प्रा॒णाः प॒शवः॑ प्रा॒णैरे॒वास्मै॑
 प॒शून्व रु॑न्धे त्रि॒णवा॑भि-भ्रा॒तृव्य॑वत-स्त्रि॒वृत॑मेव वज्रं॑ सं॒भृत्य॑
 भ्रा॒तृव्या॑य प्र॒हरति॑ स्तृ॒त्या अ॒परि॑मिताभिः परि॑ मि॒नुया-द॑परि॒मितस्या-
 व॒रुद्ध्यै॑ यं का॒मये॑ताप॒शुः स्या॑दित्य॒परि॑मित्य॒ तस्य॑ श॒र्कराः॑ सि॒कता॑-
 व्यू॒हेद॑परिगृहीत ए॒वास्य॑ वि॒षूची॑नं॒ रेतः॑ परा॑ सिञ्चत्य॒पशु॑रेव
 भवति॑ - [] 33

5.2.6.4

यं का॒मये॑त प॒शुमा॑न्त् स्या॑दिति॒ परि॑मित्य॒ तस्य॑ श॒र्कराः॑ सि॒कता॑
 व्यू॒हेत् परि॑गृहीत ए॒वास्मै॑ समी॒चीनं॒ रेतः॑ सिञ्चति॒ पशु॑मानेव भवति॑
 सौ॒म्या व्यू॑हति॒ सोमो॑ वै रे॒तोधा॑ रेत॒ एव॑ तद्-दधाति॒ गाय॑त्रिया
 ब्रा॒ह्मण॑स्य॒ गाय॑त्रो हि ब्रा॒ह्मण-स्त्रि॒ष्टुभा॑ राज॒न्यस्य॑ त्रै॒ष्टुभो॑ हि राज॒न्यः
 श॒म्युं बा॒र्हस्प॑त्यं मे॒धो नो॑पा॒नम॑त् सौ॒ग्निं प्रा॑वि॒शत् - [] 34

5.2.6.5

सोऽग्नेः कृष्णो रूपं कृत्वोदायत सोऽश्वं प्राऽविशत् सोऽश्वस्या -
 वान्तरशाफो-भवद्-यदश्वमाक्रमयति य एव मेधोऽश्वं प्राऽविशत्
 तमेवाव रुन्धे प्रजापतिनाऽग्निश्चेतव्य इत्याहुः प्राजापत्योऽश्वो
 यदश्वमाक्रमयति प्रजापतिनैवाऽग्निं चिनुते पुष्करपर्णमुप दधाति योनिर्वा
 अग्नेः पुष्करपर्णं सयोनि- () -मेवाग्निं चिनुते ऽपां पृष्ठमसीत्युप
 दधात्यपां वा एतत् पृष्ठं यत् पुष्करपर्णं रूपेणैवैनदुप दधाति । 35

(इन्द्रः - पशुकामस्य - भवत्य - विशत् - सयोनिं -
 विंशतिश्च) (A6)

5.2.7.1

ब्रह्म जज्ञानमिति रुक्ममुप दधाति ब्रह्ममुखा वै प्रजापतिः प्रजा
 असृजत ब्रह्ममुखा एव तत् प्रजा यजमानः सृजते ब्रह्म जज्ञानमित्याह
 तस्माद्ब्राह्मणो मुख्यो मुख्यो भवति य एवं वेद ब्रह्मवादिनो वदन्ति न
 पृथिव्यां नान्तरिक्षे न दिव्यग्निश्चेतव्य इति यत् पृथिव्यां चिन्वीत
 पृथिवीं शुचाऽर्पयेन्नौषधयो न वनस्पतयः- [] 36

5.2.7.2

प्र जाये॒रन् यद॒न्तरि॑क्षे चिन्वी॒तान्तरि॑क्षञ् शुचा॒र्पये॑न्न वया॒सि प्र
जाये॒रन् यद्-दिवि॑ चिन्वी॒त दिव॑ञ् शुचा॒र्पये॑न्न पर्जन्यो
वर्षे॒द्रुक्म॑मुप दधात्यमृतं॑ वै हिरण्यममृत॑ एवाग्निं चिनुते॑ प्रजा॒त्यै
हिरण्य॑यं पुरुष॑मुप दधाति यजमानलोकस्य॑ विधृत्यै॑ यदिष्टकाया
आतृ॑ण्णमनूपदध्यात् पशू॒नां च॑ यजमानस्य च प्राणमपि॑

दध्याद् दक्षिणतः- [] 37

5.2.7.3

प्राञ्च॑मुप दधाति दाधार॑ यजमानलोकं न पशू॒नां च॑ यजमानस्य च
प्राणमपि॑ दधात्यथो खल्विष्टकाया॑ आतृ॑ण्णमनूप दधाति प्राणानामुत्सृ॑ष्ट्यै
द्र॒प्सश्च॑स्कन्देत्यभि॑ मृशति॑ होत्रास्वेवैनं॑ प्रतिष्ठापयति॑ स्रुचावुप॑
दधात्याज्यस्य॑ पूर्णां॑ कार्ष्ण्यमयीं॑ दध्नः॑ पूर्णा-मौदु॑ंबरीमियं॑ वै
कार्ष्ण्य॑मय्यसावौ-दु॑ंबरीमे॒ एवोप॑ धत्ते - [] 38

5.2.7.4

तू॒ष्णीमु॒प॒ द॒धाति॑ न॒ ही॒मे य॒जु॒षाऽऽप्तु॒मर्ह॑ति दक्षि॒णां का॒र्ष्य॒मयी॑ –
मु॒त्तरा॒मौ-दु॒म्बरीं॑ तस्मा॒दस्या॑ अ॒सावु॒त्तरा॑ ऽऽज्य॒स्य पू॒र्णा का॒र्ष्य॒मयीं॑
ँव॒ज्रो वा आ॒ज्यं ँव॒ज्रः का॒र्ष्यो व॒ज्रेणै॒व य॒ज्ञस्य॑ दक्षि॒णतो॑
रक्षा॒स्यप॑ ह॒न्ति द॒ध्नः पू॒र्णामौ॑दु॒म्बरीं॑ प॒शवो॑ वै दध्यू॒र्गुदु॒म्बरः॑
प॒शुष्वे॒वोर्जं॑ द॒धाति॑ पू॒र्णे उप॑ द॒धाति॑ पू॒र्णे ए॒वैन- [] 39

5.2.7.5

ममु॒ष्मिन् लो॒क उप॑तिष्ठेते वि॒राज्य॒ग्निश्चे॒तव्य॑ इत्याहुः॒ स्रु॒ग्वै
वि॒राड्य॑थ् स्रु॒चावु॒प॒द॒धाति॑ वि॒राज्ये॒वाग्निं॑ चि॒नुते॑ य॒ज्ञमु॒खेय॑ज्ञमु॒खे वै
क्रि॒यमा॑णे य॒ज्ञं रक्षा॑सि जिघा॑सन्ति य॒ज्ञमु॒खं रु॒क्मो यद्-
रु॒क्मं व्या॑घा॒रय॑ति य॒ज्ञमु॒खादे॒व रक्षा॑स्यप॑ ह॒न्ति प॒ञ्चभि॒र्व्या॑घा॒रय॑ति
पा॒ङ्क्तो य॒ज्ञो या॒वाने॒व य॒ज्ञस्तस्मा॑द्-रक्षा॑स्यप॑ ह॒न्त्यक्ष॑णया॒व्या घा॑रयति
तस्मा॑दक्ष॒णया॑ () प॒शवो॑ऽङ्गानि॒ प्र ह॑रन्ति प्र॒तिष्ठि॑त्यै । 40 (वन॒स्पत॑यो-
दक्षि॒णतो॑- ध॒त्त- ए॒नं- तस्मा॑ दक्ष॒णया॑- प॒ञ्च च) (A7)

5.2.8.1

स्वयमा॒तृ॒ण्णामु॒प॒ द॒धा॒ती॒यं॑ वै स्वयमा॒तृ॒ण्णेमा॒मेवो॒प॒ ध॒त्ते
 ऽश्व॒मु॒प॒ घ्रा॒पय॑ति प्रा॒णमे॒वास्यां॑ द॒धा॒त्यथो॑ प्रा॒जाप॑त्यो वा अ॒श्वः
 प्र॒जाप॑तिनै॒वाऽग्निं॑ चि॒नुते॑ प्रथमेष्ट॒कोप॑धीयमा॒ना प॒शूनां॑ च
 यज॑मानस्य च प्रा॒णमपि॑ द॒धाति॑ स्वयमा॒तृ॒ण्णा भ॑वति
 प्रा॒णाना॒मुत्सृ॑ष्ट्या अथो सु॒वर्ग॑स्य लो॒कस्यानु॑ख्यात्या
 अ॒ग्नाव॒ग्निश्चे॒तव्य॑ इत्याहु॒रेष॑ वा - [] 41

5.2.8.2

अ॒ग्निर्वै॑श्वा॒नरो॑ यद्ब्रा॒ह्मण॑स्तस्मै॑ प्रथमा॒मिष्ट॑कां य॒जुष्कृ॑तां प्रयच्छेत्
 तां ब्रा॒ह्मण॑श्चो॒प द॑ध्याता-म॒ग्नावे॒व तद॑ग्निं चि॒नुत॑ ई॒श्वरो॑ वा ए॒ष
 आ॒र्तिमा॒र्तो॒र्यो-ऽवि॑द्वानिष्ट॒का-मु॒पद॑धाति त्रीन् वरा॑न् दद्यात्
 त्रयो॑ वै प्रा॒णाः प्रा॒णाना॑ꣳ स्पृ॒त्यै द्वावे॒व दे॒यौ द्वौ॑ हि प्रा॒णावे॒क ए॒व
 दे॒य ए॒को हि॑ प्रा॒णः प॒शु - [] 42

5.2.8.3

–वा ए॒ष यद॒ग्निर्न॒ खलु॒ वै प॒शव॒ आय॑वसे रमन्ते दूर्वे॒ष्टकामु॑प॒
 दधा॑ति प॒शूनां॑ धृ॒त्यै द्वा॒भ्यां प्र॑ति॒ष्ठित्यै॑ काण्डा॒त् काण्डा॑त्
 प्र॒रोह॑न्तीत्याह काण्डे॒नकाण्डे॑न ह्येषा प्र॑ति॒तिष्ठ॑त्येवा नो दूर्वे॒ प्रत॑नु
 स॒हस्रे॑ण श॒तेन॒ चेत्या॑ह साह॒स्रः प्र॒जाप॑तिः प्र॒जाप॑तेराप्त्यै देव॒लक्ष्मं॑
 वै त्र्या॑लि॒खिता॒ तामु॑त्तरलक्ष्माणं दे॒वा उपा॑दधता–धर॒लक्ष्माण॑–
 मसू॒रा यं – [] 43

5.2.8.4

काम॑येत वसी॒यान्त् स्या॑दित्युत्तरलक्ष्माणं तस्यो॒प द॑ध्याद्–वसी॒याने॒व
 भव॑ति यं काम॑येत पापी॒यान्त् स्या॑दित्यधरलक्ष्माणं तस्यो॒प
 द॑ध्यादसुरयो॒नि–मे॒वैन॑मनु॒ परा॑ भावयति पापी॒यान् भव॑ति त्र्यालि॒खिता
 भव॑तीमे वै लो॒कास्त्र्या॑लि॒खितै॒भ्य ए॒व लो॒केभ्यो॑ भ्रातृ॒व्यम॑न्तरेत्यङ्गिर॒सः
 सु॒वर्गं लो॒कं य॒तः पु॒रोडा॑शः कू॒र्मो भू॒त्वाऽनु॑ प्रास॒र्प– [] 44

5.2.8.5

–द्यत् कूर्ममुप॑दधा॑ति यथा॑ क्षेत्र॑विदज्जसा॑ नय॑त्येवमे॒वैनं॑ कूर्मः
 सु॒वर्गं॑ लो॒कमज्जसा॑ नयति॑ मे॒धो वा ए॒ष प॒शूनां॑ यत् कूर्मो॑ यत्
 कूर्ममुप॑ दधाति॑ स्वमे॒व मे॒धं प॒श्यन्तः॑ प॒शव॑ उप॑ तिष्ठन्ते॑ श्मशानं॑ वा
 एतत् क्रियते॑ यन्मृ॒तानां॑ प॒शूनां॑ शी॒र्षाण्युप॑धीयन्ते॑ यज्जीवन्तं॑
 कूर्ममुप॑ दधाति॑ तेनाश्मशानचिद्वास्तव्यो॑ वा ए॒ष यत् – [] 45

5.2.8.6

कूर्मो॑ मधु॑ वाता॑ ऋ॒ताय॑त इति॑ द॒ध्ना म॑धुमिश्रेणाभ्यनक्ति॑ स्वदय॑त्येवैनं॑
 ग्राम्यं॑ वा एतदन्नं॑ यद्–द॒ध्या॑रण्यं मधु॑ यद्द॒ध्ना म॑धुमिश्रेणा
 भ्यनक्त्यु॑भयस्या॑ ऽवरु॑द्ध्यै म॒ही द्यौः॑ पृथि॒वी च॑ न इत्याहा
 ऽऽभ्यामे॒वैनमु॑भयतः॑ परिगृ॒ह्णाति॑ प्राञ्चमुप॑ दधाति॑ सु॒वर्गस्य॑ लो॒कस्य॑
 सम॑ष्ट्यै पु॒रस्तात्॑ प्र॒त्यञ्च॑मुप॑ दधाति॑ तस्मात् – [] 46

5.2.8.7

पु॒रस्तात्॑ प्र॒त्यञ्चः॑ प॒शवो॑ मे॒धमुप॑ तिष्ठन्ते॑ यो वा अ॒प॒नाभि॑मग्निं
 चि॒नुते॑ यज॑मानस्य॑ नाभि॒मनु॑ प्रवि॒शति॑ स ए॒नमी॑श्वरो

हि॒॒सि॒तो॒रु॒लू॒ख॒ल॒मु॒प॒ द॒धा॒त्ये॒षा वा अ॒ग्ने॒र्ना॒भिः स॒ना॒भि॒मे॒वा॒ग्निं
चि॒नु॒ते हि॒॒सा॒या औ॒दु॒म्बरं भ॒व॒त्यूर्वा उ॒दु॒म्बर ऊ॒र्ज॒मे॒वा॒व रु॒न्धे
म॒ध्य॒त उप॑ द॒धा॒ति म॒ध्य॒त ए॒वा॒स्मा ऊ॒र्जं द॒धा॒ति तस्मा॑न्-()-म॒ध्य॒त
ऊ॒र्जा भु॒ञ्ज॒त इ॒यद्-भ॒व॒ति प्र॒जा॒प॒ति॒ना य॒ज्ञ॒मु॒खेन॑ सं॒मि॒त॒म॒व
ह॒न्त्य॒न्न॒मे॒वा॒क-वै॒ष्ण॒व्य॒र्चो॒प द॒धा॒ति वि॒ष्णु॒र्वै य॒ज्ञो वै॒ष्ण॒वा व॒न॒स्प॒त॒यो
य॒ज्ञ ए॒व य॒ज्ञं प्र॒ति॒ष्ठा॒प॒य॒ति । 47

(ए॒ष वै - प॒शु - र्य - म॒स॒र्प - दे॒ष यत् - तस्मा॑त् - तस्मा॑त्
- स॒प्त॒वि॒ंश॒तिश्च॑) (A8)

5.2.9.1

ए॒षां वा॑ ए॒त॒ल्लो॒का॒नां ज्यो॒तिः स॒म्भृ॑तं य॒दु॒खा य॒दु॒खा-मु॒प॒द॒धा॒त्ये॒भ्य
ए॒व लो॒के॒भ्यो ज्यो॒ति॒र॒व रु॒न्धे म॒ध्य॒त उप॑ द॒धा॒ति म॒ध्य॒त ए॒वा॒स्मै
ज्यो॒ति॒र्द॒धा॒ति तस्मा॑न्म॒ध्य॒तो ज्यो॒ति॒रु॒पाऽऽस्म॑हे सि॒क॒ता॒भिः
पू॒र॒य॒त्ये॒त॒द्वा अ॒ग्ने॒र्वैश्वा॒न॒र॒स्य रू॒प॒ रूपे॑णै॒व वैश्वा॒न॒र॒म॒व रु॒न्धे यं
का॒म॒ये॒त क्षो॒धु॒कः स्या॒दि॒त्यू॒नां तस्यो॑प- [] 48

5.2.9.2

द॒ध्यात् क्षो॑धुक॒ ए॒व भ॑वति॒ यं का॒मये॒ता-नु॑पदस्य-द॒न्नम॑द्यादिति॒ पूर्णा॑
तस्यो॑प द॒ध्याद॑नुपदस्य-दे॒वान्न॑मत्ति॒ सह॒स्रं वै॑ प्र॒ति पु॑रुषः प॒शूनां॑
य॑च्छति॒ सह॒स्रम॑न्ये प॒शवो॑ म॒ध्ये पु॑रुष॒शीर्ष॑मुप॒ दधा॑ति
स॒वीर्य॑त्वायो-खा॒याम॑पि दधाति॒ प्रति॑ष्ठामे॒वैन॑द्-गमयति॒ व्यृ॑द्धं वा
ए॒तत् प्रा॒णैर॑मे॒ध्यं य॑त् पु॒रुष॑शीर्षम॒मृतं॑ ख॒लु वै प्रा॒णा - [] 49

5.2.9.3

अ॒मृतं॑ हिर॒ण्यं प्रा॒णेषु॑ हिर॒ण्यश॑ल्कान् प्र॒त्यस्य॑ति॒ प्रति॑ष्ठामे॒वैन॑द्-
गम॑यित्वा प्रा॒णैः स॑म॒र्धय॑ति॒ दध्ना॑ म॒धुमि॑श्रेण पू॒रय॑ति॒ मध॒व्योऽसा॑नीति॒
शृ॒तात॑ङ्क्येन मे॒ध्यत्वा॑य॒ ग्राम्यं॑ वा ए॒तद॑न्नं य॑द्-द॒ध्या॑रण्यं म॒धु य॒द्दध्ना॑
म॒धुमि॑श्रेण पू॒रय॑त्यु॒भय॑स्या-व॒रुद्ध्यै॑ प॒शुशी॑र्षाण्युप॒ दधा॑ति प॒शवो॑
वै प॒शुशी॑र्षाणि प॒शूने॒वाव रु॑न्धे॒ यं का॒मये॒ताप॑शुः स्यादिति-[] 50

5.2.9.4

वि॒षूची॑नानि॒ तस्यो॑प द॒ध्याद्-वि॑षूच॒ ए॒वास्मा॑त् प॒शून् द॑धात्यप॒शुरे॑व
भव॑ति॒ यं का॒मये॒त प॑शु॒मान्थ्-स्या॑दिति॒ समी॑चीनानि॒ तस्यो॑प द॒ध्याथ्

समी॑च॒ ए॒वास्मै॑ प॒शून् द॑धाति प॒शु॒मा॒ने॒व भ॑वति पु॒रस्तात्॑
 प्र॒ती॒ची॒नम॑श्चस्योप॒ दधा॑ति प॒श्चात् प्रा॒ची॒नमृ॑षभस्या-प॒शवो॑ वा अ॒न्ये
 गो॑ अ॒श्वेभ्यः॑ प॒शवो॑ गो॒ अ॒श्वाने॒वास्मै॑ समी॒चो द॑धात्ये-ता॒वन्तो॑ वै
 प॒शवो॑ - [] 51

5.2.9.4

द्वि॒पादश्च॑ चतु॒ष्पादश्च॑ ता॒न् वा ए॒तद॒ग्नौ प्र॑दधाति यत् प॒शु॒शी॒र्षा॒ण्युप॑ -
 द॑धात्ये-मु॒मा॒रण्यम॑नु ते दि॒शामी॑त्याह॒ ग्राम्ये॑भ्य ए॒व प॒शुभ्य॑ आ॒रण्यान्
 प॒शूञ्छु॑चम॒नूत्सृ॑जति तस्मा॑त् स॒माव॑त् प॒शूनां॑ प्र॒जाय॑मानाना-मा॒रण्याः॑
 प॒शवः॑ क॒नीया॑ऽसः शु॒चा ह्य॑ताः सर्प॒शी॒र्षमु॑प दधाति यै॒व सर्पे॑
 त्वि॒षिस्ता॑मे॒वाव॑ रु॒न्धे- [] 52

5.2.9.5

यथ् समी॑ची॒नं प॒शु॒शी॒र्षैरु॑प द॒ध्याद् ग्राम्या॑न् प॒शून् द॑ऽशु॒काः
 स्यु॒र्यद्-वि॒षूची॑न-मा॒रण्यान् यजु॑रे॒व वदे॑दव तां त्वि॒षिर् रु॒न्धे या सर्पे॑
 न ग्राम्या॑न् प॒शून् हि॒नस्ति॑ नाऽऽ*र॒ण्यान॑थो खलू॒पधे॑यमे॒व यदु॑प॒दधा॑ति
 ते॒न तां॑ त्वि॒षिम॑व रु॒न्धे या सर्पे॑ यद्-यजु॑र्वदति ते॒न शान्तं॑ । 53

(ऊ॒नान्त॑स्यो॒प॑ – प्रा॒णाः – स्या॒दिति॑ – वै प॒शवो॑ – रु॒न्धे –
चतु॑श्चत्वारि॒ंशच्च॑) (A9)

5.2.10.1

प॒शुर्वा ए॒ष यद॒ग्निर्यो॒निः खलु॑ वा ए॒षा प॒शोर्वि॑ क्रि॒यते॑ यत्
प्रा॒चीन॑मैष्टकाद्-य॒जुः क्रि॒यते॑ रे॒तोऽप॒स्या अप॒स्या उप॑ दधाति
यो॒नावे॒व रे॒तो दधा॑ति पञ्चो॒प दधा॑ति पा॒ङ्गाः प॒शवः॑ प॒शूने॒वास्मै॑
प्र॒जन॑यति पञ्च दक्षि॒णतो॑ वज्रो वा अप॒स्या वज्रे॑णै॒व य॒ज्ञस्य॑
दक्षि॒णतो॑ रक्षा॒स्यप॑ हन्ति पञ्च प॒श्चात् – [] 54

5.2.10.2

प्रा॒चीरु॒प दधा॑ति प॒श्चाद्वै प्रा॒चीन॑ रे॒तो धी॑यते प॒श्चादे॒वास्मै॑ प्रा॒चीन॑
रे॒तो दधा॑ति पञ्च पु॒रस्ता॑त् प्र॒तीची॒रुप॑ दधाति पञ्च प॒श्चात्
प्रा॒चीस्त॑स्मात् प्रा॒चीन॑ रे॒तो धी॑यते प्र॒तीचीः॑ प्र॒जा जा॑यन्ते
पञ्चो॒त्तर॑तः छन्द॒स्याः प॒शवो॑ वै छन्द॒स्याः प॒शूने॒व प्र॒जाता॑न्थ्
स्वमा॑यतनम॒भि पर्यू॑हत इ॒यं वा अ॒ग्ने-र॑तिदाहाद॒बिभे॑त् सैता- [] 55

5.2.10.3

अप॒स्या अप॒श्यत् ता उपा॑धत्त॒ ततो॑ वा इ॒मां ना॑त्यद॒हद्-यद॑प॒स्या
 उप॒दधा॑त्यस्या अन॒तिदा॑हायो॒वाच हे॒यम॑ददि॒त् स ब्र॑ह्मणाऽन्नं॒ य॒स्यैता
 उप॒धी॒यान्तै॑ य उ॒ चैना॑ ए॒वँवे॑ द॒दिति॑ प्राणभृ॒त उप॑ दधाति॒ रेत॑स्ये॒व
 प्रा॒णान् द॑धाति॒ तस्मा॑द्-वदन् प्रा॒णन् प॑श्यञ्छृ॒ण्वन् प॒शुर्जा॑यते॒ ऽयं
 पु॒रो - [] 56

5.2.10.4

भुव॒ इति॑ पु॒रस्ता॑दुप॒ दधा॑ति प्रा॒णमे॒वैता॑भि-र्दा॒धारा॑ऽयं दक्षि॒णा
 वि॒श्वक॑र्मेति॒ दक्षि॑णतो॒ मन॑ ए॒वैता॑भिर्दा॒धारा॑यं पश्चाद्-वि॒श्वव्य॑चा॒ इति॑
 पश्चा॑-च्चक्षु॒रेवै॑ताभि-र्दा॒धारे॑द-मु॒त्तरा॑थ सुव॒रित्यु॑त्तरतः
 श्रो॒त्रमे॒वैता॑भि-र्दा॒धारे॑यमु॒परि॑ मतिरित्यु॒परि॑ष्ठाद्-वाचमे॒वैता॑भि-र्दा॒धार
 दश॑दशोप॒ दधा॑ति स॒वीर्य॑त्वायाक्ष्णयो- [] 57

5.2.10.5

-प दधाति॒ तस्मा॑दक्ष्णया प॒शवो॑ऽङ्गानि॒ प्रह॑रन्ति॒ प्रति॑ष्ठित्यै॒ याः
 प्रा॒चीस्ता॑भि-र्वसिष्ठ आ॒धर्नो॑द्या दक्षि॒णा ता॑भिर्भर॒द्वाजो॑ याः

प्र॒ती॒ची॒स्ता॒भि-वि॒श्वामि॒त्रो या उदी॒ची॒स्ता॒भि-र्ज॒मद॒ग्निर्या ऊ॒र्ध्वास्ता॒भि-
वि॒श्वक॒र्मा य ए॒वमे॒तासा॒मृद्धिं वे॒दध्नो॒त्येव य आ॒सामे॒वं ब॒न्धुतां वे॒द
ब॒न्धुमा॒न् भव॒ति य आ॒सामे॒वं क्लृ॒प्तिं वे॒द कल्प॑ते- [] 58

5.2.10.6

ऽस्मै॒ य आ॒सामे॒वमा॒यत॑नं वे॒दाऽऽ*य॑त॒नवान् भव॑ति य आ॒सामे॒वं
प्र॒तिष्ठां वे॒द प्र॒त्येव॑ तिष्ठ॒ति प्रा॒णभृ॑त उप॒धाय॑ सँय॒त उप॑ दधाति
प्रा॒णाने॒वा ऽस्मिन् धि॒त्वा सँय॑द्भिः सँय॑च्छति तथ् सँय॑ताऽ
सँय॑त्वमथो प्रा॒ण ए॒वापा॑नं दधाति तस्मा॑त् प्रा॒णापा॑नौ सं च॒रतो॑
विषू॒चीरु॑प दधाति तस्मा॑द्-विष्व॒ञ्चौ प्रा॒णापा॑नौ यद्वा
अ॒ग्नेरसँय॑त- [] 59

5.2.10.7

-मसु॑वर्ग्यमस्य तथ् सु॑वर्ग्योऽग्निर्यथ् सँय॑त उप॑ दधाति स॒मेवैनं॑
य॑च्छति सु॑वर्ग्यमे॒वाक-स्त्र्य॑विर्वयः कृ॒तम॑यानामित्याह
वयो॑भिरे॒वाया॑नव रुन्धे ऽयै॒र्वयाऽसि॑ सर्वतो॑ वा॒युम॑तीर्भवन्ति
तस्मा॑दयः सर्व॑तः पव॑ते । 60

(पश्चा - देताः - पुरो - ऽक्ष्णया - कल्पते - ऽसं यतं -
पञ्चत्रिंशच्च) (A10)

5.2.11.1

गायत्री त्रिष्टुब् जगत्यनुष्टुप् पङ्क्त्या सह ।
बृहत्युष्णिहा ककुथ सूचीभिः शिम्यन्तु त्वा ।
द्विपदा या चतुष्पदा त्रिपदा याच षट्पदा ।
सछन्दा या च विच्छन्दाः सूचीभिः शिम्यन्तु त्वा ।
महानाम्नी रेवतयो विश्वा आशाः प्रसूवरीः ।
मेघ्या विद्युतो वाचः सूचीभिः शिम्यन्तु त्वा ।
रजता हरिणीः सीसा युजो युज्यन्ते कर्मभिः ।
अश्वस्य वाजिनस्त्वचि सूचीभिः शिम्यन्तु त्वा । नारी- [] 61

5.2.11.2

-स्ते पत्नयो लोम विचिन्वन्तु मनीषया ।
देवानां पत्नीर्दिशः सूचीभिः शिम्यन्तु त्वा ।
कुविदङ्ग यवमन्तो यवं चिद्यथा दान्त्यनुपूर्वं वियूय ।

इ॒हे॒है॒षां॑ कृ॒णु॒त॒ भो॒ज॒ना॒नि॒ ये॒ ब॒र्हि॒षो॒ न॒मो॒वृ॒क्तिं॑ न॒ज॒ग्मुः॑ । 62

(नारी॑ – स्त्रि॑श्च॑) (A11)

5.2.12.1

क॒स्त्वा॑ च्छ॒यति॑ क॒स्त्वा॑ वि॒ शा॑स्ति॒ कस्ते॑ गा॒त्रा॒णि॒ शि॒म्यति॑ ।
 क॒ उ॒ ते॒ श॒मि॒ता॒ क॒विः॑ । ऋ॒त॒व॒स्त॒ ऋ॒तु॒धा॒ परुः॑ श॒मि॒तारो॑ वि॒शा॒सतु॑ ।
 सँ॒व॒त्स॒र॒स्य॑ धा॒य॒सा॒ शि॒मी॒भिः॑ शि॒म्यन्तु॑ त्वा ।
 दै॒व्या॑ अ॒ध्व॒र्य॒व॒स्त्वा॑ च्छ॒यन्तु॑ वि॒ च॑ शा॒सतु॑ ।
 गा॒त्रा॒णि॒ प॒र्व॒श॒स्ते॑ शि॒माः॑ कृ॒ण्वन्तु॑ शि॒म्यन्तः॑ ।
 अ॒र्ध॒मा॒साः॑ प॒रू॒षि॑ ते॒ मा॒साः॑ छ॒यन्तु॑ शि॒म्यन्तः॑ ।
 अ॒हो॒रा॒त्रा॒णि॒ म॒रु॒तो॑ वि॒लि॒ष्ट॑ – [] 63

5.2.12.2

सू॒द॒यन्तु॑ ते । पृ॒थि॒वी॒ ते॒ ऽन्त॑रि॒क्षे॒ण॒ वा॒यु॒श्छि॒द्रं॑ भि॒षज्य॑तु ।
 द्यौ॒स्ते॑ नक्ष॒त्रैः॑ स॒ह॒ रू॒पं॑ कृ॒णो॒तु॑ सा॒धु॒या ।
 शं॒ ते॒ प॒रे॒भ्यो॑ गा॒त्रे॒भ्यः॑ श॒म॒स्त्व॒व॒रे॒भ्यः॑ ।
 श॒म॒स्थ॒भ्यो॑ म॒ज्ज॒भ्यः॑ श॒मु॒ ते॒ त॒नु॒वे॑ भुवत् । 64

(विलिष्टं - त्रि॒श॒च्च) (A12)

Prasna Korvai with starting Padams of 1 to 12 Anuvaakams :-

(विष्णु॑मुखा - अन्न॑पते - याव॑ती - वि॒ वै - पुरु॑षमा॒त्रेणा - ऽग्ने॑
तव॑ श्रवो॒ वयो॑ - ब्रह्म॑ ज॒ज्ञान॑ - स्वय॑मा॒तृण्णा - मेषां॑ वै - पशु॑
- गा॑यत्री - कस्त्वा - द्वाद॑श)

Korvai with starting Padams of 1, 11, 21 Series of Panchaatis :-

(विष्णु॑मुखा - अप॑चिति॒मान् - वि॒ वा ए॒ता - वग्ने॑ तव॑ -
स्वय॑मा॒तृण्णां - वि॒षूची॑नानि - गा॑यत्री - चतु॑ष्षष्टिः)

First and Last Padam of Second Prasnam of 5th Kandam

(विष्णु॑मुखा - स्त॒नुवे॑ भुवत्)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे द्वितीयः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.3 पञ्चमकाण्डे तृतीयः प्रश्नः – चितीनां निरूपणं

5.3.1.1

उ॒थ्स॒न्न॒ य॒ज्ञो॒ वा॒ ए॒ष॒ य॒द॒ग्निः॒ किं॑ वा॒ऽहै॒तस्य॑ क्रि॒यते॑ किं॑ वा॒ न॒ यद्वै॑
य॒ज्ञस्य॑ क्रि॒यमा॑णस्या-न्त॒र्यन्ति॑ पू॒यति॑ वा॒ अस्य॑ तदा॒श्विनी॑रुप
दधा॒त्यश्वि॑नौ॒ वै दे॒वानां॑ भिष॒जौ ता॒भ्यामे॒वास्मै॑ भेष॒जं करो॑ति पञ्चोप
दधा॒ति पा॒ङ्क्तो॑ य॒ज्ञो या॒वाने॒व य॒ज्ञस्त॒स्मै भेष॑जं करो॒त्यृत॑व्या॒ उप
दधा॒त्यृतू॑नां क्लृ॒प्त्यै - [] 1

5.3.1.2

पञ्चोप॑ दधा॒ति पञ्च॑ वा॒ ऋ॒तवो॑ या॒वन्त॑ ए॒वर्त॑वस्तान् क॒ल्पय॑ति
समा॒नप्र॑भृ॒तयो॑ भव॒न्ति समा॒नोद॑र्कास्त॒स्मात् समा॒ना ऋ॒तव॑ ए॒केन॑
पदे॒न व्या॑वर्तन्ते तस्मा॒द्-ऋ॒तवो॑ व्या॒वर्तन्ते॑ प्रा॒णभृ॑त॒ उप दधा॒त्यृतु॑ष्वे॒व
प्रा॒णान् दधा॑ति तस्मा॒त् समा॒नाः सन्त॑ ऋ॒तवो॑ न जी॒र्यन्त्य॑थो

प्र॒जन॒यत्ये॒वैनाने॒ष वै वा॒युर्यत् प्रा॒णो यद्-ऋ॒तव्या॑ उप॒धाय॑

प्रा॒णभृ॑त - [] 2

5.3.1.3

उप॒दधा॑ति तस्मा॒त् सर्वा॑नृ॒तून्नु वा॒युरा व॑रीवर्त्ति वृ॒ष्टिस॒नीरु॒प द॑धाति
वृ॒ष्टिमे॒वाव रु॒न्धे यदे॑क॒धोप॒दध्या॑-दे॒कमृ॒तुं 'वर्षे॑दनुपरि॒हारं सा॑दयति
तस्मा॒त् सर्वा॑नृ॒तून् वर्ष॑ति यत् प्रा॒णभृ॑त उप॒धाय॑ वृ॒ष्टिस॒नीरु॒पद॑धाति
तस्मा॒द्-वा॒युप्र॑च्युता दि॒वो वृ॒ष्टिरी॑र्ते प॒शवो॑ वै व॒यस्या॑ ना॒नाम॑नसः
खलु॒ वै प॒शवो॑ ना॒नाव्र॑तास्तेऽप॒ एवा॑भि॒ सम॑नसो - [] 3

5.3.1.4

यं का॒मये॑ताप॒शुः स्या॑दि॒ति व॒यस्या॑स्तस्यो॒-प॒धाया॑प॒स्या उप॑ दध्या॒द
सं॒ज्ञान॑मे॒वास्मै॑ प॒शुभिः॑ करोत्यप॒शुरे॒व भ॑वति यं का॒मये॑त
प॒शुमा॑न्त्-स्या॒दित्य॑-प॒स्यास्त॑स्यो॒प॒धाय॑ व॒यस्या॑ उप॑ दध्या॒त्
सं॒ज्ञान॑मे॒वास्मै॑ प॒शुभिः॑ करोति प॒शुमा॑ने॒व भ॑वति चत॒स्रः पु॒रस्ता॑दुप॑
द॒धाति॑ तस्मा॒च्च॒त्वारि॑ चक्षु॒षो रू॒पाणि॑ द्वे शु॒क्ले द्वे कृ॒ष्णे- [] 4

5.3.1.5

मूर्ध॑न्वती॑र्भव॑न्ति तस्मा॑त् पु॒रस्ता॑न्मूर्द्धा॑ पञ्च॑ दक्षि॑णाया॒ श्रोण्या॑मुप॑
 दधा॑ति पञ्चो॑त्तरस्यां॒ तस्मा॑त् प॒श्चाद्-वर्षी॑यान् पु॒रस्ता॑त् प्रवणः॑
 प॒शुर्ब॑स्तो वय॑ इति॒ दक्षि॑णेऽ॒स उप॑ दधाति वृ॒ष्णिर्वय॑ इत्यु॒त्तरे
 ऽ॒सावे॒व प्रति॑ दधाति व्याघ्रो वय॑ इति॒ दक्षि॑णे पक्ष॑ उप॑ दधाति
 सि॒हो वय॑ इत्यु॒त्तरे प॒क्षयो॑रेव वी॒र्यं दधा॑ति पु॒रुषो॑ वय॑ इति ()
 मध्ये॑ तस्मा॑त् पु॒रुषः प॒शूना॑मधिपतिः । 5 (क्लृ॑प्त्या - उप॑धाय॑
 प्रा॒णभृ॑तः-सम॑नसः-कृ॒ष्णे-पु॒रुषो॑ वय॑ इति - पञ्च॑ च) (A1)

5.3.2.1

इन्द्रा॑ग्नी अव्य॑थमा॒नामि॑ति स्वय॑मातृ॒ण्णामु॑प दधा॑तीन्द्रा॒ग्निभ्यां॑ वा
 इ॒मौ लो॒कौ वि॑धृ॒तावन॑यो-लो॒कयो॑-वि॑धृत्या अ॒धृते॒व वा ए॒षा
 यन्म॑ध्यमा चि॒तिरन्त॑रि॒क्षमि॒व वा ए॒षेन्द्रा॑ग्नी इत्या॑हेन्द्रा॒ग्नी वै
 दे॒वाना॑मो॒जो भृ॒तावो॑जसै॒वैना॑-मन्त॑रि॒क्षे चि॑नुते धृ॒त्यै स्वय॑मातृ॒ण्णामु॑प
 दधा॑त्यन्त॑रि॒क्षं वै स्वय॑मातृ॒ण्णा ऽन्त॑रि॒क्षमे॒वोप॑ ध॒त्ते ऽश्व॑मुप- [] 6

5.3.2.2

घ्रापयति प्राणमेवास्यां॑ दधात्यथो॑ प्राजापत्यो वा अश्वः॑
 प्रजापतिनैवाग्निं॑ चिनुते स्वयमातृण्णा॑ भवति प्राणानामुत्सृष्ट्या॑ अथो
 सुवर्गस्य॑ लोकस्यानुख्यात्यै॑ देवानां॑ वै सुवर्गं॑ लोकं॑ यतां॑ दिशः॑
 समव्लीयन्त॑ त एता दिश्या॑ अपश्यन् ता उपादधत॑ ताभिर्वै ते
 दिशोऽदृ॒हन् यद्दिश्या॑ उपदधाति॑ दिशां॑ विधृत्यै॑ दश प्राणभृतः॑
 पुरस्तादुप - [] 7

5.3.2.3

दधाति नव॑ वै पुरुषे प्राणा नाभिर्दशमी॑ प्राणानेव पुरस्ताद्धत्ते॑ तस्मात्
 पुरस्तात् प्राणा ज्योतिष्मती-मुत्तमामुप॑ दधाति तस्मात् प्राणानां॑
 वाग्ज्योतिरुत्तमा॑ दशोप॑ दधाति दशाक्षरा॑ विराड् विराट् छन्दसां॑
 ज्योतिर्ज्योतिरेव॑ पुरस्ताद्धत्ते॑ तस्मात् पुरस्ताज्ज्योतिरुपा॑ ऽऽ*स्महे॑
 छन्दा॑सि पशुष्वजिमयुस्तान् बृहत्युदजयत्
 तस्माद्-बार्हताः - [] 8

5.3.2.4

प॒शव॑ उ॒च्यन्ते॑ मा॒ छन्द॑ इति॒ दक्षि॑णत॒ उप॑ दधाति॒ तस्मा॑द्-दक्षि॒णा
वृ॒तो मा॑साः पृथि॒वी छन्द॑ इति॒ पश्चा॑त् प्रति॒ष्ठित्या॑ अ॒ग्निर्दे॒वतेत्यु॑त्तरत॒
ओजो॑ वा अ॒ग्निरोज॑ ए॒वोत्तर॑तो ध॒त्ते तस्मा॑दुत्तरतो ऽभि॒प्रयायी॑ जयति॒
षट्त्रिं॑श॒थ् संप॑द्यन्ते॒ षट्त्रिं॑श॒दक्षरा॑ बृ॒हती॑ बा॒र्हताः॑ प॒शवो॑
बृ॒हत्यैवा॑स्मै प॒शूनव॑ रुन्धे बृ॒हती॑ छन्द॒साञ् स्वारा॑ज्यं॒ परी॑याय॒
यस्यै॒ता - [] 9

5.3.2.5

उप॒धीय॑न्ते गच्छति॒ स्वारा॑ज्यञ् सप्त॒ वाल॑खिल्याः पुर॒स्तादु॑प दधाति॒
सप्त॒ पश्चा॑थ् सप्त॒ वै शी॑र्ष॒ण्याः प्रा॒णा द्वाववा॑ञ्चौ प्रा॒णानाञ्
सवी॑र्य॒त्वाय॑ मूर्धा॒ऽसि रा॑डिति॒ पुर॒स्तादु॑प दधाति॒ यन्त्री॑ रा॑डिति॒ पश्चा॑त्
प्रा॒णानेवा॑स्मै स॒मीचो॑ दधाति । 10 (अ॒श्वमु॑प - पुर॒स्तादु॑प -
बा॒र्हता॑ - ए॒ता - श्व॑तु॒स्त्रिंश॑च्च) (A2)

5.3.3.1

दे॒वा वै यद्-य॒ज्ञे ऽकु॑र्वत॒ तद॑सु॒रा अकु॑र्वत॒ ते दे॒वा ए॒ता
अ॒क्ष्णया॑स्तोमीया॒ अप॑श्यन् ता अ॒न्यथा॑ ऽनू॒च्या-न्य॑थोपा॒दध॑त॒ तद॑सु॒रा

नान्ववायन् ततो देवा अभवन् पराऽसुरा यदक्षण्यास्तोमीया अन्यथा
ऽनूच्यान्यथोप दधाति भ्रातृव्याभिभूत्यै भवत्यात्मना पराऽस्य भ्रातृव्यो
भवत्या-शुस्त्रिवृदिति पुरस्तादुप दधाति यज्ञमुखं वै त्रिवृ -[] 11

5.3.3.2

-द्यज्ञमुखमेव पुरस्ताद्वि यातयति व्योम सप्तदश इति दक्षिणतो ऽन्नं वै
व्योमाऽन्नं सप्तदशोऽन्नमेव दक्षिणतो धत्ते तस्माद्-दक्षिणेनान्नमद्यते
धरुण एकविंश इति पश्चात् प्रतिष्ठा वा एकविंशः प्रतिष्ठित्यै भान्तः
पञ्चदश इत्युत्तरत ओजो वै भान्त ओजः पञ्चदश ओज एवोत्तरतो
धत्ते तस्मादुत्तरतो ऽभिप्रयायी जयति प्रतूर्तिरष्टादश इति पुरस्ता- [] 12

5.3.3.3

-दुप दधाति द्वौ त्रिवृतावभिपूर्वं यज्ञमुखे वि यातयत्यभिवर्तः
सविंश इति दक्षिणतोऽन्नं वा अभिवर्तोऽन्नं सविंशोऽन्नमेव
दक्षिणतो धत्ते तस्माद्-दक्षिणेनान्नमद्यते वर्चो द्वाविंश इति
पश्चाद्-यद्-विंशतिर्द्वे तेन विराजौ यद् द्वे प्रतिष्ठा तेन विराजोरेवा -
भिपूर्वमन्नाद्ये प्रतितिष्ठति तपो नवदश इत्युत्तर तस्मात् सव्यो-[] 13

5.3.3.4

हस्तयोस्तपस्वितरो योनिश्चतुर्विंश इति पुरस्तादुप दधाति
चतुर्विंशत्यक्षरा गायत्री गायत्री यज्ञमुखं यज्ञमुखमेव पुरस्ताद्-
वियातयति गर्भाः पञ्चविंश इति दक्षिणतोऽन्नं वै गर्भा अन्नं
पञ्चविंशोन्नमेव दक्षिणतो धत्ते तस्माद् दक्षिणेनान्नमद्यत
ओजस्त्रिणव इति पश्चादिमे वै लोकास्त्रिणव एष्वेव लोकेषु
प्रतितिष्ठति संभरणस्त्रयोविंश इत्यु - [] 14

5.3.3.5

-त्तरतस्तस्मात् सव्यो हस्तयोः सम्भार्यतरः क्रतुरेकत्रिंश इति
पुरस्तादुप दधाति वाग्वै क्रतुर्यज्ञमुखं वाग्यज्ञमुखमेव पुरस्ताद्वि
यातयति ब्रध्नस्य विष्टपं चतुस्त्रिंश इति दक्षिणतोऽसौ वा आदित्यो
ब्रध्नस्य विष्टपं ब्रह्मवर्चसमेव दक्षिणतो धत्ते तस्माद् दक्षिणोऽर्धो
ब्रह्मवर्चसितरः प्रतिष्ठा त्रयस्त्रिंश इति पश्चात् प्रतिष्ठित्यै नाकः
षट्त्रिंश इत्युत्तरतः सुवर्गो वै () लोको नाकः सुवर्गस्य लोकस्य
समष्ट्यै । 15

(वै त्रिवृ - दिति पुरस्तात् - सव्य - स्त्रयोविंश इति - सुवर्गो
वै - पञ्च च) (A3)

Special Korvai for Anuvaakam 3

आशु - व्योम - धरुणो - भान्तः - प्रतूर्तिर - भिवर्तो - वर्च -
स्तपो - योनि - गर्भा - ओजः - संभरणः - क्रतु - ब्रध्नस्य
- प्रतिष्ठा - नाकः - षोडश)

5.3.4.1

अग्नेर्भागोऽसीति पुरस्तादुप दधाति यज्ञमुखं वा अग्निर्यज्ञमुखं
दीक्षा यज्ञमुखं ब्रह्म यज्ञमुखं त्रिवृद्-यज्ञमुखमेव पुरस्ताद्वि यातयति
नृचक्षसां भागोऽसीति दक्षिणतः शुश्रुवाऽसौ वै नृचक्षसोऽन्नं धाता
जातायैवास्मा अन्नमपि दधाति तस्माज्जातोऽन्नमत्ति जनित्रो स्पृतः
सप्तदशः स्तोम इत्याहाऽन्नं वै जनित्र- [] 16

5.3.4.2

-मन्त्रो सप्तदशो-ऽन्नमेव दक्षिणतो धत्ते तस्माद् दक्षिणेना-न्नमद्यते
मित्रस्य भागोऽसीति पश्चात् प्राणो वै मित्रोऽपानो वरुणः

प्राणा॒पा॒नावे॒वास्मिन् दधा॑ति दि॒वो वृ॒ष्टिर्वा॑ताः स्पृ॒ता एक॑वि॒ंशः॑
 स्तोम॑ इत्या॒ह प्रति॑ष्ठा वा एक॑वि॒ंशः॑ प्रति॑ष्ठित्या इन्द्र॑स्य
 भा॒गोऽसी॑त्युत्तर॒त ओजो॑ वा इन्द्र॑ ओजो॑ विष्णु॒रोजः॑ क्ष॒त्रमो॑जः

पञ्चद॑श – [] 17

5.3.4.3

ओज॑ ए॒वोत्तर॑तो ध॒त्ते तस्मा॑दुत्तर॒तो-ऽभि॑प्रयायी जय॑ति वसू॑नां
 भा॒गोऽसी॑ति पु॒रस्ता॑दुप दधा॑ति य॒ज्ञमु॒खं वै वस॑वो य॒ज्ञमु॒खं रु॒द्रा
 य॒ज्ञमु॒खं चतु॑र्वि॒ंशो य॒ज्ञमु॒खमे॒व पु॒रस्ता॑द्वि या॑तयत्यादि॒त्यानां॑
 भा॒गोऽसी॑ति दक्षि॑णतोऽन्नं वा आ॑दि॒त्या अन्नं॑ मरु॒तोऽन्नं॑ गर्भा॑ अन्नं॑
 पञ्च॑वि॒ंशोऽन्नमे॒व दक्षि॑णतो ध॒त्ते तस्मा॑द् दक्षि॑णेनाऽन्नम॒द्यते॑
 ऽदि॒त्यै भा॒गो- [] 18

5.3.4.4

ऽसी॑ति प॒श्चात् प्रति॑ष्ठा वा अ॒दि॒तिः प्रति॑ष्ठा पू॒षा प्रति॑ष्ठा त्रि॒णवः॑
 प्रति॑ष्ठित्यै दे॒वस्य॑ स॒वितु॑र्भा॒गोऽसी॑त्युत्तर॒तो ब्र॒ह्म वै दे॒वः स॒विता ब्र॒ह्म
 बृ॒हस्प॑तिर्ब्र॒ह्म चतु॑ष्टो॒मो ब्र॒ह्मव॑र्च॒समे॒वोत्तर॑तो ध॒त्ते तस्मा॑दुत्तरोऽर्धो॑

ब्रह्मवर्चसितरः सावित्रवती भवति प्रसूत्यै तस्माद् ब्राह्मणानामुदीची
 सनिः प्रसूता धर्त्रश्चतुष्टोम इति पुरस्तादुप दधाति यज्ञमुखं वै
 धर्त्रो - [] 19

5.3.4.5

यज्ञमुखं चतुष्टोमो यज्ञमुखमेव पुरस्ताद्वि यातयति यावानां
 भागोऽसीति दक्षिणतो मासा वै यावा अर्धमासा अयावा-स्तस्माद्-
 दक्षिणावृतो मासा अन्नं वै यावा अन्नं प्रजा अन्नमेव दक्षिणतो धत्ते
 तस्माद् दक्षिणेना-न्नमद्यत ऋभूणां भागोऽसीति पश्चात् प्रतिष्ठित्यै
 विवर्तो ऽष्टाचत्वारिंश इत्युत्तरतोऽनयोर्लोकयोः सवीर्यत्वाय
 तस्मादिमौ लोकौ समावद्-वीर्यौ - [] 20

5.3.4.6

यस्य मुख्यवतीः पुरस्तादुपधीयन्ते मुख्य एव भवत्याऽस्य मुख्यो
 जायते यस्या-न्नवती - दक्षिणतो-ऽत्यन्नमाऽस्यान्नादो जायते यस्य
 प्रतिष्ठावतीः पश्चात् प्रत्येव तिष्ठति यस्यौजस्वतीरुत्तरत औजस्व्येव

भ॒व॒त्याऽस्यौ॑ ज॒स्वी जा॒यते॒ ऽर्को॑ वा ए॒ष यद॒ग्निस्तस्यै॑ तदे॒व
स्तो॒त्रमे॒तच्छ॒स्त्रं य॑दे॒षा वि॒धा - [] 21

5.3.4.7

वि॒धी॒यते॒ ऽर्क ए॒व तद॒र्क्यम॑नु वि॒धी॒यते॒ ऽत्य॒न्नमा॑स्यो॒न्नादो॑ जा॒यते॒
यस्यै॑षा वि॒धा वि॒धी॒यते॒ य उ॑ चैनामे॒वं वे॒द सृ॒ष्टीरु॑प दधाति
यथा॑सृ॒ष्टमे॒वाव रु॒न्धे न॒ वा इ॒दं दि॒वा न॒ नक्त॑मासीदव्यावृ॒त्तं ते॒ दे॒वा
ए॒ता व्यु॑ष्टीरपश्यन् ता उपा॒दध॑त ततो॒ वा इ॒दं () व्यौ॑च्छद्-यस्यै॑ता
उप॒धी॒यन्ते॒ व्ये॒वास्मा॑ उच्छ॒त्यथो॒ तम॑ ए॒वाप॑हते । 22
(वै॒ ज॒नि॒त्रं - प॒ञ्च॒द॒शो - ऽदि॒त्यै भा॒गो - वै॒ ध॒र्त्रः - स॒मा॒व॒द्वी॒र्यै
- वि॒धा - ततो॑ वा इ॒दं - च॒तु॒र्द॒श च) (A4)

Special Korvai for Anuvaakam 4

(अ॒ग्ने - नृ॒चक्ष॑सां - ज॒नि॒त्रं - मि॒त्र - स्ये॑न्द्रस्य - व॒सूना॑ -
मा॒दि॒त्याना॑ - म॒दि॒त्यै - दे॒वस्य॑ स॒वि॒तुः - सा॒वि॒त्रव॑ती - ध॒र्त्रो -
या॒वा॒ना-मृ॒भू॒णां - वि॒वर्त॑ - श्रु॒तु॒र्द॒श)

5.3.5.1

अग्ने॑ जा॒तान् प्र॒णु॒दा नः॑ स॒प॒त्नानि॑ति॒ पुर॒स्तादु॒प द॑धाति जा॒ताने॒व
भ्रातृ॑व्यान् प्र॒णु॒दते॑ स॒ह॒सा जा॒तानि॑ति॒ प॒श्चाज्ज॑निष्यमाणाने॒व प्र॒ति नु॑दते
चतु॑श्चत्वारि॒ंशः स्तोम॑ इति॒ दक्षि॑णतो ब्र॒ह्मव॑र्चसं॒ वै चतु॑श्चत्वारि॒ंशो
ब्र॒ह्मव॑र्चसमे॒व दक्षि॑णतो ध॒त्ते तस्मा॑द् दक्षि॒णोऽर्धो॑ ब्र॒ह्मव॑र्चसि॒तरः
षोड॑शः स्तोम॑ इत्यु॒त्तर॑त ओजो॒ वै षोड॑श ओज॒ एवो॑त्तरतो ध॒त्ते
तस्मा॑ – [] 23

5.3.5.2

दु॒त्तर॑तोऽभि॒प्रया॑यी जयति॒ वज्रो॑ वै चतु॑श्चत्वारि॒ंशो वज्रः॑ षोड॑शो
यदे॒ते इष्ट॑के उप॒दधा॑ति जा॒ताञ्चै॒व ज॑निष्यमाणाञ्च॒ भ्रातृ॑व्यान्
प्र॒णु॒द्य वज्र॑मनु प्र॒हर॑ति स्तृ॒त्यै पु॒रीष॑वतीं मध्य उप॒दधा॑ति पु॒रीषं॑ वै
मध्य॑मात्मनः सा॒त्मान॑मे॒वाग्निं॑ चिनुते सा॒त्माऽमु॑ष्मिन् लो॒के भ॑वति य
ए॒वं वेदै॒ता वा अ॑स॒प॒त्ना ना॑मेष्टका॒ यस्यै॒ता उप॑धीयन्ते – [] 24

5.3.5.3

नास्य सपत्नो भवति पशुर्वा एष यदग्निर्विराज उत्तमायां चित्यामुप
 दधाति विराजमेवोत्तमां पशुषु दधाति तस्मात् पशुमानुत्तमां वाचं
 वदति दशदशोप दधाति सवीर्यत्वायाऽक्ष्णयोप दधाति तस्मादक्ष्णया
 पशवोऽङ्गानि प्रहरन्ति प्रतिष्ठित्यै यानि वै छन्दांसि सुवर्ग्याण्यासन्
 तैर्देवाः सुवर्गं लोकमायन् तेनर्षयो – [] 25

5.3.5.4

ऽश्राम्यन् ते तपोऽतप्यन्त तानि तपसाऽपश्यन् तेभ्य एता इष्टका
 निरमिमतेवः छन्दो वरिवश्छन्द इति ता उपादधत ताभिर्वै ते सुवर्गं
 लोकमायन् यदेता इष्टका उपदधाति यान्येव छन्दांसि सुवर्ग्याणि
 तैरेव यजमानः सुवर्गं लोकमेति यज्ञेन वै प्रजापतिः
 प्रजा असृजत ताः स्तोम भागैरेवाऽसृजत यथ् – [] 26

5.3.5.5

स्तोम भागा उपदधाति प्रजा एव तद्-यजमानः सृजते बृहस्पतिर्वा
 एतद्-यज्ञस्य तेजः समभरद्यथ् स्तोमभागा यथ् स्तोमभागा उपदधाति

स॒ते॒ज॒स॒मे॒वा॒ग्निं॑ चि॒नु॒ते बृ॒ह॒स्प॒ति॒र्वा ए॒तां य॒ज्ञ॒स्य॑ प्र॒ति॒ष्ठा॒मप॑श्य॒द्यथ्
 स्तो॒म॒भा॒गा यथ् स्तो॒म॒भा॒गा उप॑दधाति य॒ज्ञ॒स्य॑ प्र॒ति॒ष्ठि॒त्यै स॒प्त॒स॒प्तो॑प
 दधाति स॒वी॒र्य॒त्वाय॑ ति॒स्रो म॑द्ध्ये प्र॒ति॒ष्ठि॒त्यै । 27 (उत्तरतो॑ ध॒त्ते तस्मा॑
 - दु॒प॒धी॒यन्त॑ - ऋ॒षयो॑ - ऽसृ॒जत॑ यत् - त्रि॒च॒त्वा॒रि॒ञ्श॒च्च) (A5)

5.3.6.1

र॒श्मि॒रि॒त्ये॒वा ऽऽदि॒त्यम॑सृ॒जत॑ प्रेतिरिति ध॒र्म॒म॒न्वि॒तिरि॒ति दि॒वः
 स॒न्धि॒रि॒त्यन्त॑रि॒क्षं प्र॑ति॒धि॒रि॒ति पृ॒थि॒वीं वि॑ष्ट॒म्भ इति॑ वृ॒ष्टिं
 प्र॒वे॒त्य॒हर॑नु॒वेति॑ रा॒त्रि॒मु॒शि॒गिति॑ व॒सून् प्र॑के॒त इति॑ रु॒द्रान्थ्
 सु॒दी॒ति॒रि॒त्यादि॒त्यानो॑ज॒ इति॑ पि॒तृ॒स्तन्तु॑रिति प्र॒जाः पृ॑त॒ना॒षाडि॑ति
 प॒शून् रे॒वदि॒त्यो-ष॑धी॒रभि॑जि॒दसि॑ यु॒क्त॒ग्रा॒वे - [] 28

5.3.6.2

-न्द्रा॒य त्वे॑न्द्रं जि॒न्वे॒त्ये॒व द॑क्षि॒णतो॑ व॒ज्रं प॒र्यो॑ह॒दभि॑जि॒त्यै ताः प्र॒जा
 अ॒प॒प्रा॒णा अ॑सृ॒जत॑ तास्व॒धि॒पति॑रसीत्ये॒व प्रा॑णम॒दधा॑-द्यन्ते॒त्यपा॑नः
 स॒र्प इति॑ चक्षु॒र्वयो॑धा इति श्रो॒त्रं ताः प्र॒जाः प्रा॑ण॒ती॒रपा॑न॒तीः

पश्यन्तीः शृण्वतीर्न मिथुनी अभवन् तासु त्रिवृदसीत्येव
मिथुनमदधात् ताः प्रजा मिथुनी - [] 29

5.3.6.3

भवन्तीर्न प्राजायन्त ताः स॒रो॒हो॒ऽसि नीरो॒हो॒ऽसीत्येव प्रा॒ऽज्जनयत्
ताः प्रजाः प्रजाता न प्रत्यतिष्ठन् ता वसु॒को॒ऽसि वेष॒श्रिरसि
वस्य॒ष्टिरसीत्येवैषु लो॒केषु प्रत्यस्थापयद्यदाह वसु॒को॒ऽसि वेष॒श्रिरसि
वस्य॒ष्टिरसीति प्रजा ए॒व प्रजाता ए॒षु लो॒केषु प्रतिष्ठापयति
सात्मा॒ऽन्तरिक्षं () रोहति स॒प्रा॒णो॒ऽमुष्मिन् लो॒के प्रति तिष्ठत्यव्य॑र्धुकः
प्राणा॒पानाभ्यां॑ भवति य एवं वे॒द । 30

(यु॒क्त॒ग्रा॒वा - प्र॒जा मि॒थु॒न्य - न्तरि॑क्षं - द्वा॒दश॑ च) (A6)

5.3.7.1

नाक॒स॒द्भिर्वै दे॒वाः सु॒वर्गं लो॒कमा॑यन् तन्नाक॒सदां॑ नाक॒सत्त्वं
यन्नाक॒सद॑ उप॒दधा॑ति नाक॒स॒द्भिरे॒व तद्-यज॑मानः सु॒वर्गं लो॒कमे॑ति
सु॒वर्गो वै लो॒को ना॒को यस्यै॒ता उप॑धीयन्ते नास्मा अ॒कं भव॑ति
यज॑मानाय॒तनं॑ वै नाक॒सदो॒ यन्नाक॒सद॑ उप॒दधा॑त्याय॒तनमे॒व

तद्-यजमानः कुरुते पृष्ठानां वा एतत् तेजः संभृतं यन्नाकसदो
यन्नाकसद - [] 31

5.3.7.2

उपदधाति पृष्ठानामेव तेजोऽव रुन्धे पञ्चचोडा उप दधात्यप्सरस
एवैनमेता भूता अमुष्मिन् लोक उप शोरेऽथो तनूपानीरेवैता
यजमानस्य यं द्विष्यात् तमुपदधद्ध्ययायेदेताभ्य एवैनं देवताभ्य आ
वृश्चति ताजगार्तिमाच्छत्युत्तरा नाकसद्भ्य उपदधाति यथा
जायामानीय गृहेषु निषादयति तादृगेव तत् - [] 32

5.3.7.3

पश्चात् प्राचीमुत्तमामुप दधाति तस्मात् पश्चात् प्राची पत्न्यन्वास्ते
स्वयमातृण्णां च विकर्णीं चोत्तमे उप दधाति प्राणो वै
स्वयमातृण्णाऽऽयुर्विकर्णी प्राणं चैवाऽऽयुश्च प्राणानामुत्तमौ धत्ते
तस्मात् प्राणश्चाऽऽयुश्च प्राणानामुत्तमौ नान्यामुत्तरामिष्टकामुप
दध्याद्-यदन्यामुत्तरा-मिष्टका-मुपदध्यात् पशूनां - [] 33

5.3.7.4

च॒ यज॑मानस्य च॒ प्रा॒णं चाऽऽ॒युश्चा॑पि द॒ध्यात् तस्मान्ना-
न्यो॒त्तरे॑ष्टकोप॒धेया॑ स्वयमा॒तृण्णामु॑प दधात्यसौ वै स्वयमा॒तृण्णा-
ऽमू॒मेवो॑प धत्ते ऽश्चमु॑प घ्रापयति प्रा॒णमे॒वास्यां॑ दधात्यथो प्राजाप॒त्यो
वा अ॒श्वः प्र॒जाप॑तिनैवाग्निं चि॒नुते॑ स्वयमा॒तृण्णा भ॑वति
प्रा॒णाना॑मुत्सृ॒ष्ट्या अथो॑ सु॒वर्ग॑स्य लो॒कस्याऽनु॑ख्यात्या ए॒षा वै ()
दे॒वानां॑ वि॒क्रान्ति॑र्यद्-वि॒कर्णी॑ यद्-वि॒कर्णी॑मु॒पद॑धाति दे॒वाना॑मे॒व
वि॒क्रान्ति॑मनु॒ विक्र॑मत उत्तरत उप॒दधा॑ति तस्मादुत्तरत उप॒चारो॑ऽग्नि
वा॒युम॑ती भवति समि॒द्ध्यै । 34

(संभृतं यन्नाकसदो यन्नाकसद - स्तत् - पशूना - मेषा वै -
द्वाविंशतिश्च) (A7)

5.3.8.1

छन्दा॒स्युप॑ दधाति प॒शवो॑ वै छन्दा॒सि प॒शूने॒वाव॑ रुन्धे
छन्दा॒सि वै दे॒वानां॑ वा॒मं प॒शवो॑ वा॒ममे॒व प॒शून॑व रुन्ध
ए॒ता ह॑ वै य॒ज्ञसे॑न-श्रैत्रियायण-श्चि॒तिं वि॒दां च॑कार तया वै स
प॒शून॑वारुन्ध यदे॒तामु॒पद॑धाति प॒शूने॒वाव॑ रुन्धे गाय॒त्रीः पु॒रस्ता॑दुप॒

दधाति तेजो वै गायत्री तेज एव- [] 35

5.3.8.2

मुखतो धत्ते मूर्धन्वतीर्भवन्ति मूर्धानमेवैनं समानानां करोति
 त्रिष्टुभ उप दधातीन्द्रियं वै त्रिष्टुगिन्द्रियमेव मध्यतो धत्ते जगतीरुप
 दधाति जागता वै पशवः पशूनेवाव रुन्धे ऽनुष्टुभ उप दधाति प्राणा
 वा अनुष्टुप् प्राणानामुत्सृष्ट्यै बृहतीरुष्णिहाः पङ्कीरक्षरपङ्कीरिति
 विषुरूपाणि छन्दाऽस्युप दधाति विषुरूपा वै पशवः पशवः- [] 36

5.3.8.3

-छन्दाऽसि विषुरूपानेव पशूनव रुन्धे विषुरूपमस्य गृहे
 दृश्यते यस्यैता उपधीयन्ते य उ चैना एवं वेदाऽतिच्छन्दसमुप
 दधात्यतिच्छन्दा वै सर्वाणि छन्दाऽसि सर्वेभिरेवैनं छन्दोभिश्चिनुते
 वर्ष्म वा एषा छन्दसां यदतिच्छन्दा यदतिच्छन्दस-मुपदधाति
 वर्ष्मैवैनं समानानां करोति द्विपदा उप दधाति द्विपाद्-यजमानः
 () प्रतिष्ठित्यै । 37

(तेज एव - पशवः पशवो - यजमान - एकञ्च) (A8)

5.3.9.1

सर्वा॑भ्यो॒ वै दे॒वता॑भ्योऽग्नि॑श्ची॒यते॑ यत् स॒युजो॑ नोप॑दध्याद् दे॒वता॑
अस्या॒ग्निं वृ॒ज्जीर॑न् यत् स॒युज॑ उप॑दधात्यात्मनै॒वैन॑ꣳ स॒युजं॑ चिनुते
नाग्नि॑ना व्य॒ध्यते॑ऽथो यथा पु॒रुषः॑ स्ना॒वभिः॑ संत॑त ए॒वमे॒वैता॑भिर॒ग्निः
संत॑तो ऽग्नि॒ना वै दे॒वाः सु॒वर्गं॑ लो॒कमा॑यन् ता अ॒मूः कृ॑त्तिका
अभव॑न् यस्यै॒ता उप॑ धी॒यन्ते॑ सु॒वर्गमे॒व – [] 38

5.3.9.2

लो॒कमे॑ति गच्छ॑ति प्रका॒शं चि॒त्रमे॒व भ॑वति मण्ड॑लेष्ट॒का उप॑ दधाती॒मे
वै लो॒का मण्ड॑लेष्ट॒का इ॒मे खलु॑ वै लो॒का दे॒वपु॒रा दे॒वपु॒रा ए॒व
प्रवि॑शति नाऽऽ*र्ति॒माच्छ॑त्यग्निं चि॒क्या॒नो वि॒श्वज्यो॑तिष उप॑
दधाती॒माने॒वैता॑भि-लो॒कान् ज्यो॑तिष्मतः कुरु॑तेऽथो प्रा॒णाने॒वैता॑
यज॑मानस्य दा॒ध्रत्ये॒ता वै दे॒वताः॑ सु॒वर्ग्या॑स्ता ए॒वा- () -न्वा॒रभ्य॑
सु॒वर्गं लो॒कमे॑ति । 39 (सु॒वर्गमे॒व – ता ए॒व – च॒त्वारि॑ च) (A9)

5.3.10.1

वृष्टि॑सनी॒रुप॑ दधाति॑ वृष्टि॑मे॒वाव॑ रुन्धे॑ यदे॒क॒धोप॑द॒ध्यादे॑क॒मृतुं॑
वर्षे॑दनु॒परि॒हार॑ꣳ सादयति॑ तस्मा॒त् सर्वा॑नृ॒तून् वर्ष॑ति पु॒रोवा॑त॒सनि॑-
रसी॑त्या॒हैत॑द्वै वृष्ट्यै॑ रू॒पꣳ रू॒पेणै॑व वृष्टि॑मव रुन्धे॑ सँ॒यानी॑भिर्वै दे॒वा
इ॒मान् लो॒कान्त् सम॑युस्त॒त् सँ॒यानी॑नाꣳ सँ॒यानि॑त्वं य॒त्
सँ॒यानी॑रुप॒दधा॑ति यथाऽप्सु॑ ना॒वा सँ॒यात्ये॑व-[] 40

5.3.10.2

-मे॒वैता॑भि र्यज॑मान इ॒मान् लो॒कान्त् सं या॑ति प्ल॒वो वा ए॒षोऽग्ने॑र्य॒त्
सँ॒यानी॑र्य॒त् सँ॒यानी॑रुप॒दधा॑ति प्ल॒वमे॒वैत॑म॒ग्नय॑ उप॒दधा॑त्यु॒त
यस्यै॑ता॒सूप॑हि॒तास्वा॒पोऽग्नि॑ꣳ ह॒रन्त्य॑ह॒त ए॒वास्या॑-ग्निरा॑दि॒त्येष्ट॑का उप॑
दधा॑त्यादि॒त्या वा ए॒तं भू॑त्यै प्र॒तिनु॑दन्ते योऽलं॑ भू॒त्यै सन् भू॑तिं न
प्रा॒प्नो॑त्यादि॒त्या- [] 41

5.3.10.3

ए॒वैनं॑ भू॒तिं ग॑मयन्त्यसौ वा ए॒तस्याऽऽदि॑त्यो रुच॒मा द॑त्ते योऽग्निं॑
चि॒त्वा न रो॑चते यदादि॒त्येष्ट॑का उप॒दधा॑त्य॒सावे॑-वास्मि॑न्नादि॒त्यो रुचं॑

दधाति॑ यथा॒ऽसौ दे॒वाना॒ञ् रोच॑त ए॒वमे॒वैष म॒नुष्या॒णाञ् रोच॑ते
घृ॒तेष्ट॒का उप॑ दधात्येतद्वा अ॒ग्नेः प्रि॒यं धाम॑ यद्-घृ॒तं प्रि॒येणै॒वैनं॑
धा॒म्ना सम॑र्धयत्य- [] 42

5.3.10.4

-थो तेजसा॑ ऽनुपरि॒हारञ् साद॑य-त्यपरि॒वर्ग-मे॒वास्मिन् तेजो॑ दधाति
प्र॒जाप॑तिरग्निमचिनुत स यशसा॑ व्या॒र्ध्यत॑ स ए॒ता यशो॑दा अपश्यत्
ता उपा॑धत्त ताभिर्वै स यश आ॒त्मन्न॑धत्त यद्यशो॑दा उप॒दधा॑ति यश
ए॒व ताभि॑र्यजमान आ॒त्मन् ध॑त्ते पञ्चोप॑ दधाति पा॒ङ्कः पुरु॑षो
यावा॑नेव पुरु॒षस्तस्मिन्॑ यशो॑ दधाति । 43

(ए॒वं - प्रा॒प्तोत्या॑दि॒त्या - अ॑र्धयत्ये - का॒न्न प॑ञ्चा॒शच्च॑) (A10)

5.3.11.1

दे॒वासुराः सँय॑त्ता आ॒सन् क॑नीया॒ऽसो दे॒वा आ॒सन्
भूया॒ऽसोऽसुरा॑स्ते दे॒वा ए॒ता इष्ट॑का अपश्यन् ता उपा॑दधत
भूय॒स्कृ॒दसी॒त्येव॑ भूया॒ऽसोऽभव॑न् वनस्पति॑भि-रोष॑धीभि-
र्वरि॑वस्कृ॒दसी॒ती-मा॑मजयन् प्राच्य॒सीति॑ प्राचीं॑ दि॒शम॑जयन्नू॒र्ध्वा

ऽसीत्य॒मूम॑जयन्-नन्तरि॑क्षसदस्य॒न्तरि॑क्षे सी॒देत्य॒-न्तरि॑क्षमजयन् ततो॑
दे॒वा अ॒भवन् -[] 44

5.3.11.2

परा॑ऽसुरा यस्यै॒ता उप॑धीयन्ते भू॒याने॒व भव॑त्यभीमान् लो॒कान् ज॑यति
भव॑त्यात्मना॒ परा॑ऽस्य भ्रातृ॒व्यो भव॑त्यप्सुषदसि॒ श्येन॑सदसीत्याहै॒तद्वा
अ॒ग्ने रू॒पं रू॒पेणै॒वाग्नि॑मव रुन्धे पृथि॒व्यास्त्वा द्र॑विणे साद॒यामी-
त्या॒हेमा॒नेवै॒ताभि॑-लो॒कान् द्र॑विणावतः कुरु॒त आयु॑ष्या उप
दधा॑त्यायुरे॒वा- [] 45

5.3.11.3

-स्मिन् दधा॑त्यग्ने यत्ते परं॑ हन्नामेत्याहै॒तद्वा अ॒ग्नेः प्रि॒यं धाम॑
प्रि॒यमे॒वास्य॑ धामोपा॑ऽऽप्नोति तावेहि स॑ र॒भाव॒हा इत्या॑ह व्ये॒वैने॑न
परि॑ धत्ते पाञ्च॑जन्येष्वप्यै॒ध्यग्न॑ इत्याहै॒ष वा अ॒ग्निः पाञ्च॑जन्यो यः
पञ्च॑चितीक-स्तस्मा॑दे॒वमा॒हर्त॑व्या उप () दधा॑त्येतद्वा ऋ॒तूनां॑ प्रि॒यं
धाम॑ यदृ॒तव्या॑ ऋ॒तूना॑मे॒व प्रि॒यं धामा॑व रुन्धे सु॒मेक॑ इत्याह
सँव॑त्सरो वै सु॒मेकः॑ सँव॑त्सरस्यै॒व प्रि॒यं धामो॑पा॑ऽऽप्नोति । 46

(अ॒भ॒व॒ - त्रा॒यु॒रे॒व॒ - त॒व्या॒ उप॒ - षड्वि॒ंश॒तिश्च॑) (A11)

5.3.12.1

प्र॒जा॒प॒ते॒रक्ष॑य॒श्च॒यत् तत् परा॑ऽप॒तत् तद॑श्चो॒ऽभ॒वद्-यद॑श्च॒यत्
तद॑श्च॒स्याश्च॑त्वं तद्दे॒वा अ॑श्च॒मे॒धेनै॒व प्र॑त्य॒दधु॑रेष॒ वै प्र॒जा॒प॒ति॒ः सर्वं॑
करो॑ति यो॒ऽश्च॒मे॒धेन॑ यज॒ते सर्व॑ ए॒व भ॑वति॒ सर्व॑स्य॒ वा ए॒षा
प्रा॒यश्चि॑त्तिः॒ सर्व॑स्य॒ भेष॑ज॒ः सर्वं॑ वा ए॒तेन॑ पा॒प्मानं॑ दे॒वा अ॑तर॒न्नपि॑
वा ए॒तेन॑ ब्र॒ह्म॒ह॒त्याम॑तर॒न्त् सर्वं॑ पा॒प्मानं॑ - [] 47

5.3.12.2

तर॑ति॒ तर॑ति॒ ब्र॒ह्म॒ह॒त्यां यो॒ऽश्च॒मे॒धेन॑ यज॒ते य उ॑ चैनमे॒वं वे॒दोत्तरं॑ वै
तत् प्र॒जा॒प॒ते॒रक्ष॑य॒श्च॒यत् तस्मा॑द॒श्च॒स्योत्तर॑तो॒ऽव द्य॑न्ति॒ दक्षि॑णतो॒ऽन्येषां॑
प॒शूनां॑ वै॒तसः॑ क॒टो भ॑वत्य॒प्सुयो॑नि॒र्वा अ॑श्चो॒ऽप्सु॒जो वे॒तसः॑ स्व
ए॒वैनं॑ यो॒नौ प्र॑तिष्ठापयति॒ चतु॑ष्टोमः॒ स्तोमो॑ भ॒वति॑ सर॒ङ्ग वा अ॑श्च॒स्य
स॒क्थ्याऽवृ॑हत् () तद्-दे॒वाश्च॑तुष्टो॒मेनै॒व प्र॑त्य॒दधु॑र्यच्चतुष्टोमः॒ स्तोमो॑
भ॒वत्य॑श्च॒स्य सर्व॑त्वाय । 48

(सर्व॑ पा॒प्मानं॑ - म॒वृ॒हद् - द्वा॒दश॑ च) (A12)

Prasna Korvai with starting Padams of 1 to 12 Anuvaakams :-

(उ॒थ्स॒न्नय॒ज्ञ - इन्द्रा॑ग्नी - दे॒वा वा अ॑रक्ष्य॒णयास्तोमीया॑ -
अ॒ग्नेर्भा॑गो - ऽस्य॑ग्ने जा॒तान् - रश्मि॑रिति - ना॒कस॒द्भिः -
छन्दा॑ऽसि - सर्वा॑भ्यो - वृष्टि॑सनी - दे॒वासु॒राः कनीया॑ऽसः -
प्र॒जाप॑तेरक्षि - द्वाद॑श)

Korvai with starting Padams of 1, 11, 21 Series of Panchaatis :-

(उ॒थ्स॒न्नय॒ज्ञो - दे॒वा वै - यस्य॑ मु॒ख्यव॑ती - ना॒कस॒द्भिरे॑ - वै
ताभि॑र - ष्ठा॑चत्वारि॒ंशत्)

First and Last Padam of Third Prasnam of 5th Kandam

(उ॒थ्स॒न्नय॒ज्ञः - सर्व॑त्वाय)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे तृतीयः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.4 पञ्चमकाण्डे चतुर्थः प्रश्नः – इष्टकात्रयाभिधानं

5.4.1.1

दे॒वासुराः सँय॑त्ता आ॒सन् ते न व्य॑जयन्त स ए॒ता इन्द्र॑स्तनूर॒पश्य॑त्
ता उपा॑धत्त ताभि॒र्वै स तनु॑वमिन्द्रि॒यं वी॒र्य॑मात्मन्न॒धत्त ततो॑ दे॒वा
अ॒भवन् परा॑ऽसुरा यदिन्द्र॑तनूरु॒पद॑धाति तनु॑वमेव ताभि॒रिन्द्रि॒यं वी॒र्यं
य॑जमान आ॒त्मन् ध॒त्तेऽथो सेन्द्र॑मेवाग्नि॑ स॒तनुं चि॑नुते भव॒त्यात्म॑ना
परा॑ऽस्य भ्रातृ॒व्यो – [] 1

5.4.1.2

भव॑ति य॒ज्ञो दे॒वेभ्यो॑ऽपा॒क्राम॑त् तम॒वरु॑धं नाश॑क्नुवन्त ए॒ता
य॒ज्ञत॑नूर॒पश्य॑न् ता उपा॑दधत् ताभि॒र्वै ते य॒ज्ञमवा॑रुन्धत् यद्-
य॒ज्ञत॑नूरु॒पद॑धाति य॒ज्ञमे॒व ताभि॑र्य॒जमा॑नोऽव रुन्धे त्रय॑स्त्रि॑ श॒तमु॑प
द॑धाति त्रय॑स्त्रि॑ श॒द्वै दे॒वता॑ दे॒वता॑ ए॒वाव रुन्धे॑ ऽथो
सा॒त्मान॑मेवाग्नि॑ स॒तनुं चि॑नुते सा॒त्माऽमु॑ष्मिन् लो॒के – [] 2

5.4.1.3

भवति॑ य॒ एवं॑ वे॒द ज्योति॑ष्मतीरुप॑ दधाति॑ ज्योति॑रेवास्मिन्
दधात्ये॒ताभिर्वा॑ अ॒ग्निश्चितो॑ ज्वलति॑ ताभि॑रेवैन॒ꣳ समि॑न्ध उ॒भयोर॑स्मै
लो॒कयो॒ज्योति॑र्भवति॑ नक्ष॒त्रेष्ट॒का उप॑ दधात्ये॒तानि॑ वै दि॒वो ज्योती॑ꣳषि
तान्ये॒वाव रु॑न्धे सु॒कृतां॑ वा ए॒तानि॑ ज्योती॑ꣳषि यन्नक्ष॑त्राणि
तान्ये॒वाऽऽ*ज्यो॑त्यथो॒ अनू॑का॒शमे॒वैतानि॑ – [] 3

5.4.1.4

ज्योती॑ꣳषि कुरुते॑ सु॒वर्गस्य॑ लो॒कस्यानु॑ख्यात्यै यथ् सꣳस्पृ॑ष्टा
उप॒दध्याद्-वृ॑ष्ट्यै लो॒कमपि॑ दध्यादव॑र्षुकः प॒र्जन्यः॑
स्यादसꣳस्पृ॑ष्टा उप॑ दधाति॑ वृ॒ष्ट्या ए॒व लो॒कं करो॑ति व॑र्षुकः
प॒र्जन्यो॑ भवति॑ पु॒रस्ता॑दन्याः प्र॒तीची॑रुप॑ दधाति॑ पश्चा॑दन्याः
प्रा॒चीस्तस्मा॑त् प्रा॒चीनानि॑ च प्र॒तीची॑नानि॑ च नक्ष॑त्राण्या॒ वर्तन्ते॑ । 4
(भ्रातृ॑व्यो – लो॒क – ए॒वैतान्ये॑ – क॒चत्वारि॑ꣳशच्च) (A1)

5.4.2.1

ऋ॒तव्या॑ उप॑ द॒धात्यृ॒तूनां॑ क्लृ॒प्त्यै॑ द्वंद्वमु॒प द॒धाति॑ तस्मा॑द् द्व॒न्द्वमृ॒तवो॑
 ऽधृ॒तेव॑ वा ए॒षा यन्म॑ध्यमा चि॒तिरन्त॑रिक्षमिव वा ए॒षा द्वंद्व॑मन्यासु
 चि॒तीषू॑प द॒धाति॑ चत॒स्रो म॑ध्ये धृ॒त्या अन्तः॑ श्लेष॒णं वा॑ ए॒ताश्चि॒तीनां॑
 य॒दृत॑व्या य॒दृत॑व्या उप॒दधा॑ति चि॒तीनां॑ वि॒धृत्या॑ अवका॒मनू॑प
 द॒धात्ये॒षा वा अ॒ग्नेर्यो॑निः सयो॒नि -[] 5

5.4.2.2

-मे॒वाग्निं॑ चि॒नुते॑ उवाच॑ ह वि॒श्वामि॒त्रो ऽद॑दिथ् स ब्र॒ह्मणा॑ऽ*न्नं
 य॒स्यैता॑ उप॒धीयान्ते॑ य उ॒ चैना॑ एवं वे॒दद॑ति सँव॒थ्सरो॑ वा ए॒तं
 प्र॒तिष्ठा॑यै नुद॒ते यो॑ऽग्निं चि॒त्वा न प्र॑ति॒तिष्ठ॑ति पञ्च॒ पूर्वा॑श्चि॒तयो॑
 भव॑न्त्यथ॒ षष्ठीं॑ चि॒तिं चि॒नुते॑ षड्वा॒ ऋ॒तवः॑ सँव॒थ्सर॑ ऋ॒तुष्वे॒व
 सँव॒थ्सरे॑ प्र॒ति॒तिष्ठ॑त्ये॒ ता वा- [] 6

5.4.2.3

अधि॑प॒त्नीर्नामे॑ष्टका य॒स्यैता॑ उप॒धीयान्ते॑ऽधि॑प॒तिरे॒व स॑मा॒नानां॑ भव॒ति यं
 द्वि॒ष्यात् तमु॑प॒दध॑द् ध्या॒येदे॒ताभ्य॑ ए॒वैनं॑ दे॒वता॑भ्य॒ आ वृ॑श्चति

ताजगार्तिमाच्छत्यङ्गिरसः सुवर्गं लो॒कं य॒न्तो या य॒ज्ञस्य
निष्कृ॑तिरासीत् तामृषि॑भ्यः प्रत्यौ॑हन् तद्धिर॑ण्यमभवद्य-द्विर॑ण्यशल्कैः
प्रोक्ष॑ति य॒ज्ञस्य निष्कृ॑त्या अथो भेष॑जमेवास्मै॑ करोत्य - [] 7

5.4.2.4

-थो रूपेणै॒वैनं॑ सम॑र्धयत्यथो हिर॑ण्यज्योतिषै॒व सुवर्गं॑ लो॒कमे॒ति
साह॑स्रवता प्रोक्ष॑ति साह॑स्रः प्र॒जाप॑तिः प्र॒जाप॑तेराप्त्या इ॒मा मे॑ अ॒ग्न
इष्ट॑का धे॒नवः॑ स॒न्त्वित्या॑ह धे॒नूरे॒वैनाः॑ कुरु॒ते ता ए॒नं का॒मदु॒घा
अमु॒त्रामु॒ष्मिन् लो॒क उप॑ तिष्ठन्ते । 8

(सयो॑नि - मे॒ता वै - क॑रोत्ये - का॒न्नच॑त्वारि॒ंशच्च॑) (A2)

5.4.3.1

रुद्रो॑ वा ए॒ष यद॑ग्निः स ए॒तर्हि॑ जा॒तो यर्हि॑ सर्व॑श्चितः स यथा॑
व॒त्सो जा॑तः स्तनं॑ प्रे॒प्सत्ये॒वं वा॑ ए॒ष ए॒तर्हि॑ भा॒गधे॒यं प्रे॒प्सति॑
तस्मै॑ यदाहु॒तिं न जुहु॑यादध्व॒र्युं च॑ यज॑मानं च ध्या॒येच्छ॑तरु॒द्गीयं॑
जुहो॑ति भा॒गधे॒येनै॒वैनं॑ श॒मय॑ति नाऽऽ*र्ति॑माच्छत्यध्व॒र्युर्न
यज॑मानो यद् ग्रा॒म्याणां॑ प॒शूनां॑ - [] 9

5.4.3.2

पयसा जुहुयाद् ग्राम्यान् पशूञ्छुचा ऽर्पयेद्-यदारण्याना-मारण्यान्
जर्तिलयवाग्वा वा जुहुयाद् गवीधुकयवाग्वा वा न ग्राम्यान् पशून्
हिनस्ति नाऽऽरण्यानथो खल्वाहुरनाहुतिर्वै जर्तिलाश्च गवीधुकाश्चेत्य
जक्षीरेण जुहोत्याग्नेयी वा एषा यदजाऽऽहुत्यैव जुहोति न ग्राम्यान्
पशून् हिनस्ति नाऽऽरण्यानङ्गिरसः सुवर्गं लोकं यन्तो- [] 10

5.4.3.3

-ऽजायां घर्मं प्रासिञ्चन्त्सा शोचन्ती पर्णं पराऽजिहीत
सो(1)ऽर्कोऽभवत् तदर्कस्या-र्कत्वमर्कपर्णेन जुहोति सयोनित्वायोदङ्
तिष्ठन् जुहोत्येषा वै रुद्रस्य दिख् स्वायामेव दिशि रुद्रं निरवदयते
चरमायामिष्टकायां जुहोत्यन्तत एव रुद्रं निरवदयते त्रेधाविभक्तं
जुहोति त्रय इमे लोका इमानेव लोकान्त् समावद्दीर्यान् करोतीयत्यग्रे
जुहोत्य- [] 11

5.4.3.4

–थे॒यत्य॑थे॒यति॑ त्रय॑ इ॒मे लो॒का ए॒भ्य ए॒वैनं॑ लो॒केभ्यः॑ श॒मय॑ति तिस्र॑
उत्तरा॑ आ॒हुती॑र्जु॒होति॑ षट् थ्सं प॒द्यन्ते॑ षड् वा ऋ॒तव॑ ऋ॒तुभि॑रे॒वैन॑
श॒मय॑ति यदनु॑परि॒क्रामं॑ जु॒हुया॑दन्तर॒वचा॑रिण॑ रु॒द्रं कुर्या॑दथो
खल्वा॑हुः कस्यां॑ वाऽह॑ दिशि रु॒द्रः कस्यां॑ वे॒त्यनु॑परि॒क्राम॑मे॒व
होत॑व्य–म॒परि॑वर्गमे॒वैन॑ श॒मय॑त्ये –[] 12

5.4.3.5

–तावै॑ दे॒वताः॑ सु॒वर्ग्या॑या उ॒त्तमा॑स्ता यज॑मानं वा॒चय॑ति ता॒भिरे॒वैन॑
सु॒वर्गं लो॒कं ग॑मयति यं द्वि॒ष्यात् तस्य॑ सञ्चरे॑ प॒शूनां॑ न्यस्येद् यः
प्रथ॑मः प॒शुर॑भितिष्ठति स आ॒र्तिमा॑र्च्छति । 13 (प॒शूनां॑ – य॒न्तो –
ऽग्ने॑ जु॒होत्य॑ – प॒रि॒वर्गमे॒वैन॑ श॒मय॑ति – त्रि॑श॒च्च) (A3)

5.4.4.1

अ॒श्मन्नूर्ज॑मिति परि॑ षिञ्चति मा॒र्जय॑त्ये॒वैन॑मथो त॒र्पय॑त्ये॒व स ए॒नं
तृ॒प्तो ऽक्षु॑ध्य–न्न॒शोच॑–न्नमु॒ष्मिन् लो॒क उप॑ तिष्ठते तृ॒प्यति॑ प्र॒जया॑
प॒शुभि॑र्य॒ एवं वे॒द तां न॑ इ॒षमूर्जं॑ धत्त मरुतः स॒र्राणा॑ इत्या॒हान्नं॑
वा ऊ॒र्गन्नं॑ मरुतोऽन्नमे॒वाव॑ रु॒न्धे ऽश्म॑स्ते क्षु॒दमुं॑ ते शु – [] 14

5.4.4.2

-गृच्छतु॑ यं॒ द्वि॒ष्म॒ इत्या॑ह॒ यमे॒व द्वेष्टि॑ तम॒स्य क्षु॒धा च॑ शु॒चा चार्प॑यति॒
त्रिः॑ परि॒षिञ्चन्॑ पर्येति॒ त्रिवृ॑द्वा अ॒ग्निर्यावा॑नेवा-ग्निस्तस्य शुचं॑
शम॑यति त्रिः पुनः॑ पर्येति॒ षट् थ्सं॑ प॒द्यन्ते॒ षड् वा ऋ॒तव॑ ऋ॒तुभिरे॑वास्य
शुचं॑ शम॑यत्यपां॒ वा ए॒तत् पु॒ष्पं य॑द्वे॒तसोऽपा॑- [] 15

5.4.4.3

शरोऽव॑का वे॒तस॑शा॒खया॑ चाव॒काभिश्च॑ वि क॒र्ष॒त्यापो॑ वै शान्ताः
शान्ता॑भिरे॒वास्य शुचं॑ शम॑यति यो वा अ॒ग्निं चि॒तं प्र॑थमः
प॒शुर॑धि॒क्राम॑तीश्वरो॒ वै तं शु॒चा प्र॑द॒हो म॑ण्डू॒केन॑ वि॒कर्ष॑त्येष॒ वै
प॒शूना-म॑नु॒पजी॑वनी॒यो न वा ए॒ष ग्रा॒म्येषु॑ प॒शुषु॑ हि॒तो नाऽऽ*र॑ण्येषु
तमे॒व शु॒चाऽर्प॑यत्यष्टाभिर्वि क॒र्ष॒त्य- [] 16

5.4.4.4

-ष्टाक्ष॑रा गाय॒त्री गाय॑त्रौऽग्नि॒र्यावा॑-नेवाऽग्निस्तस्य शुचं॑ शम॑यति
पाव॑क॒वती॑भि॒रन्नं॑ वै पा॒वकोऽन्ने॑नै॒वास्य शुचं॑ शम॑यति मृ॒त्युर्वा
ए॒ष यद॑ग्निर्ब्र॒ह्मण॑ ए॒तद्रूपं॑ यत् कृ॒ष्णाजि॑नं॒ कार्ष्णी॑ उ॒पान॑हावुप॑

मुञ्चते॑ ब्रह्मणै॒व मृ॒त्यो॒रन्तर्द्ध॑त्ते॒ ऽन्तर्मृ॒त्योर्ध॑त्ते॒ ऽन्तर॑न्नाद्या-
दित्या॑हुर॒न्या-मु॒पमुञ्च॑ते॒ऽन्यां॒ नान्त॑ - [] 17

5.4.4.5

-रे॒व मृ॒त्योर्ध॑त्ते॒ ऽवा॒ऽन्नाद्य॑ रु॒न्धे न॑मस्ते॒ हर॑से शोचिष॒ इत्या॑ह
नम॒स्कृत्य॑ हि वसी॒या स॑मु॒पच॑रन्त्यन्यं॒ ते अ॒स्मत् त॑पन्तु हे॒तय॑
इत्या॑ह यमे॒व द्वेष्टि॑ तम॒स्य शु॒चाऽर्प॑यति पा॒वको॑ अ॒स्मभ्य॑ शि॒वो
भवे॒त्याहा॑न्नं॒ वै पा॒वको॑ऽन्नमे॒वाव रु॒न्धे द्वाभ्या॑मधि॒ क्राम॑ति
प्रति॑ष्ठित्या॒ अप॒स्यव॑तीभ्या॒ शान्त्यै॑ ॥ 18 (शु - र्वेत॑सो॒ऽपा -
म॑ष्टाभिर्वि॒ कर्ष॑ति - नान्त॑ - रे॒कान्न॑ पञ्चा॒शच्च॑) (A4)

5.4.5.1

नृष॑दे वडि॒ति व्या॑घारयति॒ पङ्क्त्या॑ऽऽ*हु॒त्या य॑ज्ञमु॒खमा॑ र॒भते
ऽक्ष॑णया॒ व्या॑घारयति॒ तस्मा॑दक्ष॒णया॑ प॒शवो॑ऽङ्गानि॒ प्रह॑रन्ति
प्रति॑ष्ठित्यै॒ यद्व॑षट्कुर्याद्-या॒तया॑मा॒ऽस्य॑ वषट्कारः॒ स्याद्य॑न्न
वषट्कुर्याद्-र॒क्षासि॑ य॒ज्ञं ह॑न्युर्वडि॒त्याह॑ प॒रोक्ष॑मे॒व वषट्॑ करोति॒

नास्य या॒तया॒मा व॒षट्का॒रो भ॒वति॒ न य॒ज्ञं र॒क्षां॑सि घ्नन्ति
हु॒तादो॒ वा अ॒न्ये दे॒वा- [] 19

5.4.5.2

अ॒हु॒तादो॒ऽन्ये ता॒नग्नि॑चिदे॒वोभ॑यान् प्रीणाति॒ ये दे॒वा दे॒वाना॑मिति॒ द॒ध्ना
म॒धुमि॑श्रेणा॒वोक्ष॑ति हु॒ताद॑श्चै॒व दे॒वान॑हु॒ताद॑श्च यज॒मानः॑ प्रीणाति॒ ते
यज॑मानं प्रीणन्ति॒ द॒ध्ने॒व हु॒तादः॑ प्रीणाति॒ म॒धुषा॑ ऽहु॒तादो॑ ग्रा॒म्यं वा
ए॒तद॒न्नं य॑द्द॒ध्या॒रण्यं म॒धु य॑द्द॒ध्ना म॒धुमि॑श्रेणा-वोक्ष॑त्यु॒भय॑स्या॒ऽव॒रु॒ध्यै
गु॒मुष्टि॑ना॒ऽवोक्ष॑ति प्राजाप॒त्यो - [] 20

5.4.5.3

वै गु॒मुष्टिः॑ स॒योनि॑त्वाय॒ द्वाभ्यां॑ प्र॒तिष्ठि॑त्या अनु॒परि॑चार-म॒वोक्ष॑त्य-
परि॒वर्ग॑मे॒वैनान्॑ प्रीणाति॒ वि वा ए॒ष प्रा॑णैः प्र॒जया॑ प॒शुभिर्ऋ॑ध्यते
यो॒ऽग्निं चि॑न्वन्न॒धिक्रा॑मति प्रा॒णदा॑ अपा॒नदा॑ इत्याह प्रा॒णाने॒वाऽऽत्म॑न्
ध॒त्ते व॒र्चो॒दा व॒रिवो॑दा इत्याह प्र॒जा वै व॒र्चः प॒शवो॑ व॒रिवः॑ प्र॒जामे॒व
प॒शूना॑त्मन् ध॒त्त इन्द्रो॑ वृ॒त्रम॑हन्तं वृ॒त्रो - [] 21

5.4.5.4

हतः षोडशभिर्भोगैरसिनाथ् स एतामग्नयेऽनीकवत आहुतिमपश्यत्
तामजुहोत् तस्याग्निरनी कवान्धस्वेन भागधेयेन प्रीतः षोडशधा
वृत्रस्य भोगानप्यदहद्-वैश्वकर्मणेन पाप्मनो निर्मुच्यत
यदग्नयेऽनीकवत आहुतिं जुहोत्यग्निरेवा-ऽस्यानीकवान्धस्वेन
भागधेयेन प्रीतः पाप्मानमपि दहति वैश्वकर्मणेन पाप्मनो निर्मुच्यते
यं कामयेत चिरं पाप्मनो - [] 22

5.4.5.5

निर्मुच्येतेत्येकैकं तस्य जुहुयाच्चिरमेव पाप्मनो निर्मुच्यते यं कामयेत
ताजक् पाप्मनो निर्मुच्येतेति सर्वाणि तस्यानुद्रुत्य जुहुयात् ताजगेव
पाप्मनो निर्मुच्यतेऽथो खलु नानैव सूक्ताभ्यां जुहोति नानैव
सूक्तयोर्वीर्यं दधात्यथो प्रतिष्ठित्यै । 23 (देवाः - प्राजापत्यो - वृत्र
- श्विरं पाप्मन - श्वत्वारि५शच्च) (A5)

5.4.6.1

उदे॑नमु॒त्तरां॑ न॒येति॑ स॒मिध॑ आ द॒धाति॑ यथा॒ जनं॑ य॒तेऽव॑सं क॒रोति॑
तादृ॑गेव तत् ति॒स्र आ द॒धाति॑ त्रि॒वृद्वा अ॒ग्निर्या॑वाने-वा॒ग्निस्त॑स्मै
भा॒गधे॑यं क॒रोत्यौ॑दु॒म्बरी-॑र्भव॒न्त्यूर्वा॑ उ॒दुम्ब॑र ऊ॒र्जमे॑वास्मा॒ अपि॑
द॒धात्यु॑दु॒ त्वा वि॒श्वे दे॒वा इ॒त्याह॑ प्रा॒णा वै वि॒श्वे दे॒वाः प्रा॒णै- [] 24

5.4.6.2

-रे॒वैन॑मु॒द्यच्छ॑ते ऽग्ने॑ भ॒रन्तु॑ चि॒त्तिभि॑रित्याह॒ यस्मा॑ ए॒वैनं॑
चि॒त्तायो॑द्यच्छ॑ते तेनै॒वैन॑ सम॒र्द्धय॑ति पञ्च दि॒शो दै॒वीर्य॑ज्ञम॒वन्तु॑
दे॒वीरि॑त्याह दि॒शो ह्येषो॑ऽनु प्र॒च्यव॑ते ऽपाम॑तिं दु॒र्मतिं॑ बा॒धमा॑ना इ॒त्याह॑
रक्ष॑साम॒पहत्यै॑ रा॒यस्पोषे॑ य॒ज्ञप॑ति-मा॒भज॑न्तीरि॒त्याह॑ प॒शवो॑ वै
रा॒यस्पोषः॑ - [] 25

5.4.6.3

प॒शूने॑वाव रु॒न्धे ष॒ड्भिर्हर॑ति ष॒ड् वा ऋ॒तव॑ ऋ॒तुभि॑रे॒वैन॑ ह॒रति॑ द्वे
प॒रिगृ॑ह्यवती भ॒वतो॑ रक्ष॑साम॒पहत्यै॑ सूर्य॑र॒श्मिर्हरि॑केशः
पु॒रस्ता॑दि॒त्याह॑ प्र॒सूत्यै॑ ततः पा॒वका॑ आ॒शिषो॑ नो जुष॑न्तामि॒त्याहान्नं॑

ॐ॑ पा॒व॒कोऽ॒न्नमे॒वाव॑ रु॒न्धे दे॒वा॒सुराः॑ सँ॒य॒त्ता आ॒सन् ते दे॒वा
ए॒त-द॒प्रति॑रथ-मप॒श्यन् तेन॑ वै ते॒ प्र॒त्य- [] 26

5.4.6.4

-सुरा॑नजयन् तद॒प्रति॑रथस्या-प्रति॒रथ॒त्वं यँ॑दप्रति॒रथं द्वि॒तीयो
हो॒ताऽन्वा॒हाप्र॒त्ये॒व तेन॑ यज॒मानो॑ भ्रातृ॒व्यान् ज॑यत्यथो
अ॒न॒भि॒जि॒तमे॒वाभि॑ जयति द॒शर्चं॑ भवति द॒शाक्ष॑रा वि॒राड् वि॒राजे॑मौ
लो॒कौ वि॒धृता॑ व॒नयो॑र्लो॒कयोर्वि॑धृत्या अथो द॒शाक्ष॑रा वि॒राडन्नं॑ वि॒राड्
वि॒राज्ये॑वान्नाद्ये प्र॒ति॒तिष्ठ॑त्यसदिव वा अ॒न्तरि॑क्षमन्तरि॒क्षमि॑वा
ऽऽ*ग्नी॑ध्रमाग्नी॒द्धे- [] 27

5.4.6.5

ऽश्मा॑नं नि दधाति सत्त्वाय द्वा॒भ्यां प्र॒तिष्ठि॑त्यै वि॒मान ए॒ष दि॒वो
म॒ध्य आ॒स्त इ॒त्याह॑ व्ये॒वैत॑या मिमी॒ते म॒ध्ये दि॒वो नि॒हितः
पृ॒श्नि॒रश्मे॑त्याहान्नं ॐ॑ पृ॒श्यन् नमे॒वाव॑ रु॒न्धे च॒त॒सृ॒भिरा पु॒च्छादे॑ति
च॒त्वा॒रि छ॒न्दाँ॒सि छ॒न्दो॑भिरेवेन्द्रं ॐ॑ वि॒श्वा अ॒वीवृ॑धन्नि॒त्याह॑
वृ॒द्धिमे॒वोपा॑वर्तते वा॒जानाँ॒ स॒त्पतिं॑ प॒ति- [] 28

5.4.6.6

–मि॒त्याहाऽन्नं॑ वै वा॒जोऽन्न॑मे॒वाव॑ रु॒न्धे सु॒म्न॒हूर्य॑ज्ञो दे॒वाꣳ आ च॑
वक्ष॑दि॒त्याह॑ प्र॒जा वै प॒शवः॑ सु॒म्नं प्र॒जामे॒व प॒शूना॑त्मन् ध॒त्ते
यक्ष॑द॒ग्निर्दे॒वो दे॒वाꣳ आ च॑ वक्ष॑दि॒त्याह॑ स्व॒गाकृ॑त्यै
वा॒जस्य॑ मा प्र॒सवे॑नोद्–ग्रा॒भेणो॑द॒ग्रभी॑दि॒त्याहा॒सौ वा आ॑दि॒त्य
उ॒द्यन्नु॑द्ग्रा॒भ एष॑ () नि॒म्रोच॑न् नि॒ग्राभो॑ ब्र॒ह्मणै॒वाऽऽ*त्मान॑मुद्–
गृ॒ह्णाति॑ ब्र॒ह्मणा॑ भ्रातृ॒व्यं नि॑ गृ॒ह्णाति॑ । 29 (प्रा॒णैः – पोषाँ॑ – प्र॒त्या –
ग॒नी॒द्धे – प॒ति – मेष॑ – द॒श च) (A6)

5.4.7.1

प्रा॒चीम॑नु प्र॒दिशं॑ प्रेहि॑ वि॒द्वानि॒त्याह॑ दे॒वलोक॑–मे॒वैतयो॑पाव॒र्तते
क्रम॑ध्वम॒ग्निना॑ नाक॑–मि॒त्याहे॑माने॒वैतया॑ लो॒कान् क्र॑मते पृ॒थिव्या॑
अ॒हमु॑द॒न्तरि॑क्ष॒मा ऽरु॑हमि॒त्याहे॑माने॒वैतया॑ लो॒कान्त् स॒मारो॑हति
सु॒वर्य॑न्तो नापे॑क्षन्त॒ इत्या॑ह सु॒वर्गमे॒वैतया॑ लो॒कमे॒त्यग्ने॑ प्रेहि॑–[] 30

5.4.7.2

प्रथ॑मो दे॒वय॑ता-मि॒त्या॒हो॒भये॑ष्वे॒वैतया॑ दे॒वमनु॑ष्येषु चक्षु॑र्दधाति
 पञ्च॑भिरधि॒ क्राम॑ति पा॒ङ्क्तो य॒ज्ञो या॑वानेव य॒ज्ञस्तेन॑ सह सु॒वर्गं
 लो॒कमे॑ति न॒क्तोषा॑सेति पु॒रोऽनु॑वाक्यामन्वाह प्र॒त्या अ॒ग्ने
 सह॑स्राक्षेत्याह सा॒हस्रः प्र॒जाप॑तिः प्र॒जाप॑तेराप्त्यै तस्मै॑ ते वि॒धेम
 वाजा॑य स्वाहेत्याहान्नं वै वाजोऽन्नमे॒वाव - [] 31

5.4.7.3

रुन्धे॑ दध्नः पूर्णा॑मौदु॒म्बरी॑ स्वयमा॒तृण्णायां॑ जुहोत्यूर्ग्वै
 दध्यूर्गु॑दु॒म्बरोऽसौ॑ स्वयमा॒तृण्णा ऽमु॒ष्यामे॒वोर्जं॑ दधाति
 तस्मा॑दमुतोऽर्वा॒चीमूर्ज॑मुप जी॒वाम॑स्ति॒सृभिः॑ सादयति त्रि॒वृद्धा
 अ॒ग्निर्या॑वानेवाग्निस्तं प्रति॒ष्ठां ग॑मयति प्रे॒द्धो अ॒ग्ने दी॑दिहि पु॒रो न
 इत्यौ॑दु॒म्बरी॑मा दधात्येषा वै सू॒र्मी क॑र्णकावत्येतया ह स्म- [] 32

5.4.7.4

वै दे॒वा असु॑राणां शत॒तर्हा॑ स्तृ॒हन्ति॑ यदे॒तया॑ समि॒धमा॑दधाति
 वज्र॑मे॒वैतच्छ॑त॒घ्नीं य॑जमानो भ्रातृ॒व्याय॑ प्रहरति स्तृ॒त्या अ॑च्छम्बट्कारं

वि॒धेम॑ ते॒ पर॒मे जन्म॑न्न॒ग्न इति॑ वैक॒ङ्क॒ती॒मा द॒धाति॑ भा ए॒वाव॑ रुन्धे
ता॒ꣳ स॒वितु॑र्वरे॒ण्यस्य॑ चि॒त्रामि॑ति शमी॒मयी॒ꣳ शान्त्या॑ अ॒ग्निर्वा॑ ह वा
अ॒ग्निचि॑तं दु॒हेऽग्नि॑चि॒द्वाऽग्निं॑ दु॒हे ता॒ꣳ - [] 33

5.4.7.5

स॒वितु॑र्वरे॒ण्यस्य॑ चि॒त्रामि॑त्याहैष वा अ॒ग्नेर्दो॑हस्त॒मस्य॑ कण्व॑ ए॒व
श्राय॑सोऽवेत् तेन॑ ह स्मै॒नꣳ स दु॒हे यदे॑तया॒ समि॑ध-मा॒दधा॑त्यग्नि॒चिदे॒व
तद॒ग्निं दु॒हे स॒प्त ते अ॒ग्ने स॒मिधः॑ स॒प्तजि॒ह्वा इत्या॑ह स॒प्तैवा॒स्य
सा॒प्तानि॑ प्रीणाति॒ पूर्ण॑या जुहोति॒ पूर्ण॑ इ॒व हि प्र॒जाप॑तिः
प्र॒जाप॑ते - [] 34

5.4.7.6

-रा॒प्त्यै न्यून॑या जुहोति॒ न्यूना॑द्धि प्र॒जाप॑तिः प्र॒जा असृ॑जत प्र॒जाना॒ꣳ
सृष्ट्या॑ अ॒ग्निर्दे॒वेभ्यो॑ नि॒लाय॑त स दि॒शोऽनु॑ प्रा॒विश॑ज्जुह्वन्म॒नसा॑
दि॒शो द्ध्या॑ये द्वि॒ग्भ्य ए॒वैन॑मव रुन्धे दध्ना पु॒रस्ता॑ज्जुहोत्या-
ज्ये॒नोप॑रि॒ष्टात् तेज॑श्चै॒वास्मा॑ इन्द्रि॒यं च॑ समी॒ची द॒धाति॑ द्वाद॑शकपालो

वै॒श्वान॒रो भ॒वति॑ द्वा॒दश॑ मा॒साः सँ॒वत्स॒रः सँ॒वत्स॒रो-ऽग्नि॑वै॒श्वान॒रः

साक्षा- [] 35

5.4.7.7

-दे॒व वै॒श्वान॒रम॑व रु॒न्धे यत् प्र॑या॒जानू॒याजान् कुर्या॑द्वि॒कस्तिः॑ सा
य॒ज्ञस्य॑ द॒र्विहो॑मं क॒रोति॑ य॒ज्ञस्य॑ प्र॒तिष्ठि॑त्यै रा॒ष्ट्रं वै वै॒श्वान॒रो
वि॒ण्मरु॑तो वै॒श्वान॒रः हु॒त्वा मा॒रुतान् जु॑होति रा॒ष्ट्र ए॒व वि॒शम॑नु
ब॒ध्नात्यु॑च्चै-वै॒श्वान॒रस्याऽऽ श्रा॑व॒यत्यु॒पाशु॑ मा॒रुतान् जु॑होति
तस्मा॑द्-रा॒ष्ट्रं वि॒शम॑ति व॒दति॑ मा॒रुता भ॑वन्ति म॒रुतो वै दे॒वानां॑ वि॒शो
दे॒ववि॒शेनै॑वास्मै म॒नुष्य॑वि॒श () -म॑व रु॒न्धे स॒प्त भ॑वन्ति स॒प्तग॑णा
वै म॒रुतो ग॑ण॒श ए॒व वि॒शम॑व रु॒न्धे ग॑णेन ग॒णम॑नु॒द्रुत्य॑ जु॒होति
वि॒शमे॑वास्मा॒ अनु॑व॒र्त्मानं॑ क॒रोति॑ । 36

(अ॒ग्ने प्रे॒ह्य - व - स्म - दु॒हे तां - प्र॒जाप॑तेः - सा॒क्षान् -
म॒नुष्य॑वि॒श - मे॒कवि॑शतिश्च (A7)

5.4.8.1

वसो॑र्धा॒रां जु॒होति॑ वसो॑र्मे॒ धारा॑ऽसदि॒ति वा ए॒षा हू॑यते॒ घृत॑स्य॒ वा
ए॒नमे॒षा धारा॑ऽमुष्मिन् लो॒के पि॒न्वमा॑नोप॒ तिष्ठ॑त आ॒ज्येन॑ जुहोति॒ तेजो॑
वा आ॒ज्यं तेजो॑ वसो॑र्धा॒रा तेज॑सैवास्मै॒ तेजो॑ऽव रुन्धे॑ऽथो॒ कामा॑ वै
वसो॑र्धा॒रा कामा॑नेवाव रुन्धे॑ यं का॒मये॑त प्रा॒णान॑स्यान्नाद्यं वि- [] 37

5.4.8.2

च्छि॑न्द्यामि॒ति वि॒ग्राहं॑ तस्य॒ जुहु॑यात् प्रा॒णाने॑वास्यान्नाद्यं वि॑च्छि॒नन्ति॑ यं
का॒मये॑त प्रा॒णान॑स्यान्नाद्यं सं त॑नुयामि॒ति सं त॑तां तस्य॒ जुहु॑यात्
प्रा॒णाने॑वास्यान्नाद्यं सं त॑नोति॒ द्वाद॑श द्वाद॑शानि जुहोति॒ द्वाद॑श
मा॒साः सँव॑त्सरः सँव॑त्सरेणै॒ वास्मा॑ अन्न॒मव रुन्धे॑ ऽन्नं च
मेऽक्षु॑च्च म॒ इत्या॑है तद् वा - [] 38

5.4.8.3

अ॒न्नस्य॑ रू॒पं रू॒पेणै॑वान्नमव रुन्धे॑ ऽग्निश्च॒ म आप॑श्च म॒ इत्या॑हैषा
वा अ॒न्नस्य॑ योनिः सयो॑न्येवान्नमव रुन्धे॑-ऽर्धेन्द्रा॑णि जुहोति॒ देवता॑
ए॒वाव रुन्धे॑ यथ् सर्वे॑षा-म॒र्धमिन्द्रः॑ प्रति॒ तस्मा॑दिन्द्रो॒ देवता॑नां

भूयिष्ठभाक्तम॑ इन्द्रमुत्तरमाहे॑-न्द्रियमेवास्मि॑-न्नुपरिष्ठाद् दधाति
यज्ञायुधानि॑ जुहोति यज्ञो - [] 39

5.4.8.4

वै यज्ञायुधानि॑ यज्ञमेवाव॑ रुन्धेऽथो॑ एतद्वै यज्ञस्य॑ रूपं॑ रूपेणैव॑
यज्ञमव॑ रुन्धे ऽवभृथश्च॑ मे स्वगाकारश्च॑ म॒ इत्याह॑ स्वगाकृत्या
अग्निश्च॑ मे घर्मश्च॑ म॒ इत्याहैतद् वै ब्रह्मवर्चसस्य॑ रूपं॑ रूपेणैव॑
ब्रह्मवर्चसमव॑ रुन्ध॒ ऋक्च॑ मे साम॑ च म॒ इत्याहै॑ - [] 40

5.4.8.5

-तद्वै छन्दसां॑ रूपं॑ रूपेणैव॑ छन्दा॑स्यव॑ रुन्धे गर्भा॑श्च मे
वथ्साश्च॑ म॒ इत्याहैतद् वै पशूनां॑ रूपं॑ रूपेणैव॑ पशूनव॑
रुन्धे कल्पान्॑ जुहोत्य॑ क्लृप्तस्य॑ क्लृप्त्यै॑ युग्मदयुजे॑ जुहोति
मिथुनत्वायौ॑-त्तरावती॑ भवतोऽभिक्रान्त्या॑ एका॑ च मे तिस्रश्च॑
म॒ इत्याह॑ देवछन्दसं॑ वा॒ एका॑ च तिस्रश्च॑ - [] 41

5.4.8.6

मनुष्यछन्दसं चतस्रश्चाष्टौ च देवछन्दसं चैव मनुष्य छन्दसश्चाव रुन्ध
 आ त्रयस्त्रिंशतो जुहोति त्रयस्त्रिंशद्वै देवता देवता एवाव रुन्ध
 आऽष्टाचत्वारिंशतो जुहोत्यष्टाचत्वारिंशदक्षरा जगती जागताः
 पशवो जगत्यैवास्मै पशूनव रुन्धे वाजश्च प्रसवश्चेति द्वादशं जुहोति
 द्वादश मासाः सँवत्सरः सँवत्सर एव प्रति तिष्ठति । 42

(वि - वै - यज्ञः - साम च म इत्याह - च तिस्र - श्रैकान्न
 पञ्चाशच्च) (A8)

5.4.9.1

अग्निर्देवेभ्यो ऽपक्रामद्-भागधेयमिच्छमानस्तं देवा अब्रुवन्नुप न
 आ वर्तस्व हव्यं नो वहेति सोऽब्रवीद्-वरं वृणौ मह्यमेव
 वाजप्रसवीयं जुहवन्निति तस्मादग्नये वाजप्रसवीयं जुह्वति यद्-
 वाजप्रसवीयं जुहोत्यग्निमेव तद्-भागधेयेन समर्धयत्यथो अभिषेक
 एवास्य स चतुर्दशभिर्जुहोति सप्त ग्राम्या ओषधयः सप्ता -[] 43

5.4.9.2

–ऽऽ॒र॒ण्या॒ उ॒भ॒यी॒षाम॑व॒रु॒द्ध्य॒ अ॒न्न॒स्या॒न्न॒स्य॒ जु॒हो॒त्य॒न्न॒स्या॒न्न॒स्या॒–
व॒रु॒द्ध्य॒ औ॒दु॒म्बरे॑ण॒ सु॒वे॒ण जु॒हो॒त्यूर्वा॑ उ॒दु॒म्बर॒ ऊ॒र्ग॒न्न॒मूर्जे॑वा॒स्मा
ऊ॒र्ज॒म॒न्न॒मव॑ रु॒न्धे ऽग्नि॑र्वै दे॒वाना॑–म॒भिषि॑क्तोऽग्नि॒चिन्–म॒नु॒ष्याणां॑
तस्मा॑द॒ग्नि॒चिद्–व॒र्ष॒ति न॒ धा॒वे॒दव॑रु॒द्ध॒ ह्य॒स्या–न्न॑म॒न्नमि॑व॒ खलु॒ वै
व॒र्षं॒ य॒द्वावे॑द॒न्नाद्–या॒द्वावे॑दु॒पाव॑र्ते॒ता–न्ना॑द्य॒मेवा॒भ्यु – [] 44

5.4.9.3

–पा॒व॒र्त॒ते न॒क्तो॒षा॒सेति॑ कृ॒ष्णायै॑ श्वे॒तव॑त्स॒यै प॒यसा॑ जु॒हो॒त्य॒हैवा॒स्मै
रा॒त्रिं प्र॑दा॒पय॑ति रा॒त्रिया॑ऽह॒रहो॑रा॒त्रे ए॒वा॒स्मै प्र॑त्ते का॒मम॑न्नाद्यं दुहा॒ते
रा॒ष्ट्रभृ॑तो जु॒होति॑ रा॒ष्ट्रमे॒वाव॑ रु॒न्धे ष॒ड्भिर्जु॑होति ष॒ड्वा ऋ॒तव॑ ऋ॒तुष्वे॒व
प्र॒ति॒तिष्ठ॑ति भु॒वन॑स्य प॒त इति॑ रथ॒मुखे॑ पञ्चाऽऽ*हु॒तीर्जु॑होति॒ वज्रो॒ वै
रथो॒ वज्रे॑णै॒व दि॒शो – [] 45

5.4.9.4

–ऽभि॑ ज॒यत्य॑ग्नि॒चित् ह॒ वा अ॒मुष्मिन्॑ लो॒के वा॒तोऽभि॑ प॒वते॑
वा॒तना॑मानि जु॒होत्य॑भ्ये॒वैन॑–म॒मुष्मिन्॑ लो॒के वा॒तः प॒वते॑ त्रीणि॑

जुहोति॑ त्रय॑ इ॒मे लो॒का ए॒भ्य ए॒व लो॒केभ्यो॑ वा॒तम॑व रुन्धे॑ स॒मुद्रो॑ऽसि
नभ॑स्वानि॒त्याहै॒तद्वै वा॒तस्य॑ रू॒पꣳ रू॒पेणै॑व वा॒तम॑व रुन्धे॑ ऽञ्ज॒लिना॑
जुहोति॑ न ह्ये॒तेषा॑मन्यथा () ऽऽहु॑तिरवकल्पते । 46

(ओष॑धयः स॒प्ता - भि॑ - दि॒शो - ऽन्य॑था - द्वे च॑) (A9)

5.4.10.1

सुव॑र्गाय॒ वै लो॒काय॑ दे॒वरथो॑ यु॒ज्यते॑ यत्रा॒कूताय॑ म॒नुष्य॑रथ ए॒ष खलु॑
वै दे॒वरथो॑ यद॒ग्निर॒ग्निं यु॑न॒ज्मि श॑वसा घृ॒तेने॑त्याह यु॒नक्त्ये॑वैनꣳ स
ए॒नं यु॑क्तः सुव॑र्गं लो॒कम॒भि वह॑ति यथ् सर्वा॒भिः पञ्च॑भि-
र्यु॒ञ्ज्याद्-यु॒क्तोऽस्या॑ऽग्निः प्र॒च्युतः॑ स्यादप्रति॒ष्ठिता॑ आहु॒तयः॑
स्युरप्रति॒ष्ठिताः॑ स्तो॒मा अप्रति॑ष्ठितान्यु॒क्थानि॑ ति॒सृभिः॑ प्रा॒तः स॒वने॑ऽभि
मृ॒शति॑ त्रि॒वृ- [] 47

5.4.10.2

-द्वा अ॒ग्निर्या॑वा॒नेवा-॒ग्निस्तं॑ यु॒नक्ति॑ यथाऽन॒सि यु॒क्त आ॑धी॒यत॑ ए॒वमे॒व
तत् प्र॒त्याहु॑तयस्तिष्ठन्ति॒ प्रति॑ स्तो॒माः प्रत्यु॑क्थानि॒ यज्ञा॑य॒ज्ञिय॑स्य स्तो॒त्रे
द्वाभ्या॑म॒भि मृ॒शत्ये॑ता॒वान् वै य॒ज्ञो या॑वा॒नग्नि॑ष्टो॒मो भू॒मा त्वा अ॒स्यात॑

ऊ॒र्ध्वः क्रि॒यते॒ यावा॑ने॒व य॒ज्ञस्त॑मन्त॒तो ऽन्वा॑रो॒हति॒ द्वाभ्यां॑ प्र॒तिष्ठि॑त्या
ए॒कया॑ऽप्र॒स्तुतं॑ भव॒त्यथा॑- [] 48

5.4.10.3

-भि मृ॒शत्यु॑पै॒नमु॑त्तरो॒ यज्ञो॑ न॒मत्य॑थो संत॒त्यै प्र॒ वा ए॒षोऽस्मा॑न्
लो॒काच्च॑य॒वते॒ योऽग्निं॑ चि॒नुते॒ न वा॑ ए॒तस्या॑निष्ट॒क आ॑हु॒तिर॑व क॒ल्पते॑
यां वा॑ ए॒षोऽनि॑ष्ट॒क आ॑हु॒तिं जु॑होति स्र॒वति॒ वै सा ता॑ स्र॒वन्तीं॑
य॒ज्ञोऽनु॑ परा भवति य॒ज्ञं य॑ज॒मानो॒ यत् पु॑नश्चि॒तिं चि॒नुत॑ आ॒हुती॑नां
प्र॒तिष्ठि॑त्यै प्र॒त्याहु॑तय॒स्तिष्ठ॑न्ति- [] 49

5.4.10.4

न य॒ज्ञः परा॑भवति न यज॒मानो॒ ऽष्टा॑वुप॒ दधा॑त्य॒ष्टाक्ष॑रा गाय॒त्री
गा॒यत्रे॑णै॒वैनं॑ छन्द॒सा चि॒नुते॒ यदे॑काद॒श त्रै॑ष्टु॒भेन॑ यद् द्वा॒दश॑
जा॒गते॑न छन्दो॒भिरे॑वैनं॑ चि॒नुते॒ नपा॑त्को॒ वैनामै॑षोऽग्नि॒र्यत् पु॑नश्चि॒तिर्य॑
ए॒वं वि॒द्वान् पु॑नश्चि॒तिं चि॒नुत॑ आ तृ॒तीया॑त् पु॒रुषा॑द॒न्नम॑त्ति
यथा॑ वै पु॒नरा॑धेय॒ एवं पु॑नश्चि॒तिर्योऽग्न्या॑धेये॒न न- [] 50

5.4.10.5

ध॒र्नो॒ति॒ स पु॒नरा॒धेय॒मा ध॒त्ते योऽग्निं॑ चि॒त्वा न॒धर्नो॒ति॒ स पु॒नश्चि॒तिं
चि॒नुते॒ यत् पु॒नश्चि॒तिं चि॒नुत॒ ऋद्ध्य॑ अथो॒ खल्वाहु॑र्न चे॒तव्ये॑ति रु॒द्रो
वा ए॒ष यद॒ग्निर्यथा॑ व्याघ्र॑ सु॒प्तं बो॒धय॑ति तादृ॒गेव॑ तदथो॒
खल्वाहु॑श्चे॒तव्ये॑ति यथा॒ वसी॑याँसं भा॒गधे॑येन बो॒धय॑ति तादृ॒गेव॑
तन्म॒नुर॒ग्निम॑चि॒नुत॒ () तेन॒ नाऽऽ*ध॒र्नो॒त्स ए॒तां पु॒नश्चि॒तिम॑पश्यत्
ताम॑चि॒नुत॒ तया॒ वै स आ॒धर्नो॒द्यत् पु॒नश्चि॒तिं चि॒नुत॒ ऋद्ध्यै॑ । 51

(त्रि॒वृ-दथ॑-तिष्ठ॑-न्त्यग्न्या॑धे॒र्येन॑ ना-चि॒नुत॑-सप्त॑दश- च) (A10)

5.4.11.1

छ॒न्दश्चि॑तं चि॒न्वीत॑ प॒शुकामः॑ प॒शवो॒ वै छ॒न्दाँसि॑ प॒शुमा॒नेव॑ भवति
श्ये॒नचि॑तं चि॒न्वीत॑ सु॒वर्ग॑कामः श्ये॒नो वै वय॑सां पतिष्ठः श्ये॒न ए॒व
भू॒त्वा सु॒वर्गं ँलो॑कं प॒तति॑ कङ्क॒चितं॑ चि॒न्वीत॑ यः का॒मये॑त
शी॒र्ष॒ण्वान॒मुष्मिन्॑ ँलो॒के स्या॑मिति शी॒र्ष॒ण्वाने॒वाऽमुष्मिन्॑ ँलो॒के
भव॑त्यलज॒चितं॑ चि॒न्वीत॑ चतुः॒ सीतं॑ प्र॒तिष्ठा॑कामश्च॒तस्रो॑ दि॒शो दि॒क्ष्वे॒व
प्र॒ति तिष्ठ॑ति प्र उ॒गचि॑तं चि॒न्वीत॑ भ्रातृ॒व्यवा॑न् प्रै- [] 52

5.4.11.2

–व भ्रातृ॑व्यान् नुद॑त उ॒भय॑तः प्र उ॒गं चिन्वी॑तयः का॒मये॑त प्रजा॒तान्
 भ्रातृ॑व्यान् नुदे॒य प्रति॑ ज॒निष्य॑मा॒णानि॒ति प्रै॒व जा॒तान् भ्रातृ॑व्यान् नुद॑ते
 प्रति॑ ज॒निष्य॑मा॒णान् रथ॑चक्र॒चितं चिन्वी॑त भ्रातृ॑व्यवा॒न् वज्रो॑ वै रथो॒
 वज्र॑मे॒व भ्रातृ॑व्येभ्यः प्र॒हर॑ति द्रो॒णचि॑तं चिन्वी॑तान्न॒कामो॑ द्रो॒णे वा
 अन्नं॑ भ्रि॒यते स॒योन्ये॑वान्न॒मव रु॒न्धे समू॑ह्यं चिन्वी॑त प॒शुकामः॑
 प॒शुमा॒ने॒व भ॒वति – [] 53

5.4.11.3

परि॒चाय्यं॑ चिन्वी॑त ग्रा॒मका॑मो ग्रा॒म्ये॒व भ॒वति श्मशान॑चितं चिन्वी॑त
 यः का॒मये॑त पि॒तृलो॒क ऋ॑ध्नु॒यामि॑ति पि॒तृलो॒क ए॒वध्नो॑ति
 विश्वा॑मि॒त्रज॑मद॒ग्नी व॑सि॒ष्ठेनाऽस्प॑र्द्धे॒ताꣳ स ए॒ता ज॑मद॒ग्निर्वि॑ह॒व्या
 अ॒पश्य॑त् ता उ॒पाध॑त्ता ताभि॒र्वै स व॑सि॒ष्ठस्ये॑न्द्रि॒यं वी॒र्य॑मवृ॒ङ्क्त यद्–
 वि॒ह॒व्या उ॒प॒दधा॑तीन्द्रि॒यमे॒व ताभि॑र्वी॒र्यं य॑ज॒मानो॑ भ्रातृ॑व्यस्य वृ॒ङ्क्ते
 होतु॑र्धि॒ष्णिय॑ उप॒ दधा॑ति यज॒माना॑य॒तनं॑ वै– [] 54

5.4.11.4

हो॒ता स्व॑ ए॒वास्मा॑ आ॒यत॑न इन्द्रि॒यं वी॑र्यमव॒ रुन्धे॑ द्वा॒दशो॑प॒ दधा॑ति
द्वा॒दशा॑क्षरा॒ जग॑ती जा॒गताः॑ प॒शवो॑ जग॒त्यैवा॑स्मै प॒शून्व॑ रुन्धे
ऽष्टा॑व॒ष्टाव॑न्येषु धि॒ष्णि॒येषूप॑ दधा॒त्यष्टा॑श॒फाः प॒शवः॑ प॒शून्वा॑व रुन्धे
षण्मा॑र्जा॒लीये॑ षड् वा ऋ॒तव॑ ऋ॒तवः॑ खलु॒ वै दे॒वाः पि॒तर॑ ऋ॒तून्व॑
दे॒वान् पि॒तृन् प्री॑णाति । 55

(प्र - भवति - यजमानायतनं वा - अष्टाचत्वारिंशच्च) (A11)

5.4.12.1

पव॑स्व वा॒जसा॑तय॒ इत्य॑नु॒ष्टुक् प्र॑तिप॒द्भव॑ति ति॒स्रोऽनु॑ष्टु॒भश्च॑त॒स्रो
गा॒यत्रि॑यो यत् ति॒स्रोऽनु॑ष्टु॒भ-स्त॑स्मा-द॒श्वस्त्रि॑भि॒स्तिष्ठ॑ स्तिष्ठति
यच्च॑त॒स्रो गा॒यत्रि॑यस्त॒स्मात् सर्वा॑ श्व॒तुरः॑ प॒दः प्र॑ति॒दध॑त् प॒लाय॑ते
प॒रमा॑ वा ए॒षा छ॒न्दसां॑ य॒दनु॑ष्टुक् प॒रम॑श्चतु॒ष्टोमः॑ स्तो॒मानां॑
प॒रम॑स्त्रि॒रात्रो॑ य॒ज्ञानां॑ प॒रमो॑ऽश्वः प॒शूनां॑ प॒रमे॑णै॒वैनं॑ प॒रम॑तां
गम॑यत्येकविंश॒मह॑र्भवति - [] 56

5.4.12.2

यस्मिन्नश्च आलभ्यते द्वादश मासाः पञ्चर्तवस्त्रय इमे लोका
 असावादित्य एकविंश एष प्रजापतिः प्राजापत्योऽश्वस्तमेव
 साक्षादृध्नोति शक्वरयः पृष्ठं भवन्त्यन्-यदन्य-च्छन्दोऽन्येन्ये वा एते
 पशव आ लभ्यन्त उतेव ग्राम्या उतेवाऽऽ*रण्या यच्छक्वरयः पृष्ठं
 भवन्त्यश्वस्य सर्वत्वाय पार्थुरश्मं ब्रह्मसामं भवति रश्मिना वा
 अश्वो - [] 57

5.4.12.3

यत ईश्वरो वा अश्वोऽयतोऽप्रतिष्ठितः परां परावतं गन्तोर्यत्
 पार्थुरश्मं ब्रह्मसामं भवत्यश्वस्य यत्यै धृत्यै संकृत्यच्छावाकसामं
 भवत्युत्सन्नयज्ञो वा एष यदश्वमेधः कस्तद्वेदेत्याहुर्द्यदि सर्वो वा
 क्रियते न वा सर्व इति यथ् संकृत्यच्छावाकसामं भवत्यश्वस्य
 सर्वत्वाय पर्याप्त्या अनन्तरायाय सर्वस्तोमोऽतिरात्र उत्तममहर्भवति
 () सर्वस्याऽऽ*प्त्यै सर्वस्य जित्यै सर्वमेव तेनाऽऽ*प्नोति
 सर्वं जयति । 58

(अ॒ह॒र्भ॒व॒ति॒ – वा अ॒श्वो – ऽह॒र्भ॒व॒ति॒ – द॒श॒ च) (A12)

Prasna Korvai with starting Padams of 1 to 12 Anuvaakams :-

(दे॒वा॒सु॒रा॒स्तेन॑ – त॒व्या॑ – रु॒द्रो – ऽ॒श्म॑ – नृ॒ष॒दे॒ व – दु॒दे॒नं –
प्रा॒ची॒मि॒ति॒ – व॒सो॒र्धा॒रा – म॒ग्नि॒र्दे॒वेभ्यः॑ – सु॒व॒र्गा॒य॒ यत्रा॑कू॒ताय॑ –
छ॒न्द॒श्चि॒तं – प॒व॒स्व – द्वा॒द॒श)

Korvai with starting Padams of 1, 11, 21 Series of Panchaatis :-

(दे॒वा॒सु॒रा – अ॒जा॒यां – वै॑ गृ॒मु॒ष्टिः – प्र॒थ॒मो दे॒व॒य॒ता॒मे – त॒द्वै
छ॒न्द॒सा – मृ॒ध्नो – त्य॒ष्टौ प॒ञ्चा॒शत्)

First and Last Padam of Fourth Prasnam of 5th Kandam

(दे॒वा॒सु॒राः – सर्वं॑ ज॒य॒ति॒)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे चतुर्थः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.5 पञ्चमकाण्डे पञ्चमः प्रश्नः – वायव्यपश्चाद्यानं निरूपणं

5.5.1.1

यदेकेन स७ स्थापयति यज्ञस्य संतत्या अविच्छेदायैन्द्राः पशवो
ये मुष्करा यदैन्द्राः सन्तोऽग्निभ्य आ लभ्यन्ते देवताभ्यः समदं
दधात्याग्नेयीस्त्रिष्टुभो याज्यानुवाक्याः कुर्याद्-यदाग्नेयीस्तेनाऽऽग्नेया
यत् त्रिष्टुभस्तेनैन्द्राः समृद्ध्यै न देवताभ्यः समदं दधाति वायवे
नियुत्वते तूपरमा लभते तेजोऽग्नेर्वायुस्तेजस एष आ लभ्यते
तस्माद्-यद्रियङ् वायु- [] 1

5.5.1.2

-वार्ति तद्रियङ्-ग्निर्दहति स्वमेव तत् तेजोऽन्वेति यन्न नियुत्वते
स्यादुन्माद्येद्-यजमानो नियुत्वते भवति यजमानस्याऽनुन्मादाय
वायुमती श्वेतवती याज्यानुवाक्ये भवतः सतेजस्त्वाय हिरण्यगर्भः
समवर्तताग्र इत्याधारमा धारयति प्रजापतिर्वै हिरण्यगर्भः

प्र॒जाप॑तेरनु॒रूप॑त्वाय॒ सर्वा॑णि॒ वा ए॒ष रू॒पाणि॑ प॒शूनां॑ प्र॒त्या ल॑भ्यते
यच्छ॑म॒श्रुण॑स्तत्- [] 2

5.5.1.3

पुरु॑षाणां रूपं॑ यत् तू॒पर॑स्तद॒श्वा॒नां य॑दन्यतो॒दन् तद्-ग॒वां
य॑दव्या इ॒व श॑फास्तद॒वी॒नां य॑दजस्तद॒जा॒नां वा॒युर्वै॑ प॒शूनां॑ प्रि॒यं
धा॒म यद्-वा॒यव्यो॑ भवत्ये॒तमे॒वैन॑म॒भि सं॑जा॒नानाः॑ प॒शव॑ उप॒ तिष्ठ॑न्ते
वा॒यव्यः॑ का॒र्या(३):॑ प्रा॒जाप॑त्या(३) इत्याहु-र्यद्-वा॒यव्यं॑ कुर्यात्
प्र॒जाप॑तेरि॒याद्य॑त् प्रा॒जाप॑त्यं कुर्याद्-वा॒यो - [] 3

5.5.1.4

-रि॒याद्-यद्-वा॒यव्यः॑ प॒शुर्भव॑ति तेन॒ वा॒योर्नै॒ति यत् प्रा॑जाप॒त्यः
पु॒रोडा॑शो भवति तेन॒ प्रा॒जाप॑तेर्नै॒ति यद् द्वा॑दशक॒पाल॑स्तेन॒
वै॒श्वान॑रान्नैत्या॒ग्ना वै॒ष्णव॑मेकादशक॒पालं॑ निर्व॒पति॑ दी॒क्षिष्य॑माणोऽग्निः
सर्वा॑ दे॒वता॑ विष्णु॒र्यज्ञो॑ दे॒वता॑श्चै॒व य॒ज्ञं चाऽऽ* र॑भतेऽग्निर॒वमो॑
दे॒वता॑नां विष्णुः॒ पर॑मो यदा॒ग्ना-वै॒ष्णव॑-मेकादशक॒पालं॑ निर्व॒पति॑
दे॒वता॑ - [] 4

5.5.1.5

ए॒वो॒भ॒यतः॑ प॒रि॒गृ॒ह्य य॒ज॒मा॒नोऽव॑ रु॒न्धे पु॒रो॒डा॒शेन॑ वै दे॒वा अ॒मु॒ष्मिन्
 लो॒क आ॒र्धु॒वन् च॒रु॒णाऽस्मिन्॑ यः का॒मये॑ताऽमु॒ष्मिन् लो॒क ऋ॒ध्नु॒यामि॑ति
 स पु॒रो॒डा॒शं कु॒र्वी॒ताऽमु॒ष्मिन्ने॒व लो॒क ऋ॒ध्नो॑ति यद॒ष्टाक॑पा॒लस्तेना॑ऽऽ*ग्ने॒यो
 यत् त्रि॒कपा॑लस्तेन वै॒ष्णवः॑ स॒मृद्ध्यै॑ यः का॒मये॑तास्मिन् लो॒क
 ऋ॒ध्नु॒यामि॑ति स च॒रुं कु॒र्वी॒ताग्ने॑र्धृतं वि॒ष्णोस्त॑ण्डु॒ला-स्तस्मा॑- [] 5

5.5.1.6

-च॒रुः का॒र्योऽस्मिन्ने॒व लो॒क ऋ॒ध्नो॑त्यादि॒त्यो भ॑वती यं वा
 अदि॒तिर॒स्यामे॒व प्र॒ति ति॑ष्ठत्यथो अ॒स्यामे॒वाधि॑ य॒ज्ञं त॑नुते यो वै
 सँव॒त्स॒रमु॒ख्य-म॑भृ॒त्वाऽग्निं॑ चि॒नुते॑ यथा सा॒मि ग॒र्भोऽव॑पद्यते तादृ॒गे॒व
 तदा॒र्ति॒माच्छे॑द्-वै॒श्वान॑रं द्वा॒दश॑कपा॒लं पु॒रस्ता॑न्निर्व॒पेत् सँव॒त्स॒रो वा
 अ॒ग्निर्वै॑श्वान॒रो यथा॑ सं॒वत्स॑रमाप्त्वा - [] 6

5.5.1.7

का॒ल आ॑गते वि॒जाय॑त ए॒वमे॒व सँव॒त्स॒रमा॑प्त्वा का॒ल आ॑गतेऽग्निं
 चि॒नुते॑ नाऽऽ*र्ति॒माच्छे॑त्येषा वा अ॒ग्नेः प्रि॒या त॒नूर्य॑द्-वै॒श्वान॑रः

प्रि॒यामे॒वास्य॑ त॒नु॒व॒म॒व रु॒न्धे त्री॒ण्ये॒तानि॑ ह॒वी॒षि॑ भवन्ति त्रय इ॒मे
लो॒का ए॒षां लो॒काना॑ रोहाय । 7

(य॒द्रिय॑ङ् वा॒यु - र्य॑च्छ॒मश्रु॑णस्तद् - वा॒यो - निर्व॑पति दे॒वता -
स्तस्मा॑ - दा॒प्त्वा - षा॒त्रि॒श॒च्च) (A1)

5.5.2.1

प्र॒जाप॑तिः प्र॒जाः सृ॑ष्ट्वा प्रे॒णाऽनु॑ प्रावि॑शत् ताभ्यः पुनः संभ॑वितुं
नाश॑क्नोथ् सोऽब्र॑वीदृ॒ध्नव॑दिथ् स यो मे॒तः पुनः॑ संचि॒नव॑दिति तं
दे॒वाः सम॑चि॒न्वन् ततो॑ वै त आ॑र्ध्नु॒वन् यथ् सम॑चि॒न्वन् तच्चि॑त्यस्य
चि॒त्यत्वं य॑ एवं वि॒द्वान॒ग्निं चि॑नुत ऋ॒ध्नो॒त्येव॑ कस्मै॒ कम॑ग्निश्ची॒यत
इ॒त्याहु॑र॒ग्निवा॑ - [] 8

5.5.2.2

-न॑सानीति वा अ॒ग्निश्ची॑यते ऽग्नि॒वाने॒व भ॑वति कस्मै॒ कम॑ग्निश्ची॒यत
इ॒त्याहु॑र्दे॒वा मा वेद॑न्निति वा अ॒ग्निश्ची॑यते वि॒दुरे॑नं दे॒वाः कस्मै॒
कम॑ग्निश्ची॒यत इ॒त्याहु॑र्गृ॒ह्यसा॑नीति वा अ॒ग्निश्ची॑यते गृ॒ह्ये॒व भ॑वति
कस्मै॒ कम॑ग्निश्ची॒यत इ॒त्याहुः॑ प॒शुमा॑न॒सानी॑ति वा अ॒ग्नि- [] 9

5.5.2.3

–श्रीयते पशुमानेव भवति कस्मै कमग्निश्रीयत इत्याहुः सप्त मा
पुरुषा उप जीवानिति वा अग्निश्रीयते त्रयः प्राञ्चस्त्रयः प्रत्यञ्च
आत्मा सप्तम एतावन्त एवैनममुष्मिन् लोक उप जीवन्ति
प्रजापतिरग्निमचिकीषत तं पृथिव्यब्रवीन्न मय्यग्निं चेष्ट्यसेऽति मा
धक्ष्यति सा त्वाऽतिदह्यमाना वि धविष्ये – [] 10

5.5.2.4

स पापीयान् भविष्यसीति सोऽब्रवीत् तथा वा अहं करिष्यामि यथा
त्वा नातिधक्ष्यतीति स इमामभ्यमृशत् प्रजापतिस्त्वा सादयतु तया
देवतयाऽङ्गिरस्वद् ध्रुवा सीदेतीमामेवेष्टकां कृत्वोपा-धत्ता-नतिदाहाय
यत् प्रत्यग्निं चिन्वीत तदभि मृशेत् प्रजापतिस्त्वा सादयतु तया
देवतयाऽङ्गिरस्वद् ध्रुवा सीदे- [] 11

5.5.2.5

–तीमामेवेष्टकां कृत्वोप धत्तेऽनतिदाहाय प्रजापतिरकामयत
प्रजायेयेति स एतमुख्यमपश्यत् तं सँवत्सरमबिभस्ततो वै स

प्राजायत॑ तस्मा॑त् सँव॑त्सरं॑ भा॒र्यः॑ प्रै॒व जा॑यते॒ तं वँ॑सवोऽब्रु॒वन् प्र॑
त्वम॑जनि॒ष्ठा व॒यं प्र॑जायाम॒हा इति॑ तं वँ॑सुभ्यः॒ प्राय॑च्छत् तं
त्री॒ण्यहा॑न्य॒बिभ॑रुस्तेन॒ – [] 12

5.5.2.6

त्री॒णि च॑ श॒तान्य॑सृजन्त॒ त्रय॑स्त्रिंश॒तं च॑ तस्मा॑त् त्र्य॒हं भा॒र्यः॑ प्रै॒व
जा॑यते॒ तान् रु॒द्रा अब्रु॑वन् प्र॒ यूय॑मजनि॒द्वं वँ॑यं प्र॑जायाम॒हा इति॑
तं रु॒द्रेभ्यः॑ प्राय॑च्छन् तं षड॑हान्य॒बिभ॑रुस्तेन॒ त्री॒णि च॑
श॒तान्य॑सृजन्त॒ त्रय॑स्त्रिंश॒तं च॑ तस्मा॑त् षड॒हं भा॒र्यः॑ प्रै॒व जा॑यते
ताना॑दित्या॒ अब्रु॑वन् प्र॒ यूय॑मजनि॒द्वं वँ॑यं – [] 13

5.5.2.7

प्र॒ जा॑याम॒हा इति॑ तमा॑दित्येभ्यः॒ प्राय॑च्छन् तं द्वा॒दशा॑हान्य॒बिभ॑रुस्तेन॒
त्री॒णि च॑ श॒तान्य॑सृजन्त॒ त्रय॑स्त्रिंश॒तं च॑ तस्मा॑द् द्वा॒दशा॑हं भा॒र्यः॑
प्रै॒व जा॑यते तेन॒ वै ते॑ स॒हस्र॑मसृजन्तो॒खा सह॑स्रत॒मीं यँ॑
ए॒वमु॒ख्यं सा॒हस्रं॑ वँ॒वेद॑ प्र॒ सह॑स्रं प॒शूना॑प्नोति । 14

(अ॒ग्नि॒वान् - प॒शु॒मा॒न॒सा॒नी॒ति॒ वा अ॒ग्नि - र्द्ध॒वि॒ष्ये - मृ॒शे॒त्
प्र॒जा॒प॒ति॒स्त्वा सा॒द॒य॒तु॒ तया॑ दे॒व॒त॒याऽङ्गि॒र॒स्व ध्रु॒वा सी॒द - ते॒न -
ता॒ना॒दि॒त्या अ॒ब्रु॒वन् प्र॒यू॒य॒म॒ज॒नि॒द्वं वँ॒यं - च॒त्वा॒रि॒श॒च्च) (A2)

5.5.3.1

य॒जु॒षा वा ए॒षा क्रि॒यते॑ य॒जु॒षा प॒च्यते॑ य॒जु॒षा वि मु॒च्यते॑ यदु॒खा सा
वा ए॒षै॒तर्हि॑ या॒त॒या॒म्नी सा न पुनः॑ प्र॒यु॒ज्ये॒त्याहु॑र॒ग्ने यु॒क्ष्वा हि ये
तव॑ यु॒क्ष्वा हि दे॒व॒हू॒त॒मा॒ इत्यु॒खायां॑ जु॒होति॑ ते॒नै॒वैनां॑ पुनः॑ प्र॒यु॒ङ्क्ते
ते॒ना॒या॒त॒या॒म्नी यो वा अ॒ग्निं यो॒ग आ॒गते॑ यु॒नक्ति॑ यु॒ङ्क्ते
यु॒ज्जाने॑ष्व॒ग्ने - [] 15

5.5.3.2

यु॒क्ष्वा हि ये तव॑ यु॒क्ष्वा हि दे॒व॒हू॒त॒मा॒ इत्या॒हैष॑ वा
अ॒ग्ने॒र्यो॒गस्ते॒नै॒वैनं॑ यु॒नक्ति॑ यु॒ङ्क्ते यु॒ज्जाने॑षु ब्र॒ह्म॒वा॒दि॒नो वद॑न्ति
न्य॒ङ्कु॒ग्निश्चे॒त॒व्या(३) उ॒त्ता॒ना(३) इति॑ व॒यसां॑ वा ए॒ष प्र॒ति॒म॒या ची॒यते॑
यद॒ग्नि॒र्य॒न्यञ्चं॑ चि॒नु॒यात् पृ॒ष्टि॒त ए॒न॒माहु॑त॒य ऋ॒च्छे॒यु॒र्यदु॒त्ता॒नं न
प॒ति॒तु॒ शक्नु॑या॒दसु॒व॒र्ग्योऽस्य॑ स्यात् प्रा॒ची॒न॒मु॒त्ता॒नं - [] 16

5.5.3.3

पुरु॑षशीर्॒षमु॑प॒ दधा॑ति॒ मुख॑त॒ ए॒वैन॑माहु॒तय॑ ऋ॒च्छन्ति॑ नो॒त्तानं॑ चि॒नुते॑
 सु॒वर्ग्यो॑ऽस्य॒ भव॑ति॒ सौर्या॑ जु॒होति॑ चक्षु॒रेवास्मिन्॑ प्र॒ति दधा॑ति
 द्वि॒र्जुहो॑ति॒ द्वे हि॑ चक्षु॒षी॒ समा॒न्या जु॑होति॒ समा॒नं हि॑ चक्षुः
 समृ॑द्ध्यै दे॒वासुराः॑ सँय॑त्ता आ॒सन् ते॒ वामं॑ व॒सु सं न्य॑दधत॒ तद्दे॒वा
 वाम॑भृताऽवृ॒ज्जत॑ तद्वा॒मभृ॑तो॒ वाम॑भृ॒त्त्वं य॑द्वा॒मभृ॑त () मु॒पदधा॑ति
 वाम॑मे॒व तया॑ व॒सु यज॑मानो॒ भ्रातृ॑व्यस्य॒ वृद्धे॑ हिर॒ण्यमू॒र्ध्नी भव॑ति
 ज्योति॑र्वै हिर॒ण्यं ज्योति॑र्वा॒मं ज्योति॑षै॒वास्य॑ ज्योति॑र्वा॒मं वृ॑द्धे
 द्वि॒यजु॑र्भवति॒ प्रति॑ष्ठित्यै । 17 (यु॒ज्जाने॑ष्वग्ने॑ - प्रा॒चीन॑मु॒त्तानं॑ -
 वाम॑भृ॒तं - चतु॑र्विं॒शति॑श्च) (A3)

5.5.4.1

आपो॑ वरु॒णस्य॑ प॒त्नय॑ आ॒सन् ता॒ अ॒ग्निर॑भ्य॒ध्याय॑त् ताः॒ सम॑भवत्
 तस्य॑ रे॒तः प॒राऽप॑तत् तदि॒यम॑भवद्यद् द्वि॒तीयं॑ प॒राऽप॑तत्
 तद॒साव॑भवदि॒यं वै वि॒राड॒सौ स्व॒राड् यद्-वि॒राजा॑वु॒पदधा॑ती॒मे ए॒वोप॑

धत्ते॑ यद्वा॑ अ॒सौ॑ रे॒तः॑ सि॒ञ्चति॑ तद॒स्यां॑ प्र॒ति ति॑ष्ठति॒ तत् प्र॑ जा॒यते॑ ता
ओष॑धयो – [] 18

5.5.4.2

वी॒रु॒धो भ॑वन्ति॒ ता अ॒ग्निर॑त्ति॒ य ए॒वं वै॒द प्रै॑व जा॒यते॑ऽन्ना॒दो भ॑वति॒
यो रे॒तस्वी॑ स्यात् प्र॒थमा॑यां तस्य॒ चित्या॑मु॒भे उप॑ द॒द्ध्यादि॑मे॒ एवा॑स्मै
समी॑ची रे॒तः सि॒ञ्चतो॑ यः सि॒क्तेरे॑ताः स्यात् प्र॒थमा॑यां तस्य॒
चित्या॑म॒न्यामु॑प द॒द्ध्यादु॑त्तमा॒याम॒न्याञ् रे॒त ए॒वास्य॑
सि॒क्तमा॑भ्यामु॒भय॑तः परि॑ गृह्णाति सँव॒त्सरं॑ न क – [] 19

5.5.4.3

ञ्च॒न प्र॒त्यव॑रोहे॒न्न ही॑मे कञ्च॒न प्र॒त्यव॑रोह॒तस्त॑दे॒नयो॑र्व॒तं
ँयो॑ वा अ॒प शी॑र्षाणम॒ग्निं चि॑नुतेऽप॒शीर्षा॑ऽमु॒ष्मिन् लो॑के भ॒वति॑
यः स॒शीर्षा॑णं चि॑नुते स॒शीर्षा॑ ऽमु॒ष्मिन् लो॑के भ॒वति॑ चि॒त्तिं
जु॒होमि॑ मन॒सा घृ॑तेन॒ यथा॑ दे॒वा इ॒हाऽऽग॑मन् वी॒तिहो॑त्रा ऋ॒तावृ॑धः
समु॒द्रस्य॑ व॒युन॑स्य॒ प॒त्मन् जु॒होमि॑ वि॒श्वक॑र्मणे॒ विश्वा॑ऽहाऽम॒र्त्यञ्
ह॒विरि॑ति॒ स्वय॑मातृ॒ण्णामु॑प॒धाय॑ जुहोत्ये – [] 20

5.5.4.4

तद्वा अग्नेः शिरः सशीर्षाणमेवाग्निं चिनुते सशीर्षाऽमुष्मिन्
 लोके भवति य एवं वेद सुवर्गाय वा एष लोकाय चीयते
 यदग्निस्तस्य यदयथापूर्वं क्रियतेऽसुवर्ग्यमस्य तथ्
 सुवर्ग्योऽग्निश्चितिमुपधायाभि मृशेच्चित्तिमचित्तिं चिनवद्वि विद्वान्
 पृष्ठेव वीता वृजिना च मर्तान् राये च नः स्वपत्याय () देव दितिं
 च रास्वा-दितिमुरुष्येति यथापूर्वमेवैनमुप धत्ते प्राञ्चमेनं चिनुते
 सुवर्ग्योऽस्य भवति । 21

(ओषधयः - कं - जुहोति - स्वपत्याया - षादश च) (A4)

5.5.5.1

विश्वकर्मा दिशां पतिः स नः पशून् पातु सौऽस्मान् पातु तस्मै नमः
 प्रजापती रुद्रो वरुणोऽग्निर्दिशां पतिः स नः पशून् पातु सौऽस्मान्
 पातु तस्मै नम एता वै देवता एतेषां पशूना-मधिपतय-स्ताभ्यो वा
 एष आ वृश्च्यते यः पशुशीर्षाण्युप दधाति हिरण्येष्टका उप
 दधात्येताभ्य एव देवताभ्यो नमस्करोति ब्रह्मवादिनो - [] 22

5.5.5.2

वदन्त्य॒ग्नौ॒ ग्रा॒म्यान् प॒शून् प्र॒ दधा॑ति शु॒चाऽऽर॑ण्यान्॒र्पय॑ति किं॒ तत॒
उच्छि॑ष॒तीति॒ यद्वि॑रण्येष्ट॒का उप॑दधात्य॒मृतं॑ वै॒ हिर॑ण्यम॒मृते॑ नैव
ग्रा॒म्येभ्यः॑ प॒शुभ्यो॑ भेष॒जं करो॑ति नै॒नान् हि॒नस्ति॑ प्रा॒णो वै प्र॑थ॒मा
स्व॒यमा॑तृ॒ण्णा व्या॒नो द्वि॑तीयाऽपान॒स्तृतीयाऽनु॑ प्राऽण्यात् प्रथ॒मा
स्व॒यमा॑तृ॒ण्णामु॑प॒धाय॑ प्रा॒णेनै॒व प्रा॒णं सम॑र्धयति॒ व्यन्या॑द् – [] 23

5.5.5.3

द्वि॒तीया॑मु॒पधाय॑ व्या॒नेनै॒व व्या॒नं सम॑र्धयत्य॒पान् या॑तृतीया॑मु॒पधाया॑ –
पा॒नेनै॒वापा॑नं॒ सम॑र्धयत्यथो॒ प्रा॒णैरे॒वैनं॑ समि॒न्धे भू॑र्भुवः सु॒वरि॑ति
स्व॒यमा॑तृ॒ण्णा उप॑ दधाती॒मे वै लो॒काः स्व॒यमा॑तृ॒ण्णा ए॒ताभिः॑ खलु॒वै
व्या॑हृतीभिः प्र॒जाप॑तिः प्राऽजायत॒ यदे॒ताभिर्व्या॑हृतीभिः स्व॒यमा॑तृ॒ण्णा
उप॑दधाती॒माने॒व लो॒कानु॑प॒धायै॑षु – [] 24

5.5.5.4

लो॒केष्व॑धि प्र॒जाय॑ते प्रा॒णाय॑ व्या॒नाया॑पानाय॒ वाचे॑ त्वा चक्षु॑षे
त्वा तया॑ दे॒वत॑याऽङ्गि॒रस्व॑द् ध्रु॒वा सी॑दाग्निना॒ वै दे॒वाः सु॒वर्गं॑

लोकमजिगा॑स्सन् तेन॒ पति॑तुं नाश॑क्नुवन् त ए॒ताश्च॑तस्रः
स्वयमा॑तृण्णा अप॑श्यन् ता दि॒क्षूप॑दधत तेन॒ सर्व॑तश्चक्षुषा सु॒वर्गं
लोकमा॑यन् यच्च॑तस्रः स्वयमा॑तृण्णा दि॒क्षूप॑दधाति सर्व॑तश्चक्षुषैव
तद॒ग्निना॑ यज॑मानः () सु॒वर्गं लोक॑मेति । 25

(ब्रह्म॑वादि॒नो - व्य॑न्या - दे॒षु - यज॑मान - स्त्री॑णि च) (A5)

5.5.6.1

अ॒ग्न आ या॑हि वी॒तय॑ इत्याहा-ह्व॑तैवैन-म॒ग्निं दू॒तं वृ॑णीमह इत्याह
हू॒त्वैवैनं॑ वृ॑णीते ऽग्नि॒नाऽग्निः॑ समि॒ध्यत॑ इत्याह समि॒न्ध ए॒वैन॑म॒ग्निर्वृ॑त्राणि
जङ्घ॑नदित्याह समि॒द्ध ए॒वास्मि॑न्निन्द्रि॒यं द॑धात्यग्नेः स्तो॒मं म॑नामह इत्याह
मनु॑त ए॒वैन॑मे॒तानि॑ वा अ॒ह्ना॑ रू॒पाण्य॑- [] 26

5.5.6.2

-न्व॒हमे॒वैनं॑ चि॒नुते॑ ऽवा॒ह्ना॑ रू॒पाणि॑ रुन्धे ब्रह्म॑वादि॒नो व॑दन्ति
कस्मा॑त् स॒त्याद्या॑तया॒म्नीर॑न्या इष्ट॒का अ॑यातया॒म्नी लो॒कं पृ॑णेत्यैन्द्रा॒ग्नी
हि बा॑र्हस्प॒त्येति॑ ब्रूयादिन्द्रा॒ग्नी च॑ हि दे॒वानां॑ बृह॒स्पति॑श्चा-या॑तयामानो
ऽनु॑चरवती भव॒त्यजा॑मित्वाया -नु॒ष्टुभा॑ऽनु चर॒त्यात्मा॑ वै लो॒कं पृ॑णा

प्रा॒णो ऽनु॒ष्टुप् तस्मा॑त् प्रा॒णः सर्वा॑ण्यङ्गान्यनु॑ चरति॒ ता अस्य॑
सू॒द॒दो॒ह॒स - [] 27

5.5.6.3

इत्या॑ह तस्मा॑त् परु॑षिपरु॑षि रसः॑ सोम॑ श्री॑णन्ति पृ॑श्नय इत्या॑हान्नं
वै पृ॑श्न्यन्नमे॒वाव रु॒न्धेऽर्को॑ वा अ॒ग्निरर्को॑ऽन्नमन्नमे॒वाव रु॒न्धे जन्म॑न्
दे॒वानां॑ वि॒शस्त्रि॑ष्वा रो॒चने॑ दि॒व इत्या॑हे॒माने॑वास्मै॒ लोकान्॑
ज्योति॑ष्मतः करोति॒ यो वा इ॒ष्टकानां॑ प्रति॒ष्ठां वैद॑ प्रत्ये॒व तिष्ठति॑ तया॑
() दे॒वतया॑ऽङ्गिर॒स्वद् ध्रु॒वा सी॒देत्या॑है॒षा वा इ॒ष्टकानां॑ प्रति॒ष्ठा य एवं॑
वैद॑ प्रत्ये॒व तिष्ठति॑ । 28

(रूपा॑णि - सू॒द॒दो॒ह॒स - स्तया॑ - षोड॑श च) (A6)

5.5.7.1

सु॒वर्गाय॑ वा ए॒ष लो॒काय॑ ची॒यते॑ यद॒ग्निर्वज्र॑ ए॒काद॒शिनी॑
यद॒ग्नावे॒काद॒शिनीं॑ मि॒नुयाद्-वज्रे॑णै॒नः सु॒वर्गाल्लो॒कादन्त॑र्द॒ध्याद्यन्न॑
मि॒नुया॑त् स्वरु॒भिः प॒शून् व्य॑र्धयेदे॒कयू॑पं मि॒नोति॑ नै॒नं वज्रे॑ण
सु॒वर्गाल्लो॒कादन्त॑र्दधाति॒ न स्वरु॒भिः प॒शून् व्य॑र्धयति॒ वि वा ए॒ष

इन्द्रियेण वीर्येण धर्यते योऽग्निं चिन्व-न्नधिक्रामत्यैन्द्रिय- [] 29

5.5.7.2

-र्चा ऽऽक्रमणं प्रतीष्टकामुप दध्यान्नेन्द्रियेण वीर्येण व्यृध्यते रुद्रो वा
एष यदग्निस्तस्य तिस्रः शरव्याः प्रतीची तिरश्च्यनूची ताभ्यो वा
एष आ वृश्च्यते योऽग्निं चिनुते ऽग्निं चित्वा तिसृधन्वमयाचितं
ब्राह्मणाय दद्यात् ताभ्य एव नमस्करोत्यथो ताभ्य एवाऽऽत्मानं
निष्क्रीणीते यत्ते रुद्र पुरो - [] 30

5.5.7.3

धनुस्तद्-वातो अनु वातु ते तस्मै ते रुद्र सँवथ्सरेण नमस्करोमि
यत्ते रुद्र दक्षिणा धनुस्तद्-वातो अनु वातु ते तस्मै ते रुद्र
परिवथ्सरेण नमस्करोमि यत्ते रुद्र पश्चाद्धनुस्तद्-वातो अनु वातु ते
तस्मै ते रुद्रेदावथ्सरेण नमस्करोमि यत्ते रुद्रोत्तराद्धनुस्त - [] 31

5.5.7.4

द्वातो अनु वातु ते तस्मै ते रुद्रेदुवथ्सरेण नमस्करोमि यत्ते रुद्रोपरि
धनुस्तद्-वातो अनु वातु ते तस्मै ते रुद्र वथ्सरेण नमस्करोमि रुद्रो

वा ए॒ष यद॒ग्निः स यथा॑ व्याघ्रः कु॒ब्धस्तिष्ठ॑त्ये॒वं वा ए॒ष एत॑र्हि
सञ्चित॑मे॒तैरुप॑ तिष्ठते नमस्कारैरे॒वैन॑ श॒मय॑ति ये॒ऽग्ने॑यः—[] 32

5.5.7.5

पुरी॑ष्याः प्र॒विष्टाः पृ॒थिवी॑मनु । तेषां॑ त्वम॑स्युत्तमः प्र॒णो जी॒वात॑वे सुव ।
आपं॑ त्वा॒ग्ने मन॑सा ऽऽपं॑ त्वा॒ग्ने तप॑सा ऽऽपं॑ त्वा॒ग्ने दी॒क्षया॑ ऽऽपं॑
त्वा॒ग्ने उप॑स॒द्भिरा॑पं॒ त्वा॒ग्ने सु॒त्यया॑ऽऽपं॑ त्वा॒ग्ने दक्षि॑णा॒भिरा॑पं॒
त्वा॒ग्ने ऽव॑भृ॒थेना॑पं॒ त्वा॒ग्ने व॒शया॑ ऽऽपं॑ त्वा॒ग्ने स्व॒गाका॑रेणे॒त्याहै॑
() षा वा अ॒ग्नेरा॑प्तिस्तयै॒वैन॑मा॒प्नोति॑ । 33 (ऐ॒न्द्रि॒या - पु॒र -
उ॒त्तरा॑द्धनु॒स्त- द॒ग्नेय॑ - आ॒हा - षौ च॑) (A7)

5.5.8.1

गाय॑त्रेण पु॒रस्ता॑दुप॒ तिष्ठ॑ते प्रा॒णमे॒वास्मिन् द॑धाति बृ॒हद्-रथं॑तरा॒भ्यां
प॒क्षावो॑ज ए॒वास्मिन् द॑धात्य॒तुस्था॑य॒ज्ञा-य॑ज्ञि॒येन॑ पु॒च्छमृ॑तुष्वे॒व प्रति॑
तिष्ठ॑ति पृ॒ष्ठैरु॑प॒ तिष्ठ॑ते ते॒जो वै पृ॒ष्ठानि॑ ते॒ज ए॒वास्मिन् द॑धाति
प्र॒जाप॑तिर॒ग्निम॑सृ॒जत॑ सो॒ऽस्मात् सृ॑ष्टः प॒राडै॑त् तं वा॒रव॑न्ती॒येना॑-
वा॒रय॑त तद्-वा॒रव॑न्ती॒यस्य॑ वा॒रव॑न्ती॒यत्व॑ श्यै॒तेन॑ श्ये॒ती अ॑कुरु॒त

तच्छ्यै॒तस्य॑ श्यै॒तत्त्वं - [] 34

5.5.8.2

यद्-वार॑वन्तीये॒नोप॑तिष्ठते॒ वार॑यत ऐ॒वैन॑ ॐ श्यै॒तेन॑ श्येती॒ कुरु॑ते
 प्र॒जाप॑ते-हृ॒दये॑ना-पि॒पक्षं॑ प्र॒त्युप॑ तिष्ठते॒ प्रेमा॑णमे॒वास्य॑ गच्छति
 प्रा॒च्या॑ त्वा दि॒शा सा॑दयामि गाय॒त्रेण॑ छन्द॒साऽग्नि॑ना दे॒वत॑याऽग्नेः
 शी॒र्ष्णाग्नेः॑ शिर॒ उप॑ दधामि दक्षि॒णया॑ त्वा दि॒शा सा॑दयामि त्रै॒ष्टुभे॑न
 छन्द॒सेन्द्रे॑ण दे॒वत॑याऽग्नेः पक्षे॒णाग्नेः॑ पक्ष॒मुप॑ दधामि प्र॒तीच्या॑ त्वा
 दि॒शा सा॑दयामि - [] 35

5.5.8.3

जा॒गते॑न छन्द॒सा स॑वि॒त्रा दे॒वत॑याऽग्नेः पु॒च्छे॑नाग्नेः पु॒च्छमु॑प
 दधा॒म्युदी॑च्या त्वा दि॒शा सा॑दयाम्यानुष्टु॒भेन॑ छन्द॒सा मि॒त्राव॑रुणाभ्यां
 दे॒वत॑याऽग्नेः पक्षे॒णाग्नेः॑ पक्ष॒मुप॑ दधा॒म्यूर्ध्व॑या त्वा दि॒शा सा॑दयामि
 पा॒ङ्केन॑ छन्द॒सा बृ॒हस्प॑तिना दे॒वत॑याऽग्नेः पृ॒ष्ठेना॑ग्नेः पृ॒ष्ठमु॑प दधामि
 योऽवा॑ अपा॒त्मान॑मग्निं चि॒नुते॑ऽपा॒त्माऽमु॑ष्मिन् लो॒के भ॑वति यः
 सा॒त्मानं॑ चि॒नुते॑ () सा॒त्माऽमु॑ष्मिन् लो॒के भ॑वत्या॒त्मेष्ट॑का उप

दधात्येष वा अग्नेरात्मा सात्मानमेवाग्निं चिनुते सात्माऽमुष्मिन्
लोके भवति य एवं वेद । 36 (इयैतत्त्वं – प्रतीच्यां त्वा दिशा
सादयामि – यः सात्मानं चिनुते – द्वाविंशतिश्च) (A8)

5.5.9.1

अग्न उदधे या त इषुर्युवा नाम तया नो मृड तस्यास्ते नमस्तस्यास्त
उप जीवन्तो भूयास्माग्ने दुध गह्य किञ्शिल वन्य या त इषुर्युवा
नाम तया नो मृड तस्यास्ते नमस्तस्यास्त उप जीवन्तो भूयास्म
पञ्च वा एतेऽग्नयो यच्चितय उदधिरेव नाम प्रथमो दुधो- [] 37

5.5.9.2

द्वितीयो गह्यस्तृतीयः किञ्शिलश्चतुर्थो वन्यः पञ्चमस्तेभ्यो
यदाहुतीर्न जुहुयादध्वर्युं च यजमानं च प्र दहेयुर्यदेता
आहुतीर्जुहोति भागधेयेनैवैनाञ्छमयति नाऽऽ*र्तिमाच्छत्यदध्वर्युर्न
यजमानो वाङ्म आसन् नसोः प्राणोऽक्ष्योश्चक्षुः कर्णयोः श्रोत्रं
बाहुवोर्बल-मूरुवोरोजोऽरिष्टा विश्वान्यङ्गानि तनू- [] 38

5.5.9.3

–स्तनु॒वा मे॑ सह॒ नम॑स्ते अस्तु॒ मा मा॑ हि॒॒सीर॑प वा ए॒तस्मा॑त्
 प्रा॒णाः क्रा॑मन्ति योऽग्निं॑ चि॒न्वन्न॑धि क्रा॒मति॑ वाङ्म आ॒सन् न॒सोः
 प्रा॒ण इत्या॑ह प्रा॒णाने॒वाऽऽत्मन्॑ धत्ते॒ यो रु॒द्रो अ॒ग्नौ यो अ॒प्सु य
 ओष॑धीषु॒ यो रु॒द्रो वि॒श्वा भु॒वनाऽऽवि॑वेश॒ तस्मै॑ रु॒द्राय॑ नमो
 अ॒स्त्वाहु॑तिभा॒गा वा अ॒न्ये रु॒द्रा ह॒विर्भा॑गा – [] 39

5.5.9.4

अ॒न्ये श॑तरु॒द्रीय॑ हु॒त्वा गा॑वीधु॒कं च॑रुमे॒तेन॑ यजु॒षा च॑रमा॒यामि॑ष्टका॒यां
 नि द॑द्ध्याद्–भा॒गधे॑ये॒नैवैन॑ श॒मय॑ति तस्य॒ त्वै श॑तरु॒द्रीय॑
 हु॒तमित्या॑हु॒र्यस्यै॑तद॒ग्नौ क्रि॒यत॑ इति॒ वस॑वस्त्वा रु॒द्रैः पु॒रस्ता॑त् पा॒न्तु
 पि॒तर॑स्त्वा यमरा॒जानः॑ पि॒तृभि॑र्दक्षिणतः॒ पान्त्वा॑दि॒त्यास्त्वा वि॒श्वैर्दे॑वैः
 प॒श्चात् पा॑न्तु द्यु॒तान॑स्त्वा मा॒रुतो॑ मरु॒द्भिरु॑त्तरतः॒ पातु॑ – [] 40

5.5.9.5

दे॒वास्त्वेन्द्र॑ज्ये॒ष्ठा व॑रुणरा॒जानो॑ ऽधस्ता॒च्चो–प॑रि॒ष्ठाच्च॑ पा॒न्तु
 न वा ए॒तेन॑ पू॒तो न मे॒ध्यो न प्रो॑क्षितो॒ यदे॒नमतः॑ प्रा॒चीनं॑ प्रो॒क्षति॑

यथ् संचित॑मा॒ज्येन॑ प्रो॒क्षति॑ तेन॑ पू॒तस्तेन॑ मे॒ध्यस्तेन॑ प्रो॒क्षितः॑ । 41

(दु॒ध - स्त॒नू - ह॒र्विर्भा॑गाः - पा॒तु - द्वा॒त्रिं॑शच्च) (A9)

5.5.10.1

समी॑ची॒ नामा॑सि प्रा॒ची दि॒क्तस्या॑स्ते ऽग्नि॑रधि॒पति॑ र॒सितो॑ र॒क्षिता॑
यश्चा॑धि॒पति॑ र्यश्च॑ गो॒प्ता ता॑भ्यां नम॒स्तौ नो॑ मृ॒डय॑तां ते यं द्वि॒ष्मो यश्च॑
नो द्वेष्टि॑ तं वा॒ जंभे॑ द॒धाम्यो॑ज॒स्विनी॑ नामा॑सि दक्षि॒णा दिक्
तस्या॑स्त इन्द्रो॑ऽधि॒पतिः॑ पृ॒दाकुः॑ प्रा॒ची नामा॑सि प्र॒तीची॑ दिक्
तस्या॑स्ते - [] 42

5.5.10.2

सोमो॑ऽधि॒पतिः॑ स्व॒जो ऽव॑स्थावा नामा॑-स्यु॒दीची॑ दिक् तस्या॑स्ते
वरु॑णोऽधि॒पतिः-स्ति॑रश्च॒ राजि॑-रधि॒पत्नी॑ नामा॑सि बृ॒हती॑ दिक् तस्या॑स्ते
बृ॒हस्प॑ति-रधि॒पतिः॑ श्वि॒त्रो व॑शिनी नामा॑सीयं दिक् तस्या॑स्ते
यमो॑ऽधि॒पतिः॑ क॒ल्माष॑ ग्री॒वो र॑क्षिता यश्चा॑धि॒पति॑ र्यश्च॑ गो॒प्ता ता॑भ्यां
नम॒स्तौ नो॑ मृ॒डय॑तां ते यं द्वि॒ष्मो यश्च॑ - [] 43

5.5.10.3

नो॑ द्वेष्टि॑ तं॑ वाँ॑ जं॒भे द॒धाम्ये॑ता॒ वै दे॒वता॑ अ॒ग्निं चि॒तꣳ र॑क्षन्ति॒
 ताभ्यो॑ यदाहु॑तीर्न॒ जुहु॑यादध्व॒र्युं च॒ यज॑मानं च॒ ध्याये॑युर्यदे॒ता
 आहु॑तीर्जु॒होति॑ भा॒गधे॑येनै-वैनाञ्छ॑मयति॒ नाऽऽ*ति॒माच्छ॑त्यध्व॒र्युर्न॑
 यज॑मानो हे॒तयो॑ नाम॒ स्थ॒ तेषां॑ वः॒ पुरो॑ गृ॒हा अ॒ग्निर्व॒ इष॑वः
 स॒लिलो॑ नि॒लिंपा॑ नाम - [] 44

5.5.10.4

स्थ॒ तेषां॑ वः॒ दक्षि॑णा गृ॒हाः पि॒तरो॑ व॒ इष॑वः स॒गरो॑ व॒ज्रि॒णो नाम॑
 स्थ॒ तेषां॑ वः॒ पश्चा॑द् गृ॒हाः स्व॒प्नो व॒ इष॑वो ग॒ह्वरो॑ ऽव॒स्थावा॑नो नाम॑
 स्थ॒ तेषां॑ वः॒ उत्तरा॑द् गृ॒हा आपो॑ व॒ इष॑वः स॒मुद्रो॑-ऽधि॒पत॑यो नाम॑
 स्थ॒ तेषां॑ वः॒ उपरि॑ गृ॒हा वर्॒षं व॒ इष॑वोऽव॒स्वान् क्र॒व्या नाम॑ स्थ॒
 पार्थि॑वा-स्तेषां॑ व॒ इह॑ गृ॒हा- [] 45

5.5.10.5

अन्नं॑ व॒ इष॑वो ऽनि॒मिषो॑ वा॒तना॑मं तेभ्यो॑ वो नम॒स्ते नो॑ मृडय॒त ते यं॑
 द्विष्मो॑ यश्च॒ नो द्वेष्टि॑ तं॑ वाँ॑ जं॒भे द॒धामि॑ हु॒तादो॑ वा अ॒न्ये दे॒वा

अ॒हु॒तादो॒ऽन्ये॒ ता॒न॒ग्नि॒चि॒दे॒वो॒भ्यान्॑ प्री॒णा॒ति॒ द॒ध्ना॑ म॒धु॒मि॒श्रे॒णै॒ता
आ॒हु॒ती॒र्जु॒हो॒ति॒ भा॒ग॒धे॒ये॒नै॒वै॒नान्॑ प्री॒णा॒त्यथो॒ ख॒ल्वा॒हु॒रि॒ष्ट॒का॒ वै दे॒वा
अ॒हु॒ताद॒ इत्य॑ – [] 46

5.5.10.6

–नु॒प॒रि॒क्रामं॑ जु॒हो॒त्य॒प॒रि॒व॒र्ग॒मे॒वै॒नान्॑ प्री॒णा॒ती॒ म॒ स्त॒न॒मूर्ज॑स्व॒न्तं
ध॒या॒पां प्र॒प्या॒त॒म॒ग्ने॒ सरि॑र॒स्य म॒ध्ये॑ । उ॒थ्सं॑ जु॒षस्व॑ म॒धु॒म॒न्त॒मूर्व॑
स॒मु॒द्रि॒य॒ स॒द॒न॒मा वि॑श॒स्व । यो वा अ॒ग्निं प्र॒यु॒ज्य न वि॑मु॒ञ्च॒ति
यथा॑ऽश्नो॒ यु॒क्तो॑ऽवि॒मु॒च्य॒मा॒नः॑ क्षु॒ध्यन्॑ प॒रा॒भ॒व॒त्ये॒व॒म॒स्या॒ग्निः॑ प॒रा
भ॒व॒ति॒ तं प॒रा॒भ॒व॒न्तं॑ य॒ज॒मा॒नो॑ऽनु॒ प॒रा भ॒व॒ति॒ सो॒ऽग्निं॑ चि॒त्वा
लू॒क्षो– [] 47

5.5.10.7

भ॒व॒ती॒म॒ स्त॒न॒मूर्ज॑स्व॒न्तं ध॒या॒पा॒मि॒त्या॒ज्य॑स्य पू॒र्णा॒ सु॒चं जु॒हो॒त्ये॒ष
वा अ॒ग्ने॒र्वि॒मो॒को वि॑मु॒च्यै॒वास्मा॑ अ॒न्न॒म॒पि द॑धा॒ति॒ तस्मा॑दा॒हुर्य॑श्चै॒वं
वे॒द यश्च॑ न सु॒धा॒य॒ ह वै वा॒जी सु॒हि॒तो द॑धा॒ती॒त्य॒ग्नि॒र्वा॒व वा॒जी
तमे॒व तत् प्री॑णा॒ति॒ स ए॒नं प्री॑तः प्री॒णा॒ति॒ व॒सी॒यान् भ॑व॒ति () । 48

(प्र॒ती॒ची॒ दि॒क्त॒स्या॒स्ते॑ – द्वि॒ष्मो॑ यश्च॑ – नि॒लि॒म्पा॒ ना – मे॒ ह॒ गृ॒हा –
इति॑ – लू॒क्षो॑ – व॒सी॒यान् भवति॑) (A10)

5.5.11.1

इन्द्रा॑य॒ राज्ञे॑ सू॒करो॑ वरु॒णाय॑ राज्ञे॑ कृ॒ष्णो॑ यमा॒य राज॑ ऋ॒श्य ऋ॒षभा॑य॒
राज्ञे॑ गव॒यः शा॒र्दूला॑य॒ राज्ञे॑ गौ॒रः पु॒रुष॑राजा॒य म॒र्कटः॑ क्षिप्र॒श्येन॑स्य॒
वर्ति॑का नील॒ङ्गोः क्रि॒मिः सोम॑स्य॒ राज्ञः॑ कु॒लुङ्गः॑ सि॒न्धोः॑
शि॒शु॒मारो॑ हि॒मव॑तो ह॒स्ती । 49

(इन्द्रा॑य॒ राज्ञे॑ – ऽष्टा॒वि॒ंशतिः॑) (A11)

5.5.12.1

मयुः॑ प्रा॒जाप॑त्य ऊ॒लो ह॒ली॒क्ष्णो॑ वृष॒द॒श॒स्ते धा॒तुः सर॑स्वत्यै॒
शा॒रिः श्ये॑ता पु॒रुष॑वा॒ख् सर॑स्वते॒ शुकः॑ श्ये॒तः पु॒रुष॑वागा॒रण्यो॑ऽजो॒
नकु॑लः शका॒ ते पौ॒ष्णा वा॒चे क्रौ॒ञ्चः । 50

(मयु॑ – स्त्रयो॒वि॒ंशतिः॑) (A12)

5.5.13.1

अपां॑ न॒प्त्रे॑ ज॒षो॑ ना॒क्रो॑ म॒करः॑ कु॒ली॒क॒य॒स्ते॑ऽकू॒पा॒र॒स्य॑ वा॒चे पैङ्ग॑रा॒जो॒
भगा॑य कु॒षी॒त॒क आ॒ती॑ वा॒ह॒सो॑ द॒र्वि॒दा॒ ते वा॒य॒व्या॑ दि॒ग्भ्य॑श्च॒क्र॒वा॒कः॑ । 51

(अ॒पा - मे॒का॒न्न वि॒श॒तिः) (A13)

5.5.14.1

ब॒ला॒या॒ज॒गर॑ आ॒खुः॑ सृ॒ज॒या श॒य॒ण्ड॑क॒स्ते मै॒त्रा मृ॒त्य॒वे॑ऽसि॒तो
म॒न्य॒वे॑ स्व॒जः कुं॑भी॒न॒सः पु॒ष्क॒र॒सा॒दो लो॑हि॒ता॒हि॒स्ते त्वा॒ष्ट्राः
प्र॒ति॒श्रु॒त्का॒यै वा॒ह॒सः । 52 (ब॒ला॒या - षा॒द॒श) (A14)

5.5.15.1

पु॒रु॒ष॒मृ॒गश्च॑न्द्र॒म॒से गो॒धा का॒ल॒का दा॒र्वा॒घा॒ट॒स्ते व॒न॒स्प॒ती॒ना॒मे॒ण्य॒हे
कृ॒ष्णो रा॒त्रि॒यै पि॒कः क्षि॒व॒ङ्गा नी॒ल॒शी॒र्ष्णी ते॒ऽर्य॒म्णे धा॒तुः क॒त्क॒टः॑ । 53
(पु॒रु॒ष॒मृ॒गा - षा॒द॒श) (A15)

5.5.16.1

सौ॒री ब॒ला॒क॒र्यो॑ म॒यूरः॑ श्ये॒न॒स्ते ग॒न्ध॒र्वा॒णां व॑सू॒नां क॒पि॒ञ्ज॒लो
रु॒द्रा॒णां ति॒त्ति॒री रो॒हि॒त् कु॒ण्ड॒णा॒ची गो॒ल॒त्ति॒का ता अ॒प्सर॒सा-
म॒र॒ण्या॒य सृ॒म॒रः॑ । 54 (सौ॒-र्य॑षा॒द॒श) (A16)

5.5.17.1

पृ॒षतो॑ वै॒श्वदे॒वः पि॒त्वो न्य॒ङ्कुः क॒शस्ते॑ऽनु॒मत्या॑ अ॒न्यवा॒पोऽर्ध॑मा॒सानां॑
मा॒सां क॒श्यपः॑ क्वयिः॑ कु॒टरु॑र्दात्यौहस्ते॑ सि॒नीवा॒ल्यै बृ॒हस्प॑तये
शि॒त्पुटः॑ । 55 (पृ॒षतो॑ – ऽष्टा॑द॒श) (A17)

5.5.18.1

श॒का भौ॒मी पा॒न्त्रः क॒शो मा॒न्थील॑वस्ते॑ पि॒तृणा॑मृ॒तूनां॑ ज॒हका॑
सँव॒थ्सरा॑य लो॒पा क॒पोत॑ उ॒लूकः॑ श॒शस्ते॑ नैर्ऋ॒ताः कृ॒कवा॑कुः
सा॒वित्रः॑ । 56 (श॒का – ऽष्टा॑द॒श) (A18)

5.5.19.1

रू॒रु रौ॒द्रः कृ॒कला॑सः श॒कुनिः॑ पि॒प्पका॑ ते श॒रव्या॑यै ह॒रिणो॑ मा॒रुतो॑
ब्र॒ह्मणे॑ शा॒र्गस्तर॑क्षुः कृ॒ष्णः श्वा च॑तु॒रक्षो॑ गर्द॒भस्त॑ इ॒तरज॑नाना॒मग्नये॑
धू॒ङ्क्षणा॑ । 57 (रू॒रु – वि॒ंश॑तिः) (A19)

5.5.20.1

अ॒लज॑ आ॒न्तरि॑क्ष उ॒द्रो म॒द्गुः प्ल॒वस्ते॑ऽपाम॑दि॒त्यै ह॒स्साचि॑रिन्द्रा॒ण्यै
की॒र्शा गृ॒ध्रः शि॒तिक॑क्षी वा॒र्धाण॑सस्ते॑ दि॒व्या द्या॑वापृ॒थिव्या॑

श्वा॒वित् । 58 (अ॒ल॒जो॑ – ऽष्टा॑द॒श) (A20)

5.5.21.1

सु॒पर्णः॑ पा॒र्जन्यो॑ ह॒सो वृ॒को वृ॒षद॒शस्त॑ ऐ॒न्द्रा अ॒पामु॒द्रो ऽर्य॑म्णे
लो॒पा॒शः सि॒हो न॒कु॒लो व्या॒घ्रस्ते॑ म॒हेन्द्रा॒य का॒माय॑ पर॒स्वान् । 59
(सु॒पर्णो॑ – ऽष्टा॑द॒शा) (A21)

5.5.22.1

आ॒ग्नेयः॑ कृ॒ष्णग्री॑वः सा॒रस्व॑ती मे॒षी ब॒भ्रुः सौ॒म्यः पौ॒ष्णः श्या॑मः
शि॒तिपृ॑ष्ठो बा॒र्हस्प॑त्यः शि॒ल्यो वै॒श्वदे॑व ऐ॒न्द्रोऽरु॑णो मा॒रुतः॑ क॒ल्माष॑
ऐ॒न्द्रा॒ग्नः स॒हितो॑ ऽधो॒रामः॑ सा॒वि॒त्रो वा॒रुणः॑ पे॒त्वः । 60
(आ॒ग्नेयो॑ – द्वा॒वि॒शतिः॑) (A22)

5.5.23.1

अ॒श्वस्तू॒परो गो॑मृ॒गस्ते प्रा॑जाप॒त्या आ॒ग्नेयौ॑ कृ॒ष्णग्री॑वौ त्वाष्ट्रौ
लो॒मश॑स॒क्थौ शि॒तिपृ॑ष्ठौ बा॒र्हस्प॑त्यौ धा॒त्रे पृ॑षो॒दरः॑ सौ॒र्यो
ब॒लक्षः॑ पे॒त्वः । 61 (अ॒श्वः – षोड॑श) (A23)

5.5.24.1

अ॒ग्नये॑ऽनी॒कव॑ते रोहि॒ताञ्जि॑रन॒ड्वान॑धो॒रामौ॑ सा॒वित्रौ॑ पौ॒ष्णौ
र॒जत॑नाभी वै॒श्वदे॑वौ पि॒शङ्गौ॑ तू॒परौ॑ मा॒रुतः॑ क॒ल्माष॑ आ॒ग्नेयः॑
कृ॒ष्णोऽजः॑ सा॒रस्व॑ती मे॒षी वा॒रुणः॑ कृ॒ष्ण ए॒कशि॑तिपा॒त् पे॒त्वः । 62
(अ॒ग्नये॑ - द्वा॒विं॒शतिः॑) (A24)

Prasna Korvai with starting Padams of 1 to 24 Anuvaakams :-

(यदे॑केन - प्र॒जाप॑तिः प्रे॒णाऽनु॑ - य॒जुषा॑ - ऽऽपो॑ - वि॒श्वक॑र्मा -
ऽग्न॑ आ या॒हि - सु॒वर्गा॑य व॒ज्रो - गा॒यत्रे॑णा - ग्न॑ उद॒धे - स॒मीची॑
- न्द्रा॑य - म॒यु - र॒पां - ब॒लाय॑ - पु॒रुष॑मृ॒गः - सौ॒री - पृ॒षतः॑ -
श॒का - रुरु॑ - र॒लजः॑ - सु॒पर्ण॑ - आ॒ग्नेयो॑ - ऽश्वो॑ -
ऽग्नये॑ऽनी॒कव॑ते - च॒तुर्विं॑शतिः)

Korvai with starting Padams of 1, 11, 21 Series of Panchaatis :-

(यदे॑केन - स पा॒पीया॑ - ने॒तद्वा॑ अ॒ग्ने - र्ध॒नुस्त॑द् -
दे॒वास्त्वे॑न्द्र॒ज्येष्ठा॑ - अ॒पां न॒प्त्रे - ऽश्व॑स्तू॒परो॑ - द्वि॒षष्टिः॑)

First and Last Padam of Fifth Prasnam of 5th Kandam

(यदेके – नैकशित्तिपात् पेट्वः)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे पञ्चमः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.6 पञ्चमकाण्डे षष्ठः प्रश्नः – उपानुवाक्याभिधानं

5.6.1.1

हिरण्यवर्णाः शुचयः पावका यासु जातः कश्यपो यास्विन्द्रः ।
अग्निं या गर्भं दधिरे विरूपास्ता न आपः श७ स्योना भवन्तु ।
यासां राजा वरुणो याति मध्ये सत्यानृते अवपश्यन् जनानां ।
मधुश्चुतः शुचयो याः पावकास्ता न आपः श७ स्योना भवन्तु ।
यासां देवा दिवि कृण्वन्ति भक्षं या अन्तरिक्षे बहुधा भवन्ति ।
याः पृथिवीं पयसोन्दन्ति – [] 1

5.6.1.2

शुक्रास्ता न आपः श७ स्योना भवन्तु ।
शिवेन मा चक्षुषा पश्यताऽऽपः शिवया तनुवोप स्पृशत त्वचं मे ।
सर्वां अग्नीं रप्सुषदो हुवे वो मयि वर्चो बलमोजो नि धत्त ।
यददः सं प्रयतीरहा वनदताहते । तस्मादा नद्यो नाम स्थ ता वो

ना॒मानि॑ सि॒न्धवः॑ । यत् प्रे॒षिता॑ वरु॒णेन॑ ताः शी॒भ॒ः
सम॑वल्गात । 2

5.6.1.3

तदा॑प्नो॒-दिन्द्रो॑ वो यती॒-स्तस्मा॑-दापो॒ अनु॑ स्थन ।
अप॑काम॒ स्यन्द॑माना॒ अवी॑वरत वो हि॒कं॑ ।
इन्द्रो॑ वः शक्ति॑भिर्दे॒वी-स्तस्मा॑द्-वा॒र्णामि॑ वो हि॒तं॑ ।
एको॑ दे॒वो अप्य॑तिष्ठ॒थ् स्यन्द॑माना यथा व॒शं॑ ।
उ॒दानि॑षु-र्मही॒रिति॑ तस्मा॒-दुद॑क-मु॒च्यते॑ ।
आपो॑ भ॒द्रा घृ॒तमि॑दाप आसु॒रग्नी॑-षोमौ बिभ्र॑त्याप इत् ताः ।
ती॒व्रो रसो॑ मधु॒पृचा॑ - [] 3

5.6.1.4

-मर॑ंगम आ मा॒ प्राणे॑न सह वर्च॑सा गन् ।
आदि॑त् प॒श्याम्यु॑त वा शृ॒णोम्या॑ मा घोषो॑ गच्छ॒ति वाङ्म॑ आसां ।
मन्ये॑ भे॒जानो॑ अमृत॑स्य तर्हि॒ हिर॑ण्यवर्णा॒ अतृ॑पं यदा वः ।
आपो॑ हि ष्ठा मयो॒ भुव॑स्ता न ऊ॒र्जे द॑धातन ।

म॒हे र॒णाय॑ च॒क्ष॒से । यो वः शि॒वत॑मो र॒सस्त॑स्य भाजयतेह नः ।
 उ॒शती॑रिव मा॒तरः () । तस्मा॑ अ॒रं ग॒माम॑ वो यस्य क्षयाय जिन्वथ ।
 आपो॑ ज॒नय॑था च नः । दि॒वि श्र॑य स्वान्तरिक्षे यतस्व पृथि॒व्या सं
 भव॑ ब्रह्मवर्च-सम॑सि ब्रह्मवर्चसाय त्वा । 4 (उ॒दन्ति॑ - स॒मव॑ल्गात -
 म॒धुपृ॑चां - मा॒तरो - द्वावि॑ंशतिश्च} (A1)

5.6.2.1

अपां॑ ग॒हान् गृ॑ह्णात्येतद्वाव राज॒सूयं॑ यदे॒ते ग॒हाः स॒वो ऽग्नि॑र्व॒रुण॑स॒वो
 राज॒सूय॑-म॒ग्निस॒व-श्चि॒त्यस्ता॑भ्या-मे॒व सू॒यते॑ऽथो उ॒भावे॒व लो॒काव॑भि
 जय॑ति यश्च राज॒सूये॑ने॒जान॑स्य यश्चा॒ऽग्नि॑चित आपो॑ भवन्त्यापो वा
 अ॒ग्नेर्भा॑तृ॒व्या यद॑पो ऽग्ने॒रध॑स्तादुप दधाति भ्रातृ॒व्याभि॑भू॒त्यै भव॑त्या॒त्मना॑
 प॒राऽस्य॑ भ्रातृ॒व्यो भव॑त्यमृतं - [] 5

5.6.2.2

वा॑ आप॒स्तस्मा॑-द॒द्भिर॑व॒तान्त॑-म॒भि षि॑ञ्चन्ति नाऽऽ*ति॒माच्छ॑ति
 स॒र्वमा॑यु॒रेति॑ यस्यै॒ता उप॑धीयन्ते य उ॒ चै॒ना ए॒वं वे॑दान्नं वा आपः
 प॒शव॑ आपोऽन्नं प॒शवो॑ऽन्नादः प॒शुमान् भव॑ति यस्यै॒ता उप॑धीयन्ते य

उ॒ चै॒ना ए॒वं वे॒द द्वा॒दश॑ भ॒वन्ति॑ द्वा॒दश॑ मा॒साः सँ॒वत्स॒रः॑

सँ॒वत्स॒रेणै॒वास्मा॑- [] 6

5.6.2.3

अ॒न्नम॒व रु॒न्धे पा॒त्राणि॑ भ॒वन्ति॑ पा॒त्रे वा अ॒न्नम॒द्यते॑ स॒योन्ये॑वा॒न्नम॒व
रु॒न्ध आ द्वा॒दशा॑त् पु॒रुषा॑द॒न्न-म॒त्यथो॑ पा॒त्रान्न॑ छि॒द्यते॑ य॒स्यैता॑
उ॒पधी॑यन्ते॒ य उ॒ चै॒ना ए॒वं वे॒द कुं॒भाश्च॑ कुं॒भीश्च॑ मि॒थुना॑नि॒ भवन्ति॑
मि॒थुन॑स्य प्र॒जात्यै॑ प्र प्र॒जया॑ प॒शुभि॑-मि॒थुनै॑-र्जा॒यते॑ य॒स्यैता॑
उ॒पधी॑यन्ते॒ य उ॒- [] 7

5.6.2.4

चै॒ना ए॒वं वे॒द शु॒ग्वा अ॒ग्निः सो॑ऽध्व॒र्युं य॑ज॒मानं॑ प्र॒जाः शु॒चाऽर्प॑यति॒
यद॑प॒ उप॑दधाति शु॒चमे॒वास्य॑ श॒मय॑ति नाऽऽ*र्ति॒माच्छ॑त्यध्व॒र्युर्न
य॑ज॒मानः॑ शा॒म्यन्ति॑ प्र॒जा यत्रै॒ता उप॑धी॒यन्ते॑ ऽपां॑ वा ए॒तानि॑ हृद॒यानि॑
यदे॒ता आ॒पो यदे॒ता अ॒प उप॑दधाति दि॒व्याभि॑रेवै॒नाः स॒ꣳ सृ॑जति॒
वर्षु॑कः प॒र्जन्यो॑ - [] 8

5.6.2.5

भवति॑ यो॒ वा ए॒तासा॑मा॒यत॑नं॒ क्लृप्तिं॑ वै॒दाऽऽ*य॑त॒नवान्॑ भवति॒
 कल्प॑ते ऽस्मा॒ अनु॑सी॒तमु॑प॒ दधा॑त्येत॒द्वा आ॑सा॒माय॑त॒नमेषा॑ क्लृप्ति॒र्य
 एवं॑ वै॒दाऽऽ*य॑त॒नवान्॑ भवति॒ कल्प॑तेऽस्मै॒ द्वंद्व॑म॒न्या उप॑ दधाति॒
 चत॑स्रो म॒ध्ये धृ॒त्या अ॒न्नं वा॑ इष्ट॒का ए॒तत् खलु॑ वै सा॒क्षाद॒न्नं य॑देष॒
 चरु॑र्यदे॒तं च॒रुमु॑प॒ दधा॑ति सा॒क्षा - [] 9

5.6.2.6

दे॒वास्मा॑ अ॒न्नम॑व॒ रुन्धे॑ म॒ध्यत॑ उप॒ दधा॑ति म॒ध्यत॑ ए॒वास्मा॑ अ॒न्नं
 दधा॑ति तस्मा॒न् म॒ध्यतो॑ऽन्नम॒द्यते॑ बा॒र्हस्प॑त्यो भवति॒ ब्रह्म॑ वै दे॒वानां॑
 बृ॒हस्प॑ति-ब्र॒ह्मणै॑वास्मा॒ अन्न॑म॒व रुन्धे॑ ब्रह्म॒वर्च॑सम॒सि
 ब्रह्म॒वर्च॑साय॒ त्वेत्या॑ह तेज॒स्वी ब्रह्म॒वर्च॑सी भवति॒ यस्यै॑ष उप॒धी॒यते॑
 य उ॑ चैनमे॒वं वैद॑ । 10

(अ॒मृत॑ - म॒स्मै - जा॒यते॑ यस्यै॒ता उप॑धी॒यन्ते॑ य उ॑ - प॒र्जन्य॑ -
 उप॒दधा॑ति सा॒क्षाथ् - स॒प्तच॑त्वारि॒ंशच्च॑) (A2)

5.6.3.1

भू॒ते॒ष्टका॑ उ॒प द॒धा॒त्य॒त्रा॒न्न वै मृ॒त्युर्जा॑यते य॒त्रय॒त्रैव॑ मृ॒त्युर्जा॑यते
तत॑ ए॒वैन॑म॒व य॒जते॑ तस्मा॑द॒ग्नि॒चि॒त् सर्व॑मा॒युरेति॑ सर्वे॑ ह्य॒स्य
मृ॒त्यवो॑ ऽवै॒ष्टास्त॑स्मा॒द॒ग्नि॒चि॒न्ना॒भि॒चरि॑तवै प्र॒त्यगे॑न॒मभि॑चारः
स्तृ॒णुते॑ सू॒यते॑ वा ए॒ष यो॑ऽग्निं चि॒नुते॑ दे॒वसु॒वामे॒तानि॑ ह॒वी॒षि
भव॑न्त्ये॒ताव॑न्तो॒ वै दे॒वाना॑ऽस॒वास्त॑ ए॒वा- [] 11

5.6.3.2

—स्मै॑ स॒वान् प्र य॑च्छन्ति त ए॒नऽसु॑वन्ते स॒र्वो॑ऽग्निर्व॒रुण॑स॒वो
रा॒ज॒सूयं॑ ब्र॒ह्म॒स॒वश्चित्यो॑ दे॒वस्य॑ त्वा स॒वितुः॑ प्र॒स॒व इ॒त्याह॑
स॒वितृ॑प्र॒सूत॑ ए॒वैनं॑ ब्र॒ह्म॒णा दे॒वता॑भि॒रभि॑ षिञ्च॒त्यन्न॑—स्यान्न॒स्याभि॑
षिञ्च॒त्यन्न॑—स्यान्न॒स्या—वरु॑ध्यै पु॒रस्ता॑त् प्र॒त्यञ्च॑म॒भि षिञ्च॑ति
पु॒रस्ता॑द्धि प्र॒तीची॑—न॒मन्न॑म॒द्यते॑ शी॒र्षतो॑ऽभि षिञ्च॑ति शी॒र्षतो॑
ह्यन्न॑म॒द्यत॑ आ मु॒खाद॑न्व॒वस्रा॑वयति - [] 12

5.6.3.3

मुख॑त ए॒वास्मा॑ अ॒न्नाद्यं॑ द॒धात्य॑ग्नेस्त्वा सा॒म्राज्ये॑नाभि॒ षिञ्चा॑मीत्या॒हैष
वा अ॒ग्नेः स॒वस्तेनै॑वैन॒मभि॑ षिञ्चति॒ बृह॑स्पते॒स्त्वा सा॒म्राज्ये॑नाभि॒
षिञ्चा॑मीत्या॒ह ब्र॒ह्म वै दे॒वानां॑ बृह॑स्पतिर्ब्र॒ह्मणै॑वैन॒मभि॑
षिञ्च॑तीन्द्र॒स्य त्वा सा॒म्राज्ये॑नाभि॒ षिञ्चा॑मीत्या॒हेन्द्रि॒यमे॒वास्मि॑-
न्नुप॑रि॒ष्टाद् द॒धात्ये॑ त- [] 13

5.6.3.4

-द्वै रा॒जसू॑यस्य रू॒पं य॑ एवं वि॒द्वानग्निं॑ चि॒नुत॑ उ॒भावे॒व लो॒काव॒भि
ज॑यति॒ यश्च॑ रा॒जसू॑येने॒जान॑स्य॒ यश्चा॑ग्नि॒चित इन्द्र॑स्य सु॒षुवा॑णस्य
द॒शधे॑न्द्रि॒यं वी॒र्यं॑ प॒राऽप॑तत् तद्दे॒वाः सौ॒त्राम॑ण्या स॒मभ॑रन्थ् सू॒यते॑
वा ए॒ष योऽग्निं॑ चि॒नुते॑ऽग्निं चि॒त्वा सौ॒त्राम॑ण्या य॒जेते॑न्द्रि॒यमे॒व
वी॒र्यं॑ संभृ॒त्याऽऽत्म॑न् ध॒त्ते । 14

(त ए॒वा - न्वव॑स्रावयत्ये - त - द॒ष्टाच॑त्वारि॒ंशच्च॑) (A3)

5.6.4.1

स॒जूर॑ब्दोऽया॑वभिः स॒जूरु॑षा अरु॑णीभिः स॒जूः सूर्य॑ एत॑शेन
 स॒जोषा॑व॒श्विना॑ द॒सो॑भिः स॒जूर॑ग्निर्वै॒श्वानर॑ इडा॑भिर्घृ॒तेन॑ स्वाहा॑
 सँव॑त्सरो वा अब्दो मासा अया॑वा उषा अरु॑णी सूर्य॑ एत॑श इमे
 अ॒श्विना॑ सँव॑त्सरोऽग्निर्वै॒श्वानरः॑ प॒शव॑ इडा प॒शवो॑ घृ॒तः
 सँव॑त्सरं प॒शवो॑ऽनु प्र जाय॑न्ते सँव॑त्सरेणैवास्मै प॒शून्
 प्र॒ज॒न॒य॒ति॒ दर्भ॑स्त॒म्बे जु॑होति॒ य- [] 15

5.6.4.2

-द्वा अ॒स्या अ॒मृतं॑ यद्-वीर्यं॑ तद्-दर्भा॑स्तस्मिन् जुहोति॒ प्रैव जा॑यते
 ऽन्ना॒दो भ॑वति॒ यस्यै॒वं जु॑ह्वत्ये॒ता वै दे॒वता॑ अ॒ग्नेः पु॒रस्ता॑द् भा॒गास्ता॑
 ए॒व प्री॑णा॒त्यथो॑ चक्षु॒रेवा॒ग्नेः पु॒रस्ता॑त् प्र॒ति द॑धा॒त्यन॑न्धो भवति॒ य
 ए॒वं वे॒दाऽऽ*पो॑ वा इ॒दम॑ग्रे स॒लिल॑मासी॒त् स प्र॒जाप॑तिः पुष्कर॒पर्णे
 वा॒तो भू॒तोऽले॑लाय॒त् सः - [] 16

5.6.4.3

प्रतिष्ठां॑ नाऽविन्दत॑ स एतदपां॑ कुलाय॑मपश्यत् तस्मिन्न॑ग्निमचिनुत॑
तदियम॑भवत् ततो॑ वै स प्रत्यतिष्ठद्यां॑ पुरस्तादुपा-दधात्
तच्छिरोऽभवत् सा प्राची॑ दिग्यां॑ दक्षिणत॑ उपादधात् स दक्षिणः
पक्षोऽभवत् सा दक्षिणा॑ दिग्यां॑ पश्चा-दुपादधात् तत् पुच्छम॑भवत्
सा प्रतीची॑ दिग्यामुत्तरत॑ उपादधात्- [] 17

5.6.4.4

स उत्तरः पक्षोऽभवत् सोदीची॑ दिग्यामुपरिष्ठा-दुपादधात् तत्
पृष्ठम॑भवत् सोर्ध्वा॑ दिगियं॑ वा अग्निः पञ्चैष्टक-स्तस्माद्-यदस्यां
खनन्त्यभीष्टकां॑ तृन्दन्त्यभि॑ शर्करां॑ सर्वा॑ वा इयं॑ वयोभ्यो॑ नक्तं
दृशे दीप्यते॑ तस्मादिमां॑ वयांसि॑ नक्तं॑ नाध्यासते॑ य एवं॑ विद्वानग्निं॑
चिनुते॑ प्रत्येव- [] 18

5.6.4.5

तिष्ठत्यभि॑ दिशो॑ जयत्याग्नेयो॑ वै ब्राह्मणस्तस्माद्-ब्राह्मणाय॑ सर्वासु॑
दिक्ष्वर्धुकं॑ स्वामेव॑ तद्-दिशमन्वेत्यपां॑ वा अग्निः॑ कुलायं॑

तस्मादापोऽग्निं हारुकाः स्वामेव तद्-योनिं प्रविशन्ति । 19

(यद्-लेलायथ् स-उत्तरत उपादधा-देव - द्वात्रिंशच्च) (A4)

5.6.5.1

सँवथ्सरमुख्यं भृत्वा द्वितीये सँवथ्सर आग्नेयमष्टाकपालं
निर्वपेदैन्द्र-मेकादशकपालं वैश्वदेवं द्वादशकपालं बार्.हस्पत्यं चरुं
वैष्णवं त्रिकपालं तृतीये सँवथ्सरेऽभिजिता यजेत यदष्टाकपालो
भवत्यष्टाक्षरा गायत्र्याग्नेयं गायत्रं प्रातः सवनं प्रातः सवनमेव
तेन दाधार गायत्रीं छन्दो यदेकादशकपालो भवत्येकादशाक्षरा
त्रिष्टुगैन्द्रं त्रैष्टुभं माध्यंदिनं सवनं माध्यंदिनमेव सवनं तेन
दाधार त्रिष्टुभं- [] 20

5.6.5.2

छन्दो यद्-द्वादशकपालो भवति द्वादशाक्षरा जगती वैश्वदेवं जागतं
तृतीयसवनं तृतीयसवनमेव तेन दाधार जगतीं छन्दो
यद्-बार्.हस्पत्यश्चरुर्भवति ब्रह्म वै देवानां बृहस्पतिर्ब्रह्मैव
तेन दाधार यद्-वैष्णवस्त्रिकपालो भवति यज्ञो वै विष्णुर्यज्ञमेव

तेन॑ दा॒धार॒ यत् तृ॒तीये॑ सँव॒थ्सरे॑ऽभि॒जिता॒ यज॑तेऽभि॒जित्यै॒
यथ् सँव॒थ्सर॑मुख्यं बि॒भर्ती॑ममेव- [] 21

5.6.5.3

तेन॑ लो॒कꣳ स्पृ॑णोति यद् द्वि॒तीये॑ सँव॒थ्सरे॑ऽग्निं चि॒नुते॑ऽन्तरि॒क्षमे॒व
तेन॑ स्पृ॑णोति यत् तृ॒तीये॑ सँव॒थ्सरे॑ यज॑तेऽमु॒मेव तेन॑ लो॒कꣳ
स्पृ॑णोत्येतं वै पर॑ आट्णारः क॒क्षीवाꣳ औ॒शिजो॑ वी॒तह॑व्यः
श्राय॑सस्त्रसदस्युः पौरु॒कु॒थ्स्यः प्र॒जाका॑मा अचि॒न्वत॑ ततो॒ वै ते
सह॑स्रꣳ सह॑स्रं पु॒त्रान॑विन्दन्त प्रथ॑ते प्र॒जया॑ प॒शुभि॑स्तां मा॒त्रामा॑प्नोति
यां तेऽग॑च्छन् य एवं () वि॒द्वाने॒तम॑ग्निं चि॒नुते॑ । 22

(दा॒धार॒ त्रि॒ष्टुभ॑ - मि॒ममे॒वै - वं - च॒त्वारि॑ च) (A5)

5.6.6.1

प्र॒जाप॑तिरग्निमचि॒नुत॑ स क्षु॒रप॑विर्भू॒त्वाऽति॑ष्ठत् तं दे॒वा बि॑भ्यतो
नोपाऽऽ*यन् ते छन्दो॑भिरात्मानं छादयित्वोपाऽऽ*यन् तच्छन्द॑सां
छन्द॑स्त्वं ब्र॒ह्म वै छन्दाꣳसि॒ ब्रह्म॑ण ए॒तद्-रूपं॑ यत् कृ॒ष्णाजि॑नं

का॒र्ष्णी॑ उ॒पा॒न॒हा॒वु॒प॒ मु॒ञ्च॒ते॒ छ॒न्दो॑भि॒रे॒वाऽऽ*त्मा॑नं॒ छा॒द॒यि॒त्वाऽग्नि॑मु॒प॒
च॒र॒त्या॒त्म॒नोऽहि॑ँ॒सा॒यै॑ दे॒व॒नि॒धि॒र्वा ए॒ष नि॑ धी॒य॒ते॒ यद॒ग्नि॑- [] 23

5.6.6.2

-र॒न्ये वा॒ वै नि॒धि॒म॒गु॒प्तं वि॒न्द॒न्ति॒ न वा॒ प्र॒ति प्र॒ जा॒ना॒त्यु॒खा॒मा
क्रा॒म॒त्या॒त्मा॒न॒मे॒वा॒धि॒पां॑ कु॒रु॒ते गु॒प्त्या॒ अथो॑ ख॒ल्वा॒हु॒र्नाऽऽक्र॑म्येति॒
नैर्ऋ॒त्यु॒खा य॒दा॒क्रा॒मे॒न्निर्ऋ॒त्या आ॒त्मा॒न॒म॒पि द॒ध्यात्
तस्मा॒न्नाऽऽक्र॑म्या॒ पु॒रु॒ष॒शीर्ष॑मु॒प द॒धा॒ति गु॒प्त्या॒ अथो॑ य॒था॑
ब्रू॒या॒दे॒त॒न्मे गो॒पा॒ये॒ति ता॒दृ॒गे॒व तत्- [] 24

5.6.6.3

प्र॒जा॒प॒ति॒र्वा अथ॑र्वा॒ ऽग्नि॑रे॒व द॒ध्य॒ङ्गु॒थ॒र्व॒ण॒स्त॒स्ये॒ष्ट॒का
अ॒स्थान्ये॒तँ ह॒ वा॒व तद्-ऋ॒षि॒र॒भ्य॒नू॒वा॒चे॒न्द्रो द॒धी॒चो अ॒स्थ॒भि॒रि॒ति
यदि॑ष्ट॒काभि॒र॒ग्निं चि॒नो॒ति सा॒त्मा॒न॒मे॒वा॒ग्निं चि॒नु॒ते सा॒त्मा॒मु॒ष्मिन् लो॒के
भ॒व॒ति य॒ एवं वे॒द शरी॑रं॒ वा ए॒तद॒ग्ने॒र्यच्चि॑त्य॒ आ॒त्मा वैश्वा॑न॒रो
यच्चि॑ते॒ वैश्वा॑न॒रं जु॒हो॒ति शरी॑रमे॒व स॒कृ॒त्या- [] 25

5.6.6.4

–भ्यारो॑हति॒ शरी॑रं॒ वा ए॒तद्–यज॑मानः स॒ ऽ स्कु॑रुते॒ यद॒ग्निं चि॑नुते
यच्चि॑ते॒ वैश्वान॑रं॒ जुहो॑ति॒ शरी॑रमेव स॒ ऽ स्कु॑रुत्या॒ ऽऽ*त्म॑ना॒भ्यारो॑हति
तस्मा॑त् तस्य॒ नाव॑ द्यन्ति॒ जीव॑न्नेव॒ देवान॑प्येति॒ वैश्वान॑र्यर्चा॒ पुरी॑षमुप
दधा॑तीयं॒ वा अ॒ग्निर्वै॑श्वान॒रस्तस्यै॑षा चि॒तिर्य॑त् पुरी॑षम॒ग्निमे॒व
वैश्वान॑रं चि॒नुत ए॒षा वा अ॒ग्नेः () प्रि॒या त॒नूर्य॑द्–वैश्वान॑रः
प्रि॒यामे॒वास्य॑ त॒नुव॑मव॒ रुन्धे॑ । 26

(अ॒ग्नि – स्त॒थ् – स॒ ऽ स्कु॑रुत्या – ग्ने – दर्श॑ च) (A6)

5.6.7.1

अ॒ग्नेर्वै॑ दी॒क्षया॑ दे॒वा वि॒राज॑माप्नुवन् तिस्रो रा॒त्रीर्दी॑क्षितः स्यात्
त्रि॒पदा॑ वि॒राड् वि॒राज॑माप्नोति षड्–रा॒त्रीर्दी॑क्षितः स्यात् षड् वा
ऋ॒तवः॑ सँव॒थ्सरः॑ सँव॒थ्सरो॑ वि॒राड् वि॒राज॑माप्नोति दश
रा॒त्रीर्दी॑क्षितः स्याद्–द॒शाक्ष॑रा वि॒राड् वि॒राज॑माप्नोति द्वा॒दश
रा॒त्रीर्दी॑क्षितः स्याद् द्वा॒दश॑ मा॒साः सँव॒थ्सरः॑ सँव॒थ्सरो॑ वि॒राड्
वि॒राज॑माप्नोति त्रयो॒दश॑ रा॒त्रीर्दी॑क्षितः स्यात् त्रयो॒दश॑ – [] 27

5.6.7.2

मा॒साः सँ॒व॒थ्स॒रो सँ॒व॒थ्स॒रो वि॒राड् वि॒राज॑मा॒प्नोति॑ पञ्च॑द॒श
 रा॒त्रीर्दी॒क्षितः॑ स्या॒त् पञ्च॑द॒श वा अ॒र्धमा॒सस्य॑ रा॒त्रयोऽर्ध॑मा॒सशः॑
 सँ॒व॒थ्स॒रो आ॒प्यते॑ सँ॒व॒थ्स॒रो वि॒राड् वि॒राज॑मा॒प्नोति॑ स॒प्तद॒श
 रा॒त्रीर्दी॒क्षितः॑ स्या॒द् द्वा॒द॒श मा॒साः पञ्च॑र्त॒वः स सँ॒व॒थ्स॒रो
 सँ॒व॒थ्स॒रो वि॒राड् वि॒राज॑मा॒प्नोति॑ च॒तुर्विं॑श॒तिꣳ रा॒त्रीर्दी॒क्षितः॑ स्या॒-
 च॒तुर्विं॑श॒तिर॒र्धमा॒साः सँ॒व॒थ्स॒रो सँ॒व॒थ्स॒रो वि॒राड् वि॒राज॑मा॒प्नोति॑
 त्रिं॑श॒तꣳ रा॒त्रीर्दी॒क्षितः॑ स्या॒त् - [] 28

5.6.7.3

त्रिं॑श॒दक्ष॒रा वि॒राड् वि॒राज॑मा॒प्नोति॑ मा॒सं दी॒क्षितः॑ स्या॒द्-यो मा॒सः
 स सँ॒व॒थ्स॒रो सँ॒व॒थ्स॒रो वि॒राड् वि॒राज॑मा॒प्नोति॑ च॒तुरो मा॒सो
 दी॒क्षितः॑ स्या॒च्च॒तुरो वा ए॒तं मा॒सो वस॑वोऽ॒भिभ॑रु॒स्ते पृ॒थि॒वीमाऽज॑यन्
 गा॒य॒त्रीं छ॒न्दोऽष्टौ रु॒द्रास्ते-ऽन्त॑रि॒क्षमाऽज॑यन् त्रि॒ष्टुभं छ॒न्दो द्वा॒द॒शा-
 ऽऽदि॒त्यास्ते दि॒वमाऽज॑यन् जग॑तीं छ॒न्दस्त॑तो वै ते ()
 व्या॒वृ॒त-म॑गच्छ॒ज्ज्यैष्यं॑ दे॒वानां॑ तस्मा॒द् द्वा॒द॒श मा॒सो भृ॒त्वाऽग्निं॑

चिन्वीत॑ द्वाद॑श॒ मा॒साः सँव॑त्स॒रः सँव॑त्स॒रो - ऽग्नि॑श्चित्य॒स्तस्या॑-
 हो॒रात्रा॑णी॒ष्टका॑ आ॒प्तेष्ट॑कमे॒नं चि॒नुते॑ऽथो॒ व्यावृ॑तमे॒व ग॑च्छति॒ श्रैष्ठ्य॑
 समा॒नानां॑ । 29 (स्यात् त्रयो॑द॒श - त्रि॑श॒तं रा॒त्रीर्दी॑क्षितः स्याद्
 - वै ते॑ - ऽष्टा॒वि॒शति॑श्च) (A7)

5.6.8.1

सुव॒र्गाय॑ वा ए॒ष लो॒काय॑ ची॒यते॑ यद॒ग्निस्तं॑ य॒न्नान्वा॒रोह॑ेत्
 सुव॒र्गाल्लो॒काद्-य॑ज॒मानो॑ ही॒येत॑ पृथि॒वीमा॑ऽक्र॒मिषं॑ प्रा॒णो मा॒ मा
 हा॒सीद॒न्तरि॑क्ष॒माऽक्र॒मिषं॑ प्र॒जा मा॒ मा हा॒सीद्-दि॒वमा॑ऽक्र॒मिषं॑
 सुव॒र्गन्मे॒त्याहै॑ष वा अ॒ग्नेर॒न्वा॒रोह॑स्तेनै॒वैन॑-म॒न्वा॒रोह॑ति सुव॒र्गस्य॑
 लो॒कस्य॑ सम॒ष्ट्यै यत् प॒क्षस॑म्मि॒तां मि॒नुयात्॑ - [] 30

5.6.8.2

कनी॑या॒सं य॒ज्ञक्र॑तुमु॒पेयात्॑ पापी॑यस्यस्या॒ ऽऽत्म॑नः प्र॒जा
 स्याद्-वे॒दिस॑म्मि॒तां मि॒नोति॑ ज्या॒या॒समे॒व य॒ज्ञक्र॑तुमु॒पैति॑
 नास्या॑ऽऽ*त्म॑नः पापी॑यसी प्र॒जा भ॑वति सा॒हस्रं॑ चिन्वीत॒ प्रथ॑मं
 चिन्वा॑नः स॒हस्र॑सम्मितो वा अ॒यं लो॒क इ॒ममे॒व लो॒कम॑भि जयति॒

द्विषा॑हस्रं चिन्वी॑त द्वितीयं॑ चिन्वानो॑ द्विषा॑हस्रं वा अ॒न्तरि॑क्ष-
मन्तरि॑क्षमे॒वाभि॑ जयति॑ त्रिषा॑हस्रं चिन्वी॑त तृतीयं॑ चिन्वान - [] 31

5.6.8.3

-स्त्रिषा॑हस्रो वा असौ॑ लोको॑ ऽमुमे॒व लो॒कम॒भि ज॑यति जानु॒दघ्नं॑
चिन्वी॑त प्रथ॒मं चिन्वा॑नो गाय॒त्रियै॒वेमं लो॒कम॒भ्यारो॑हति नाभि॒दघ्नं॑
चिन्वी॑त द्वितीयं॑ चिन्वान॒स्त्रिष्टु॒भैवा-न्तरि॑क्ष-म॒भ्यारो॑हति ग्रीव॒दघ्नं॑
चिन्वी॑त तृतीयं॑ चिन्वानो जग॒त्यैवा॒मुन् लो॒कम॒भ्यारो॑हति नाग्निं
चित्वा॑ रा॒मामु॑पेयादयो॒नौ रेतो॑ धास्यामीति॒ न द्वितीयं॑ चित्वा॒ऽन्यस्य॑
स्त्रिय- [] 32

5.6.8.4

-मुपे॑यान्न तृतीयं॑ चित्वा कां च॒नोपे॑याद्-रेतो॑ वा ए॒तन्नि ध॑त्ते यदग्निं॑
चि॒नुते॑ यदुपे॑याद्-रेत॒सा व्य॑ध्येता॒ऽथो ख॒ल्वाहु॑र प्रजस्यं॑ तद्-
यन्नोपे॑यादिति॒ यद्-रेतः॑ सिचावुप॒दधा॑ति ते ए॒व यज॑मानस्य॒ रेतो॑
बिभृ॑तस्तस्मा॒-दुपे॑याद्-रेत॒सो-ऽस्क॑न्दाय॒ त्रीणि॑ वाव॒ रेतो॑ऽसि पि॒ता
पु॒त्रः पौ॒त्रो- [] 33

5.6.8.5

यद् द्वे रेतः सिचावुपदध्याद्-रेतौऽस्य विच्छिन्द्यात् तिस्र उप दधाति
 रेतसः संतत्या इयं वाव प्रथमा रेतः सिग्वाग्वा इयं तस्मात्
 पश्यन्तीमां पश्यन्ति वाचं वदन्तीमन्तरिक्षं द्वितीया प्राणो वा
 अन्तरिक्षं तस्मान्नाऽन्तरिक्षं पश्यन्ति न प्राणमसौ तृतीया चक्षुर्वा
 असौ तस्मात् पश्यन्त्यमूं पश्यन्ति चक्षुर्यजुषेमां चा - [] 34

5.6.8.6

-मूं चोप दधाति मनसा मध्यमामेषां लोकानां क्लृप्त्या अथो
 प्राणानामिष्टो यज्ञो भृगुभिराशीर्दा वसुभिस्तस्य त इष्टस्य वीतस्य
 द्रविणेह भक्षीयेत्याह स्तुतशस्त्रे एवैतेन दुहे पिता मातरिश्वाऽच्छिद्रा
 पदा धा अच्छिद्रा उशिजः पदाऽनु तक्षुः सोमो विश्वविन्नेता
 नेषद्-बृहस्पतिरुक्थामदानि शऽसिषदित्याहैतद्वा () अग्नेरुक्थं
 तेनैवैनमनु शऽसति । 35 (मिनुयात् - तृतीयं चिन्वानः - स्त्रियं
 - पौत्र - श्व - वै - सप्त च) (A8)

5.6.9.1

सू॒य॒ते वा ए॒षोऽग्नी॒नां य॑ उ॒खायां॑ भ्रि॒य॒ते य॒द॒धः सा॒द॒येद्-ग॒र्भाः॑
 प्र॒पा॒दु॒काः स्यु॒र॒थो य॒था स॒वात् प्र॒त्य॒व॒रो॒ह॒ति ता॒दृ॒गे॒व तदा॑स॒न्दी
 सा॒द॒य॒ति ग॒र्भा॒णां धृ॒त्या अ॒प्र॒पा॒दा॒या॒थो स॒व॒मे॒वैनं॑ क॒रो॒ति ग॒र्भो वा ए॒ष
 यदु॒ख्यो यो॒निः शि॒क्यं य॑च्छि॒क्यादु॒खां नि॒रू॒हेद्-यो॒नेर्ग॒र्भं
 नि॒र्ह॒ण्याथ॑ ष॒डु॒द्याम॑ शि॒क्यं भ॒व॒ति षो॒ढा वि॒हि॒तो वै - [] 36

5.6.9.2

पु॒रु॒ष आ॒त्मा च॑ शि॒रश्च॑ च॒त्वार्य॑ङ्गा॒न्या॒त्म॒न्ने॒वैनं॑ बि॒भ॒र्ति प्र॒जाप॑ति॒र्वा
 ए॒ष यद॑ग्नि॒स्तस्यो॒खा चो॒लू॒ख॒लं च॑ स्त॒नौ ता॒व॒स्य प्र॒जा उप॑ जी॒व॒न्ति
 यदु॒खां चो॒लू॒ख॒लं चो॒प॒द॒धा॒ति ता॒भ्यामे॒व य॒ज॒मा॒नोऽमु॑ष्मिन्
 लो॒केऽग्निं॑ दु॒हे सँ॒व॒त्स॒रो वा ए॒ष यद॑ग्नि॒स्तस्य॑ त्रे॒धावि॑हि॒ता इ॒ष्ट॒काः
 प्रा॒जाप॑त्या वै॒ष्ण॒वी - [] 37

5.6.9.3

-वै॒श्व॒क॒र्म॒णी-र॒हो॒रा॒त्रा॒ण्ये॒वा॒स्य प्रा॒जाप॑त्या यदु॒ख्यं बि॒भ॒र्ति प्रा॒जाप॑त्या
 ए॒व तदु॑प॒ धत्ते॑ यथ् स॒मि॒ध आ॒द॒धा॒ति वै॒ष्ण॒वा वै व॒न॒स्प॒त॒यो

वै॒ष्ण॒वी॒रे॒व॒ तदु॒प॒ ध॒त्ते॒ य॒दि॒ष्ट॒का॒भि॒र॒ग्निं॑ चि॒नो॒ती॒यं॑ वै वि॒श्व॒क॒र्मा
वै॒श्व॒क॒र्म॒णी॒रे॒व॒ तदु॒प॒ ध॒त्ते॒ तस्मा॑-दाहु-स्त्रि॒वृ॒द॒ग्नि॒रि॒ति॒ तं॑ वा ए॒तं
य॒ज॒मा॒न ए॒व चि॒न्वी॒त॒ यद॒स्या॒न्य () शि॒नु॒या॒द्यत्॑ तं दक्षि॒णा॒भि॒र्न
रा॒धये॑द॒ग्नि॒म॒स्य वृ॒ज्जी॒त॒ योऽ॒स्याऽ॒ग्निं॑ चि॒नु॒या॒त् तं॑ दक्षि॒णा॒भी
रा॒धये॑द॒ग्नि॒मे॒व तथ् स्पृ॒णो॒ति॒ । 38

(षो॒ढा॒वि॒हि॒तो॒ वै - वै॒ष्ण॒वी - र॒न्यो - वि॒श्रु॒तिश्च॑) (A9)

5.6.10.1

प्र॒जा॒प॒ति-र॒ग्नि-म॒चि॒नु॒त॒र्तु॒भिः॑ सँव॒त्स॒रं॑ व॒स॒न्ते॒नै॒वा॒स्य
पू॒र्वार्ध॑म॒चि॒नु॒त ग्री॒ष्मे॒ण दक्षि॑णं पक्षं व॒र्षा॒भिः॑ पु॒च्छं॑ शर॒दो॒त्तरं॑
पक्षं॑ हे॒म॒न्ते॒न म॒ध्यं ब्र॒ह्म॒णा वा अ॒स्य तत् पू॒र्वार्ध॑म॒चि॒नु॒त क्ष॒त्रे॒ण
दक्षि॑णं पक्षं प॒शु॒भिः॑ पु॒च्छं॑ वि॒शो॒त्तरं॑ पक्ष॒मा॒शया॑ म॒ध्यं य॒ ए॒वं
वि॒द्वान॒ग्निं चि॒नु॒त ऋ॒तु॒भि॒रे॒वैनं॑ चि॒नु॒तेऽथो॑ ए॒तदे॒व स॒र्व॒मव॑-[] 39

5.6.10.2

रु॒न्धे शृ॒ण्व॒न्त्ये॒न॒म॒ग्निं चि॒क्या॒न॒म॒त्यन्त॑ रो॒च॒ते इ॒यं वा॒व
प्र॒थ॒मा चि॒ति॒रो॒ष॒धयो॑ व॒न॒स्प॒तयः॑ पु॒री॒ष॒म॒न्तरि॑क्षं द्वि॒ती॒या

वया॑सि॒ पुरी॑षम॒सौ तृ॒तीया॒ नक्ष॑त्राणि॒ पुरी॑षं॒ यज्ञ॑श्चतु॒र्थी
दक्षि॑णा॒ पुरी॑षं॒ यज॑मानः॒ पञ्च॑मी॒ प्रजा॑ पुरी॑षं॒ यत् त्रि॑चितीकं
चिन्वी॑त॒ यज्ञं॑ दक्षि॑णामा॒त्मानं॑ प्र॒जाम॑न्तरि॒यात् तस्मा॑त्
पञ्च॑चितीकश्चे॒तव्य॑ ए॒तदे॒व सर्व॑ स्पृ॒णोति॑ यत् तिस्र॑श्चितय- [] 40

5.6.10.3

-स्त्रि॑वृद्ध्य॒ग्निर्यद् द्वे॑ द्वि॒पाद्-यज॑मानः॒ प्रति॑ष्ठित्यै॒ पञ्च॑ चित॒यो
भव॑न्ति॒ पाङ्कः॑ पुरु॒ष आ॒त्मान॑मे॒व स्पृ॒णोति॑ पञ्च॑ चित॒यो भव॑न्ति
पञ्च॑भिः॒ पुरी॑षैर॒भ्यूह॑ति॒ दश॑ सं प॒द्यन्ते॑ द॒शाक्ष॑रो॒ वै पुरु॑षो॒ यावा॑ने॒व
पुरु॑षस्त॒ स्पृ॒णोत्यथो॑ द॒शाक्ष॑रा वि॒राडन्नं॑ वि॒राड् वि॒राज्ये॑वान्नाद्ये
प्रति॑ तिष्ठति॒ सँव॑त्सरो॒ वै षष्ठी॑ चि॒तिर्ऋ॒तवः॑ पुरी॑षः () षट्
चित॒यो भव॑न्ति॒ षट् पुरी॑षाणि॒ द्वाद॑श सं प॒द्यन्ते॑ द्वाद॑श मा॒साः
सँव॑त्सरः॒ सँव॑त्सर ए॒व प्रति॑ तिष्ठति । 41

(अ॒व - चि॒तयः॑ - पुरी॑षं - पञ्च॑दश च) (A10)

5.6.11.1

रो॒हि॒तो धू॒म्रो॒हि॒तः क॒र्क॒न्धु॒रो॒हि॒तस्ते प्रा॒जाप॒त्या ब॒भ्रुर॒रु॒णब॒भ्रुः
शु॒कब॒भ्रुस्ते रौ॒द्राः श्ये॒तः श्ये॒ताक्षः श्ये॒तग्री॒वस्ते पि॒तृदे॒वत्या॑स्ति॒स्रः
कृ॒ष्णा व॒शा वा॒रु॒ण्यस्ति॒स्रः श्वे॒ता व॒शाः सौ॒र्यो मै॒त्राबा॒र्हस्प॒त्या
धू॒म्रल॒लामा॒स्तूप॒राः । 42 (रो॒हि॒तः - षड्विं॑शतिः) (A11)

5.6.12.1

पृ॒श्नि-स्ति॒रश्ची॒न-पृ॒श्निरू॒र्ध्व-पृ॒श्निस्ते मा॒रु॒ताः फ॒ल्गू॒र्लो॒हि॒तो॒र्णी
ब॒लक्षी॑ ताः सा॒रस्व॒त्यः पृ॒षती॑ स्थू॒लपृ॒षती॑ क्षु॒द्रपृ॒षती॑ ता
वै॒श्वदे॒व्यस्ति॒स्रः श्या॒मा व॒शाः पौ॒ष्णिय॑स्ति॒स्रो रो॒हि॒णीर्व॒शा मै॒त्रिय॑
ऐ॒न्द्राबा॒र्हस्प॒त्या अ॒रु॒णल॒लामा॒स्तूप॒राः । 43
(पृ॒श्निः - षड्विं॑शतिः) (A12)

5.6.13.1

शि॒तिबा॒हुर॒न्यतः॑ शि॒तिबा॒हुः स॒मन्त॑ शि॒तिबा॒हुस्त॑ ऐ॒न्द्रवा॒यवाः
शि॒तिर॒न्ध्रोऽन्य॑तः शि॒तिर॒न्ध्रः स॒मन्त॑शि॒तिर॒न्ध्रस्ते॑ मै॒त्राव॒रु॒णाः शु॒द्धवा॒लः
सर्व॑शु॒द्धवा॒लो म॒णिवा॒लस्त॑ आ॒श्विना॑स्ति॒स्रः शि॒ल्या व॒शा

वै॒श्वदे॒व्यस्ति॒स्रः॑ इ॒येनीः॑ पर॒मे॒ष्ठिने॑ सो॒मापौ॒ष्णाः॑

इ॒याम॒ल॒लामा॒स्तूप॒राः॑ । 44 (॒शिति॒बाहुः॑ पञ्च॒विंश॑तिः) (A13)

5.6.14.1

उ॒न्नत॑ ऋ॒षभो॑ वा॒मन॑स्त॒ ऐन्द्रा॑व॒रुणाः॑ शि॒ति॒ककु॑च्छि॒तिपृ॑ष्ठः शि॒ति॒भस॑त्
त॒ ऐन्द्रा॑बा॒र्हस्प॑त्याः शि॒ति॒पाच्छि॑त्योष्ठः शि॒ति॒भ्रुस्त॑ ऐन्द्रा॒वैष्ण॑वास्ति॒स्रः॑
सि॒ध्मा व॒शा वै॒श्वक॑र्म॒ण्यस्ति॒स्रो धा॒त्रे पृ॑षो॒दरा॑ ऐन्द्रा॒पौष्णाः॑

इ॒येत॒ल॒लामा॒स्तूप॒राः॑ । 45 (उ॒न्नतः॑ पञ्च॒विंश॑तिः) (A14)

5.6.15.1

कर्णा॑स्त्रयो॒ यामाः॑ सौ॒म्यास्त्रयः॑ श्वि॒तिङ्गा अ॒ग्नये॑ यवि॒ष्ठाय॑ त्रयो॒
नकु॑लास्ति॒स्रो रोहि॑णीस्त्र्यव्य॒स्ता व॒सूनां॑ ति॒स्रोऽरु॑णा दि॒त्यौह्य॑स्ता
रु॒द्राणां॑ सो॒मैन्द्रा॑ ब॒भ्रुल॑लामा॒स्तूप॒राः॑ । 46

(कर्णा॑स्त्रयो – विंश॑तिः) (A15)

5.6.16.1

शु॒ण्ठास्त्रयो॑ वैष्ण॒वा अ॒धीलो॒धकर्णा॑स्त्रयो वि॒ष्णव॑ उ॒रुक्र॑माय॒
ल॒फ्सु॒दिन॑स्त्रयो वि॒ष्णव॑ उ॒रुगा॑याय पञ्चा॒वीस्ति॒स्र आ॒दि॒त्यानां॑

त्रि॒व॒त्स॒सा-स्ति॒स्रो-ऽङ्गि॒र॒सामै॒न्द्रावै॒ष्णा॒वा गौ॒र॒ल॒लामा॒स्तूप॒राः । 47

(शु॒ण्ठा - वि॒ंश॒तिः) (A16)

5.6.17.1

इ॒न्द्रा॒य रा॒ज्ञे त्र॒यः शि॒तिपृ॒ष्ठा इ॒न्द्रा॒या-धि॒राजा॒य त्र॒यः शि॒तिक॒कुद॒
इ॒न्द्रा॒य स्व॒राज्ञे त्र॒यः शि॒तिभ॒स-द॒स्ति॒स्रस्तु॒र्यो॒ह्यः सा॒ध्यानां॑ ति॒स्रः
प॒ष्ठौह्यो॑ वि॒श्वेषां॑ दे॒वाना॒माग्ने॒न्द्राः कृ॒ष्णल॒लामा॒स्तूप॒राः । 48

(इ॒न्द्रा॒य रा॒ज्ञे - द्वावि॒ंश॒तिः) (A17)

5.6.18.1

अ॒दि॒त्यै त्र॒यो रो॒हितै॒ता इ॒न्द्रा॒ण्यै त्र॒यः कृ॒ष्णै॒ताः कु॒ह्वै॑
त्र॒योऽरु॒णै॒तास्ति॒स्रो धे॒नवो॑ रा॒कायै॑ त्र॒योऽन॒ड्वा॒हः सि॒नीवा॒ल्या
आ॒ग्ना॒वैष्णा॒वा रो॒हित॒ल॒लामा॒स्तूप॒राः । 49

(अ॒दि॒त्या - अ॒ष्टाद॒श) (A18)

5.6.19.1

सौ॒म्यास्त्र॒यः पि॒शंगाः॑ सो॒माय॑ रा॒ज्ञे त्र॒यः सा॒रङ्गाः॑ पा॒र्जन्या॑
न॒भो॒रूपा॒स्ति॒स्रोऽजा॑ म॒ल्हा इ॒न्द्रा॒ण्यै ति॒स्रो मे॒ष्य आ॒दि॒त्या

द्या॒वापृ॒थि॒व्या॒ मा॒लं॑गास्तू॒पराः॑ । 50

(सौ॒म्या – ए॒कान्न॑ वि॒शतिः॑) (A19)

5.6.20.1

वा॒रुणा॑स्त्रयः॒ कृ॒ष्णल॑लामा वरु॒णाय॑ रा॒ज्ञे त्रयो॑ रो॒हितल॑लामा वरु॒णाय॑
रि॒शाद॑से त्रयो॒ऽरुण॑ललामाः शि॒ल्पा॑स्त्रयो वैश्वदे॒वास्त्रयः॑ पृ॒श्नयः॑
सर्व॑दे॒वत्या॑ ऐ॒न्द्रासू॑राः श्ये॒तल॑लामास्तू॒पराः॑ । 51

(वा॒रुणा – वि॒शतिः॑) (A20)

5.6.21.1

सो॒माय॑ स्वर॒ाज्ञे – ऽनो॒वाहा॑वन॒ड्वाहा॑ – वि॒न्द्राग्नि॑भ्या –
मो॒जोदा॑भ्यामु॒ष्टारा॑ – वि॒न्द्राग्नि॑भ्यां बल॒दाभ्या॑ ऽ सी॒रवा॑हाववी द्वे धे॒नू
भौमी॑ दि॒ग्भ्यो वड॑बे द्वे धे॒नू भौमी॑ वैरा॒जी पु॒रुषी॑ द्वे धे॒नू भौमी॑ वयव॑
आ॒रोह॑णवा॒हावन॒ड्वाहौ॑ वा॒रुणी॑ कृ॒ष्णे व॒शे अ॒राड्यौ॑ दि॒व्यावृ॑षभौ
प॒रिम॑रौ । 52 (सो॒माय॑ स्वर॒ाज्ञे – चतु॑स्त्रि॒शत्) (A21)

5.6.22.1

ऐ॒का॒द॒श॒ प्रा॒त॒र्ग॒व्याः॒ प॒श॒व॒ आ॒ ल॒भ्य॒न्ते॒ छ॒ग॒लः॒ क॒ल्मा॒षः॒
कि॒कि॒दी॒वि॒र्वि॒दी॒ग॒य॒स्ते॒ त्वा॒ष्ट्राः॒ सौ॒री॒र्न॒व॒ श्वे॒ता॒ व॒शा॒ अ॒नू॒ब॒न्ध्या॒
भ॒व॒न्त्या॒ग्ने॒य॒ ऐ॒न्द्रा॒ग्न॒ आ॒श्वि॒न॒स्ते॒ वि॒शा॒ल॒यू॒प॒ आ॒ ल॒भ्य॒न्ते॒ । 53

(ऐ॒का॒द॒श॒ प्रा॒तः॒ – प॒ञ्च॒वि॒ंश॒तिः॒) (A22)

5.6.23.1

पि॒श॒ङ्गा॒स्त्र॒यो॒ वा॒स॒न्ताः॒ सा॒र॒ङ्गा॒स्त्र॒यो॒ ग्रै॒ष्माः॒ पृ॒ष॒न्त॒स्त्र॒यो॒
वा॒र्षि॒काः॒ पृ॒श्न॒य॒स्त्र॒यः॒ शा॒र॒दाः॒ पृ॒श्नि॒स॒क्था॒स्त्र॒यो॒ है॒म॒न्ति॒का॒
अ॒व॒लि॒प्ता॒स्त्र॒यः॒ शै॒शि॒राः॒ सँ॒व॒त्स॒रा॒य॒ नि॒व॒क्ष॒सः॒ । 54

(पि॒श॒ङ्गा॒ – वि॒ंश॒तिः॒) (A23)

Special Korvai for Anuvaakam 12 to 20

रो॒हि॒तः॒ कृ॒ष्णा॒ धू॒म्र॒ल॒ला॒माः॒ – पृ॒श्निः॒ श्या॒मा॒ अ॒रु॒ण॒ल॒ला॒माः॒ –
शि॒ति॒बा॒हुः॒ शि॒ल्पाः॒ श्ये॒नीः॒ श्या॒म॒ल॒ला॒मा॒ – उ॒न्न॒तः॒ सि॒द्ध॒मा॒ धा॒त्रे॒
पौ॒ष्णाः॒ श्ये॒त॒ल॒ला॒माः॒ – क॒र्णा॒ ब॒भ्रु॒ल॒ला॒माः॒ – शु॒ण्ठा॒ गौ॒र॒ल॒ला॒मा॒
– इ॒न्द्रा॒य॒ कृ॒ष्णाल॒ला॒मा॒ – आ॒दि॒त्यै॒ रो॒हि॒त॒ ल॒ला॒मः॒ –
सौ॒म्या॒ मा॒ल॒ङ्गा॒ – वा॒रु॒णाः॒ सू॒राः॒ श्ये॒त॒ल॒ला॒मा॒ – द॒श॒ ।

Prasna Korvai with starting Padams of 1 to 23 Anuvaakams :-

(हिरण्यवर्णा - अपां ग्रहान् - भूतेष्टकाः - सजूः - सँवथ्सरं -
प्रजापतिः स क्षुरपवि - रवग्नेर्वै दीक्षया - सुवर्गाय तं यन्न -
सूयते - प्रजापतिर् ऋतुभी - रोहितः - पृश्निः - शितिबाहु -
रुन्नतः - कर्णाः - शुण्ठा - इन्द्राया- दित्यै - सौम्या - वारुणाः
- सोमायै - कादश - पिशङ्गा - स्त्रयोविंशतिः)

Korvai with starting Padams of 1, 11, 21 Series of Panchaatis :-

(हिरण्यवर्णा - भूतेष्टकाः - छन्दो यत् - कनीयाँसन्-
त्रिवृद्ध्यग्नि - वारुणा - श्वतुष्पञ्चाशत्)

First and Last Padam of Sixth Prasnam of 5th Kandam

(हिरण्यवर्णा - निवक्षसः)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे षष्ठः प्रश्नः समाप्तः ॥

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

5.7 पञ्चमकाण्डे सप्तमः प्रश्नः—उपानुवाक्यावशिष्टकर्मनिरूपणं

5.7.1.1

यो वा अ॒य॒था॒दे॒व॒त॒म॒ग्निं॑ चि॒नु॒त आ दे॒व॒ता॒भ्यो॑ वृ॒श्च॒य॒ते पा॒पी॒या॒न्
भव॒ति यो य॒था॒दे॒व॒तं॑ न दे॒व॒ता॒भ्य आ॑ वृ॒श्च॒य॒ते व॒सी॒या॒न् भव॒त्याग्ने॒य्या
गा॒य॒त्रि॒या प्र॒थ॒मां चि॒ति॒म॒भि मृ॒शे॒त् त्रि॒ष्टु॒भा द्वि॒ती॒यां जग॑त्या
तृ॒ती॒या॒म॒नु॒ष्टु॒भा च॒तु॒र्थीं प॒ङ्क्त्या॑ पञ्च॒मीं य॒था॒दे॒व॒त॒मे॒वाग्निं॑ चि॒नु॒ते न
दे॒व॒ता॒भ्य आ॑ वृ॒श्च॒य॒ते व॒सी॒या॒न् भव॒ती॒डा॒यै वा ए॒षा वि॒भक्तिः॑ प॒शव॑
इ॒डा प॒शु॒भिरे॒न— [] 1

5.7.1.2

—चि॒नु॒ते यो वै प्र॒जा॒प॒तये॑ प्र॒ति प्रो॒च्याग्निं॑ चि॒नो॒ति नाऽऽ*ति॒मा॒र्च्छ—
त्य॒श्वा॒व॒भि॒त॒स्ति॒ष्ठेतां॑ कृ॒ष्ण उत्त॑रतः श्वे॒तो दक्षि॑ण॒स्तावा॒ल॒भ्येष्ट॑का उप
द॒ध्या॒दे॒त॒द्वै प्र॒जा॒प॒ते रू॒पं प्रा॒जा॒प॒त्योऽश्वः॑ सा॒क्षादे॒व प्र॒जा॒प॒तये
प्र॒तिप्रो॒च्याग्निं॑ चि॒नो॒ति नाऽऽ*ति॒मा॒र्च्छत्ये॒तद्वा अ॒हो रू॒पं

यच्छ्वेतोऽश्वो रात्रियै कृष्ण एतदहो- [] 2

5.7.1.3

रूपं यदिष्टका रात्रियै पुरीषमिष्टका उपधास्यज्छ्वेतमश्वमभि मृशेत्
पुरीषमुपधास्यन् कृष्णमहोरात्राभ्यामेवैनं चिनुते हिरण्य पात्रं मधोः
पूर्णं ददाति मधव्योऽसानीति सौर्या चित्रवत्याऽवैक्षते चित्रमेव भवति
मध्यंदिनेऽश्वमव घ्रापयत्यसौ वा आदित्य इन्द्र एष प्रजापतिः
प्राजापत्योऽश्वस्तमेव साक्षादृध्नोति । 3

(एन - मेतदहो - ऽष्टाचत्वारिंशच्च) (A1)

5.7.2.1

त्वामग्ने वृषभं चेकितानं पुनर्युवानं जनयन्नुपागां ।
अस्थूरि णो गार्हपत्यानि सन्तु तिग्मेन नो ब्रह्मणा सञ् शिशाधि ।
पशवो वा एते यदिष्टकाश्चित्यां चित्यामृषभमुप दधाति
मिथुनमेवास्य तद्-यज्ञे करोति प्रजननाय तस्माद्-यूथेयूथ ऋषभः ।
संवत्सरस्य प्रतिमां यां त्वा रात्र्युपासते ।
प्रजाञ् सुवीरां कृत्वा विश्वमायुर्व्यश्नवत् । प्राजापत्या- [] 4

5.7.2.2

–मे॒तामु॒प॒ द॒धाती॒यं वा॒ वैषै॑का॒ष्टका॒ यदे॒वैका॑ष्टका॒याम॒न्नं॑
 क्रि॒यते॒ तदे॒वैत॒याव॒ रुन्ध॑ ए॒षा वै प्र॒जाप॑तेः का॒मदु॒घा तयै॒व
 यज॑मा॒नोऽमु॒ष्मिन् लो॒केऽग्निं॑ दु॒हे येन॑ दे॒वा ज्यो॒तिषो॑र्ध्वा उ॒दाय॑न्
 येनाऽऽदि॒त्या वस॑वो॒ येन॑ रु॒द्राः । येनाङ्गि॑रसो॒ महि॑मान–मा॒नशु॑स्तेनै॒तु
 यज॑मानः स्व॒स्ति । सु॒वर्गा॒य वा ए॒ष लो॒काय॑ – [] 5

5.7.2.3

ची॒यते॒ यद॒ग्निर्ये॑न॒ देवा॑ ज्यो॒तिषो॑र्ध्वा उ॒दाय॑न्नित्यु॒ख्यं समि॑न्ध
 इ॒ष्टका॑ ए॒वैता॑ उप॒ धत्ते॑ वा॒नस्प॑त्याः सु॒वर्ग॑स्य लो॒कस्य॑ सम॒ष्ट्यै
 श॒तायु॑धाय श॒तवी॑र्याय श॒तोत॑ये ऽभि॒माति॑षाहे ।
 श॒तं यो नः॑ श॒रदो॑ अजी॒तानि॑न्द्रो नेष॒दति॑ दु॒रितानि॑ विश्वा ।
 ये च॒त्वारः॑ प॒थयो॑ दे॒वयाना॑ अ॒न्तरा॑ द्यावापृ॒थिवी॑ वि॒यन्ति॑ ।
 तेषां॑ यो अज्या॒नि– मजी॑ति–मा॒वहा॑त् तस्मै॑ नो दे॒वाः – [] 6

5.7.2.4

परि॑ दत्ते॒ह सर्वे॑ ।
 ग्री॒ष्मो हे॒मन्त॑ उ॒त नो॑ वस॒न्तः शर॑द् वर्॒षाः सु॒वि॒तन्नो॑ अस्तु ।
 तेषा॑मृ॒तूनां॑ श॒त शार॑दानां नि॒वात॑ ए॒षाम॑भये स्याम ।
 इ॒दुव॑त्स॒राय॑ परि॒वत्स॑राय॒ संव॑त्स॒राय॑ कृ॒णु॒ता बृ॑हन्नमः ।
 तेषां॑ व॒यं सु॒म॒तौ य॒ज्ञिया॑नां॒ ज्यो॒गजी॑ता अ॒हताः॑ स्याम ।
 भ॒द्रान्नः॑ श्रेयः॒ सम॑नैष्ट दे॒वास्त्वया॑ऽव॒सेन॑ सम॒शीम॑हि त्वा ।
 स नो॑ म॒यो भूः पि॒तो- [] 7

5.7.2.5

आ वि॒शस्व॑ शं तो॒काय॑ त॒नुवे॑ स्योनः ।
 अ॒ज्यानी॑रेता उप॒ दधा॑त्येता वै दे॒वता॑ अ॒परा॑जितास्ता ए॒व प्र वि॑शति
 नैव जी॑यते ब्र॒ह्मवा॑दिनो वदन्ति यदर्ध॒मासा॑ मा॒सा ऋ॒तवः॑ सं॒वत्स॑र
 ओष॑धीः प॒चन्त्य॑थ कस्मा॒दन्या॑भ्यो दे॒वता॑भ्य आग्रयणं निरु॒प्यत॑
 इत्ये॒ता हि तद्-दे॒वता॑ उ॒दज॑यन् यदृ॒तुभ्यो॑ निर्व॒पेद् दे॒वता॑भ्यः सम॒दं
 दध्या॑दाग्रयणं () निरु॒प्यैता॑ आहु॒ती जु॑होत्यर्ध॒मासाने॑व

मा॒सानृ॒तून्त्सँ॑व॒त्सरं॑ प्री॒णाति॑ न दे॒वता॑भ्यः स॒मदं॑ दधाति भ॒द्रान्नः॑
 श्रेयः॑ स॒मनै॑ष्ट दे॒वा इत्या॑ह हु॒ताद्या॑य यज॒मान॑स्याऽपराभावाय । 8
 (प्र॒जाप॑त्यां - लो॒काय॑ - दे॒वाः - पि॒तो - द॒ध्यादा॑ग्रयणं -
 पञ्च॑विं॒शति॑श्च) (A2)

5.7.3.1

इन्द्र॑स्य वज्रो॑ऽसि वा॒र्त्रघ्न॑स्तनूपा नः प्र॒तिस्प॑शः ।
 यो नः॑ पु॒रस्ता॑द् दक्षि॒णतः॑ पश्चा॒-दु॒त्तरतो॑-ऽघा॒युरभि॑दासत्येत॑
 सोऽश्मान॑मृच्छतु । दे॒वासुराः॑ सँय॑न्ता आसन् तेऽसुरा दिग्भ्य
 आऽबा॑धन्त तान् दे॒वा इष्वा॑ च वज्रेण॑ चापा॒नुद॑न्त यद्-
 वज्रि॑णीरुप॒दधा॑तीष्वा चै॒व तद्-वज्रेण॑ च यज॒मानो॑ भ्रातृ॒व्यानप॑ नुदते
 दिक्षू॑प - [] 9

5.7.3.2

दधाति॑ दे॒वपुरा॑ ए॒वैता॑स्तनूपा॒नीः पर्यू॑हते ऽग्ना॒विष्णू॑ स॒जोष॑सेमा
 वर्ध॑न्तु वा॒ंगिरः॑ । द्यु॒म्नैर्वा॑जेभि॒रा ग॑तं । ब्र॒ह्मवा॑दिनो॒ वद॑न्ति यन्न
 दे॒वता॑यै जु॒ह्वत्य॑थ किं दे॒वत्या॑ वसो॒धरि॑त्यग्नि-र्वसु॒स्तस्यै॑षा धारा॒

विष्णु-र्वसुस्तस्यैषा धारा ऽग्नावैष्णव्यर्चा वसोर्धारां जुहोति
भागधेयेनैवैनौ समर्धयत्यथो एता- [] 10

5.7.3.3

-मेवाहुतिमायतनवतीं करोति यत्काम एनां जुहोति तदेवाव रुन्धे
रुद्रो वा एष यदग्निस्तस्यैते तनुवौ घोराऽन्या शिवाऽन्या
यच्छतरुद्रीयं जुहोति यैवास्य घोरा तनूस्तां तेन शमयति
यद्-वसोर्धारां जुहोति यैवास्य शिवा तनूस्तां तेन प्रीणाति यो वै
वसोर्धारायै-[] 11

5.7.3.4

प्रतिष्ठां वेद प्रत्येव तिष्ठति यदाज्यमुच्छिष्येत तस्मिन्
ब्रह्मौदनं पचेत् तं ब्राह्मणाश्चत्वारः प्राश्नीयुरेष वा
अग्निर्वैश्वानरो यद्ब्राह्मण एषा खलु वा अग्नेः प्रिया
तनूर्यद्-वैश्वानरः प्रियायामेवैनां तनुवां प्रति ष्ठापयति चतस्रो
धेनूर्दद्यात् ताभिरेव यजमानोऽमुष्मिन् लोकेऽग्निं दुहे । 12

(उपै - तां - धारायै - षट्चत्वारिंशच्च) (A3)

5.7.4.1

चि॒त्तिं जु॒हो॒मि॒ मन॑सा॒ घृ॒तेने॒त्याहा॑दा॒भ्या॒ वै ना॒मैषा॑ऽऽ*हु॒तिर्वै॑श्व॒कर्म॑णी
नैनं॑ चि॒क्या॒नं भ्रा॑तृ॒व्यो द॒भ्नो॒त्यथो॑ दे॒वता॑ ए॒वाव॑ रु॒न्धे
ऽग्ने॑ तम॒द्येति॑ प॒ङ्क्त्या॑ जु॒होति॑ प॒ङ्क्त्या॑ऽऽहु॒त्या य॒ज्ञमु॒खमा॑ र॒भते
स॒प्त ते॑ अ॒ग्ने स॒मिधः॑ स॒प्तजि॒ह्वा इ॒त्याह॑ हो॒त्रा ए॒वाव॑ रु॒न्धे
ऽग्नि॑र्दे॒वेभ्यो॑ऽपा॒क्राम॑द्-भा॒गधे॑य-[] 13

5.7.4.2

-मि॒च्छ॒मान॑स्तस्मा॑ ए॒तद्-भा॒गधे॑यं प्रा॒यच्छ॑न्ने॒तद्वा
अ॒ग्नेर॑ग्नि॒होत्र॑मे॒तर्हि॑ ख॒लु वा॑ ए॒ष जा॒तो यर्हि॑ स॒र्वश्चि॑तो
जा॒तायै॑वास्मा॒ अन्न॑मपि॒ दधा॑ति स ए॒नं प्री॑तः प्री॒णाति॑ व॒सीया॑न्
भव॑ति ब्र॒ह्मवा॑दि॒नो व॑दन्ति॒ यदेष॑ गा॒र्हप॑त्यश्ची॒यते॑ऽथ
क्वा॒स्याऽऽह॑वनी॒य इ॒त्यसा॑वा॒दित्य॑ इति॒ ब्रू॒यादे॑तस्मिन्
हि स॒र्वाभ्यो॑ दे॒वता॑भ्यो॒ जुह॑ति - [] 14

5.7.4.3

य॒ एवं॑ वि॒द्वान॒ग्निं॑ चि॒नुते॑ सा॒क्षादे॒व दे॒वता॑ ऋ॒ध्नो॒त्यग्ने॑
यश॑स्विन् यश॑से म॒मर्प॑येन्द्रा॒वती॑ म॒पचि॑ती मि॒हाऽऽव॑ह ।
अयं॑ मूर्धा॑ पर॒मेष्ठी॑ सु॒वर्चाः॑ स॒माना॑नामु॒त्तम॑ श्लो॒को अ॑स्तु ।
भ॒द्रं प॑श्यन्त॒ उप॑ से॒दुर॒ग्रे तपो॑ दी॒क्षामृ॑षयः सु॒वर्वि॑दः ।
ततः॑ क्ष॒त्रं ब॒लमो॑जश्च जा॒तं तद॒स्मै दे॒वा अ॒भि सं॑ न॒मन्तु॑ ।
धा॒ता वि॒धाता॑ पर॒मो- [] 15

5.7.4.4

-त॒ स॒न्दृक् प्र॒जाप॑तिः पर॒मेष्ठी॑ वि॒राजा॑ ॥
स्तो॒माः छ॒न्दाँ॑सि नि॒विदो॑ म आ॒हुरेत॒स्मै रा॒ष्ट्रम॒भि सं॑ न॒माम॑ ।
अ॒भ्याव॑र्तद्ध्व॒मुप॑ मे॒त सा॒कम॑यँ श॒स्ताऽधि॑पतिर्वो अ॒स्तु ।
अ॒स्य वि॒ज्ञान॑मनु सँ र॒भध्व॑मिमं प॒श्चाद॑नु जी॒वाथ॑ सर्वे ।
रा॒ष्ट्रभृ॑त ए॒ता उप॑ दधा॒त्येषा॑ वा अ॒ग्नेश्चि॑ती रा॒ष्ट्रभृ॑त् तयै॒वास्मि॑न् रा॒ष्ट्रं
दधा॑ति () रा॒ष्ट्रमे॒व भ॑वति नास्माद् रा॒ष्ट्रं भ्रँ॑शते । 16

(भा॒ग॒धेयं॑ - जु॒ह्वति॑ - पर॒मा - रा॒ष्ट्रं द॑धाति - स॒प्त च॑) (A4)

5.7.5.1

यथा॑ वै पु॒त्रो जा॒तो म्रि॒यते॑ ए॒वं वा॑ ए॒ष म्रि॒यते॑ यस्या॒ग्निरु॒ख्य
उ॒द्वाय॑ति॒ यन्निर्म॑न्थ्यं॒ कुर्या॑द्-वि॒च्छिन्दा॑द्-भ्रातृ॒व्यम॑स्मै॒ जनये॑त् स
ए॒व पुनः॑ प॒रीध्यः॑ स्वा॒देवैनं॑ यो॒नेर्जन॑यति॒ नास्मै॑ भ्रातृ॒व्यं जन॑यति
तमो॑ वा ए॒तं गृ॒ह्णाति॑ यस्या॒ग्निरु॒ख्य उ॒द्वाय॑ति॒ मृत्यु॑स्तमः॒ कृष्णं॑
वा॒सः कृ॒ष्णा धे॒नुर्दक्षि॑णा॒ तमसै॑- [] 17

5.7.5.2

-व तमो॑ मृत्यु॒मप॑ ह॒ते हि॒रण्यं॑ द॒दाति॑ ज्योति॒र्वै हि॒रण्यं॑ ज्योति॒षैव॑
तमो॑ऽप॒ ह॒तेऽथो॑ तेजो॒ वै हि॒रण्यं॑ तेज॒ एवाऽऽ*त्मन्॑ ध॒त्ते सु॒वर्नं॑
घ॒र्मः स्वा॒हा सु॒वर्नाऽर्कः॑ स्वा॒हा सु॒वर्नं॑ शु॒क्रः स्वा॒हा सु॒वर्नं॑ ज्योतिः॒
स्वा॒हा सु॒वर्नं॑ सूर्यः॒ स्वा॒हा ऽर्को॑ वा ए॒ष यद॑ग्निर॒सावादि॑त्यो- [] 18

5.7.5.3

ऽश्व॑मे॒धो यदे॒ता आ॒हुती॑ जु॒होत्य॑र्का-श्वमे॒धयो॒रेव॑ ज्योती॒र्षि
सं द॑धात्येष॒ ह त्वा॑ अ॒र्काश्व॑मे॒धी यस्यै॒तद॑ग्नौ॒ क्रिय॑त
आपो॑ वा इ॒दम॑ग्रे॒ सलिल॑मासीत् स ए॒तां प्र॑जापतिः॒ प्रथ॑मां

चि॒तिम॑पश्य॒त् तामु॑पा॒धत्त॑ तदि॒यम॑भवत् तं वि॒श्वक॑र्माऽब्रवी॒दुप॑
त्वाऽऽया॒नीति॑ नेह॒ लोको॑ऽस्तीत्य॑- [] 19

5.7.5.4

-ब्रवी॒थ् स ए॒तां द्वि॒तीयां॑ चि॒तिम॑पश्य॒त् तामु॑पा॒धत्त॑ तदन्तरि॑क्षमभवत्
स य॒ज्ञः प्र॒जाप॑तिमब्रवी॒दुप॑ त्वाऽऽया॒नीति॑ नेह॒ लोको॑ऽस्तीत्य॑ब्रवी॒थ् स
वि॒श्वक॑र्माणमब्रवी॒दुप॑ त्वाऽऽया॒नीति॑ केन॒ मोपै॑ष्यसीति
दि॒श्याभि॑रित्यब्रवी॒त् तं दि॒श्याभि॑रुपै॒त् ता उ॑पा॒धत्त॑ ता दि॒शो- [] 20

5.7.5.5

ऽभव॑न्थ् स पर॒मेष्ठी॑ प्र॒जाप॑तिमब्रवी॒दुप॑ त्वाऽऽया॒नीति॑ नेह
लोको॑ऽस्तीत्य॑ब्रवी॒थ् स वि॒श्वक॑र्माणं च य॒ज्ञं चा॑ब्रवी॒दुप॑ वा॒मा ऽया॒नीति॑
नेह॒ लोको॑ऽस्तीत्य॑ब्रूता॒ऽ स ए॒तां तृ॒तीयां॑ चि॒तिम॑पश्य॒त् तामु॑पा॒धत्त॑
तद॒साव॑भवत् स आ॒दित्यः॑ प्र॒जाप॑ति-मब्रवी॒दुप॑ त्वा- [] 21

5.7.5.6

ऽया॒नीति॑ नेह॒ लोको॑ऽस्तीत्य॑ब्रवी॒थ् स वि॒श्वक॑र्माणं च य॒ज्ञं
चा॑ब्रवी॒दुप॑ वा॒माऽया॒नीति॑ नेह॒ लोको॑ऽस्तीत्य॑ब्रूता॒ऽ स

परमे॑ष्ठिनम॒ब्रवी॑दुप॒ त्वाऽऽया॑नीति॒ केन॑ मो॒पैष्य॑सीति॒ लोकं
पृ॒णये॑त्य॒ब्रवी॑त् तं लो॒कं पृ॒णयो॑पैत् तस्मा॒दया॑तयाम्नी॒ लोकं
पृ॒णाऽया॑तयामा॒ ह्यसा॑- [] 22

5.7.5.7

-वा॒दि॒त्य॒स्तानृ॑षयो॒ ऽब्रु॑वन्नुप॒ व आ॑ऽयामेति॒ केन॑ न उ॒पैष्य॑थेति॒
भू॒म्ने॒त्य॒ब्रुव॑न् तान् द्वा॒भ्यां चि॑ती॒भ्यामु॑पायन्थ् स पञ्च॑चिती॒कः
सम॑पद्यत॒ य एवं॑ वि॒द्वानग्निं॑ चि॒नुते॑ भू॒याने॑व भव॒त्यभी॑मान्
लो॒काञ्ज॑यति॒ विदु॑रेनं॒ देवा॑ अथो॒ एता॑सामे॒व दे॒वता॑नाञ् सायु॑ज्यं
गच्छ॑ति । 23 (तम॑सा - ऽऽदि॒त्यो - ऽस्ती॑ति - दि॒श - आ॒दि॒त्यः
प्र॒जाप॑तिम॒ब्रवी॑दुप॒ त्वा - ऽसौ - पञ्च॑चत्वारि॒ंशच्च॑) (A5)

5.7.6.1

वयो॑ वा अ॒ग्निर्य॑द॒ग्निचि॑त् पक्षि॑णो॒ऽश्नी॑यात् तमे॒वाग्नि॑म॒द्यादा॑-
र्ति॒माच्छे॑त् सँव॒त्सरं॑ व्र॒तं च॑रेथ् सँव॒त्सरञ् हि॒ व्रतं॑ नाति॒ पशु॑र्वा एष
यद॒ग्निर्हि॒नस्ति॒ खलु॒ वै तं॑ प॒शुर्य॑ एनं॒ पुर॑स्तात् प्र॒त्यञ्च॑मुप॒चर॑ति

तस्मात् पश्चात् प्रादुपचर्य आत्मनोऽहिंसायै तेजोऽसि तेजो मे
यच्छ पृथिवीं यच्छ -[] 24

5.7.6.2

पृथिव्यै मा पाहि ज्योतिरसि ज्योतिर्मे यच्छान्तरिक्षं यच्छान्तरिक्षान्मा
पाहि सुवरसि सुवर्मे यच्छ दिवं यच्छ दिवो मा पाहीत्याहैताभिर्वा
इमे लोका विधृता यदेता उपदधात्येषां लोकानां विधृत्यै
स्वयमातृणा उपधाय हिरण्येष्टका उपदधातीमे वै लोकाः
स्वयमातृणा ज्योतिर्हिरण्यं यथ स्वयमातृणा उपधाय- [] 25

5.7.6.3

हिरण्येष्टका उपदधाती-मानेवैताभि-लोका-ज्ज्योतिष्मतः कुरुतेऽथो
एताभिरेवास्मा इमे लोकाः प्र भान्ति यास्ते अग्ने सूर्ये रुच उद्यतो
दिवमातन्वन्ति रश्मिभिः । ताभिः सर्वाभी रुचे जनाय नस्कृधि ।
या वो देवाः सूर्ये रुचो गोष्वश्वेषु या रुचः । इन्द्राग्नी ताभिः
सर्वाभी रुचं नो धत्त बृहस्पते । रुचन्नो धेहि-[] 26

5.7.6.4

ब्रा॒ह्म॒णेषु॑ रुच॑ꣳ राज॑सु नस्कृ॑धि ।
रुचं॑ वि॒श्येषु॑ शू॒द्रेषु॑ मयि॑ धेहि॑ रुचा॑ रुचं॑ ।
द्वेधा॑ वा अ॒ग्निं चि॒क्या॒नस्य॑ यश॑ इन्द्रि॒यं गच्छ॑त्यग्निं
वा चि॒तमी॒जानं॑ वा यदे॒ता आहु॑तीर्जु॒होत्या॑त्मन्ने॒व यश॑ इन्द्रि॒यं धत्त॑
ईश्व॑रो वा ए॒ष आ॒र्तिमा॒र्तो॒र्योऽग्निं॑ चि॒न्वन्न॑धि॒ क्राम॑ति॒ तत्त्वा॑ यामि॒
ब्रह्म॑णा व॒न्दमा॒न इति॑ वा॒रुण्य॑र्चा- [] 27

5.7.6.5

जुहु॑याच्छान्ति॒रेवैषा॑ ऽग्नेर्गु॒प्तिरा॑त्मनो॒ हविष्कृ॑तो वा ए॒ष योऽग्निं॑
चि॒नुते॑ यथा॒ वै ह॒विः स्क॑न्दत्ये॒वं वा ए॒ष स्क॑न्दति॒ योऽग्निं॑ चि॒त्वा
स्त्रि॒यमु॑पैति॒ मैत्रा॑वरु॒ण्याऽऽ*मि॑क्षया॒ यजे॑त॒ मैत्रा॑वरु॒णता॑-
मेवो॑पै॒त्यात्म॑नो॒ ऽस्क॑न्दाय॒ यो वा अ॒ग्निमृ॑तु॒स्थां वे॒दतु॑र्ऋ॒तुरस्मै॑
कल्प॑मान॒ एति॑ प्र॒त्ये॒व तिष्ठ॑ति सँव॒थ्सरो॑ वा अ॒ग्निर्- [] 28

5.7.6.6

ऋ॒तु॒स्थास्तस्य॑ व॒सन्तः॑ शि॒रो॑ ग्री॒ष्मो दक्षि॑णः प॒क्षो वर्॒षाः
 पु॒च्छ॑ शर॒दुत्तरः॑ प॒क्षो हे॒मन्तो मध्यं॑ पूर्॒वपक्षा॑-श्चि॒तयोऽपर॑पक्षाः
 पु॒रीष-महो॑रात्राणी॒ष्टका ए॒ष वा अ॒ग्निर्ऋ॒तुस्था॑ य ए॒वं
 वै॒द॒तुर्ऋ॒तुस्मै कल्प॑मान ए॒ति प्रत्ये॑व ति॒ष्ठति प्र॒जाप॑तिर्वा
 ए॒तं ज्यैष्ठ्य॑कामो न्य॒धत्त॑ ततो॒ वै स ज्यैष्ठ्य॑मगच्छ॒द्य
 ए॒वं वि॒द्वानग्निं॑ चि॒नुते () ज्यैष्ठ्य॑मे॒व गच्छ॑ति । 29

(पृ॒थि॒वीं यँ॑च्छ - यथ् स्व॒यमा॒तृ॒ण्णा उप॑धाय - धे॒हृ - चा - ग्नि
 - श्चि॒नुते - त्री॑णि च) (A6)

5.7.7.1

यदा॑कू॒ताथ् स॒मसु॑स्रो॒द्धृदो॑ वा म॒नसो॑ वा सं॒भृतं॑ चक्षु॒षो वा ।
 तम॑नु प्रेहि सु॒कृत॑स्य लो॒कं यन्न॑र्षयः प्रथ॒मजा॑ ये पु॒राणाः ।
 ए॒तं स॒धस्थ॑ परि ते द॒दामि॑ यमा॒वहा॑च्छे॒वधिं जा॑तवे॒दाः ।
 अ॒न्वाग॑न्ता य॒ज्ञप॑तिर्वो अत्र त॒स्म जानी॑त पर॒मे व्यो॑मन् ।
 जानी॑तादे॒नं पर॑मे व्यो॒मन् दे॒वाः स॒धस्था॑ वि॒द रू॒पम॑स्य ।

यदागच्छात्- [] 30

5.7.7.2

पथिभिर्दे॒वयानै॑रिष्टापूर्ते॑ कृ॒णुतादा॑विरस्मै ।
सं प्र च्यव॑ध्वमनु॒ सं प्र या॑ताग्ने॒ पथो॑ दे॒वयाना॑न् कृ॒णुध्वं॑ ।
अस्मिन्त् स॒धस्थे॑ अ॒ध्युत्तर॑स्मिन् विश्वे॑ दे॒वा यज॑मानश्च सीदत ।
प्र॒स्तरे॑ण॒ परि॒धिना॑ सु॒चा वे॒द्या च॑ ब॒र्हिषा॑ ।
ऋ॒चेमं॑ य॒ज्ञं नो॑ वह॒ सुव॑र्दे॒वेषु॑ गन्तवे ।
यदिष्टं॑ यत् प॒रादानं॑ य॒द्दत्तं॑ या॒ च दक्षि॑णा । त - [] 31

5.7.7.3

-दग्निर्वै॑श्चकर्मणः॑ सुव॑र्दे॒वेषु॑ नो दधत् ।
येना॑ स॒हस्रं॑ व॒हसि॑ येनाग्ने॒ सर्व॑वेदसं ।
तेनेमं॑ य॒ज्ञं नो॑ वह॒ सुव॑र्दे॒वेषु॑ गन्तवे ।
येनाग्ने॒ दक्षि॑णा यु॒क्ता य॒ज्ञं व॑हन्त्यृ॒त्विजः॑ ।
तेनेमं॑ य॒ज्ञं नो॑ वह॒ सुव॑र्दे॒वेषु॑ गन्तवे ।
येनाग्ने॒ सु॒कृतः॑ प॒था म॒धोर्धारा॑ व्या॒नशुः॑ ।

ते॒नेमं॑ य॒ज्ञं नो॑ वह॒ सुव॑र्दे॒वेषु॑ गन्त॒वे () ।

यत्र॑ धारा॑ अन॒पेता॑ म॒धो॒र्घ॒तस्य॑ च याः ।

तद॒ग्निर्वै॑श्व॒कर्म॑णः सुव॑र्दे॒वेषु॑ नो दधत् । 32

(आगच्छात् - त - द्वयानशुस्तेनेमं य॒ज्ञं नो॑ वह॒ सुव॑र्दे॒वेषु॑ गन्त॒वे
- चतु॑र्दश च) (A7)

5.7.8.1

यास्ते॑ अ॒ग्ने स॒मिधो॑ या॒नि धाम॑ या जि॒ह्वा जा॑तवे॒दो यो अ॒र्चिः ।

ये ते॑ अ॒ग्ने मे॒डयो॑ य इ॒न्द्रव॒स्तेभि॑रा॒त्मानं॑ चि॒नुहि॑ प्र॒जान॑न् ।

उ॒त्सन्न॑य॒ज्ञो वा ए॒ष यद॑ग्निः किं वा॒ऽहै॒तस्य॑ क्रि॒यते॑

किं वा॑ न यद्वा अ॒ध्वर्यु॑-र॒ग्नेश्चि॒न्वन्-॑न्त॒रेत्या॑त्म॒नो वै

तद॒न्तरे॑ति॒ यास्ते॑ अ॒ग्ने स॒मिधो॑ या॒नि-[] 33

5.7.8.2

धा॒मेत्या॑है॒षा वा अ॒ग्नेः स्व॑यं चि॒तिर॒ग्निरे॒व तद॑ग्निं

चि॒नोति॑ नाध्व॒र्युरा॑त्म॒नोऽन्त॑रेति चत॒स्र आ॑शाः

प्र॒चर॑न्त्व॒ग्नय॑ इ॒मं नो॑ य॒ज्ञं न॑यतु प्र॒जान॑न् ।

घृ॒तं पि॒न्वन्न॒जर॑ सु॒वीरं॑ ब्र॒ह्म स॒मिद्-भ॒वत्याहु॑तीनां ।
 सु॒वर्गा॒य वा ए॒ष लो॒कायोप॑ धी॒यते॑ यत् कू॒र्मश्च॑त॒स्र आ॒शाः
 प्र च॒रन्त्व॒ग्नय॑ इ॒त्याह॑-[] 34

5.7.8.3

दि॒श ए॒वैते॒न प्र जा॑नातीमं नो य॒ज्ञं न॑यतु प्र॒जा॒नन्नि॒त्याह॑ सु॒वर्ग॑स्य
 लो॒कस्या॑भिनी॒त्यै ब्र॒ह्म स॒मिद्-भ॒वत्याहु॑तीना-मि॒त्याह॑ ब्र॒ह्मणा॑ वै
 दे॒वाः सु॒वर्गं लो॒कमा॑यन् यद्-ब्र॒ह्मण्व॑त्योप॒दधा॑ति ब्र॒ह्मणै॑व तद्-
 यज॑मानः सु॒वर्गं लो॒कमे॑ति प्र॒जाप॑तिर्वा ए॒ष यद॑ग्निस्तस्य प्र॒जाः
 प॒शवः॑ छन्दा॒सि रू॒पं स॒र्वान् वर्णा॑निष्ट॒कानां॑ () कुर्या॑द् रू॒पेणै॑व
 प्र॒जां प॒शून् छन्दा॒स्यव॑ रुन्धेऽथो॑ प्र॒जाभ्य॑ ए॒वैनं॑ प॒शुभ्यः॑ छन्दा॒भ्यो
 ऽव॑रुद्ध्य चिनुते । 35

(यान्य - ग्नय इत्याहे - ष्टकानां - षोडश च) (A8)

5.7.9.1

म॒यि गृ॒ह्णाम्य॑ग्रे अ॒ग्निं रा॒यस्पोषा॑य सु॒प्रजा॑स्त्वाय सु॒वीर्या॑य ।
 म॒यि प्र॒जां म॒यि वर्चो॑ द॒धाम्य॑रि॒ष्टाः स्याम॑ त॒नुवा॑ सु॒वीराः॑ ।

यो नो॑ अ॒ग्निः पि॒तरो ह॒थ॒स्वन्त॒रम॒र्त्यो म॒र्त्याँ॒ आवि॒वेश॑ ।
तमा॒त्मन् परि॑ गृ॒ह्णीम॑हे वयं मा सो अ॒स्माँ॒ अव॒हाय॑ परा॒ गात् ।
यद॑ध्व॒र्युरा॒त्मन्न॒ग्निम॒-गृ॒हीत्वा॒ऽग्निं चि॒नुया॑द्यो॒ऽस्य
स्वो॑ऽग्निस्तमपि - [] 36

5.7.9.2

यज॑मानाय चि॒नुया॑द॒ग्निं ख॒लु वै प॒शवो॑ऽनूप॒ तिष्ठ॑न्तेऽप॒क्रामु॑का
अ॒स्मात् प॒शवः॑ स्यु॒र्मयि॑ गृ॒ह्णाम्य॑ग्रे अ॒ग्निमि॒त्याहा॑ऽऽत्म॒न्नेव
स्वम॒ग्निं दा॑धार ना॒स्मात् प॒शवो॑ऽप॒ क्राम॑न्ति ब्र॒ह्मवा॑दिनो॒ वद॑न्ति
यन्मृ॑च्चाऽऽप॒श्चाग्ने॑रनाद्यमथ॒ कस्मान्मृ॑दा चा॒द्भिश्चा॒ग्निश्ची॑यत
इति॑ यद॒द्भिः सं॒ यौ - [] 37

5.7.9.3

-त्यापो॑ वै सर्वा॑ दे॒वता॑ दे॒वता॑भिरे॒वैनँ॒ सँ॒ सृज॑ति
यन्मृ॑दा चि॒नोती॑यं वा अ॒ग्निर्वै॑श्चान॒रोऽग्नि॑नैव तद॒ग्निं चि॒नोति॑
ब्र॒ह्मवा॑दिनो॒ वद॑न्ति यन्मृ॑दा चा॒द्भिश्चा॒ग्निश्ची॑यतेऽथ
कस्मा॑द॒ग्निरु॑च्यत इति॑ यच्छ॒न्दोभि॑-श्चि॒नोत्य॒ग्नयो॑ वै छ॒न्दाँ॒सि

तस्मा॑द॒ग्निरु॑च्यतेऽथो॑ इ॒यं वा॑ अ॒ग्निर्वै॑श्वा॒नरो॑ य - [] 38

5.7.9.4

-न्मृ॒दा चि॑नोति॒ तस्मा॑द॒ग्निरु॑च्यते॒ हिर॑ण्येष्ट॒का उप॑ दधाति॒ ज्योति॑र्वै
हिर॑ण्यं ज्योति॑रेवाऽस्मिन् दधा॒त्यथो॑ तेजो॒ वै हिर॑ण्यं तेज
एवाऽऽ*त्मन् ध॑त्ते यो वा अ॒ग्निः सर्व॑तो॒मुखं॑ चि॒नुते॑ सर्वा॒सु
प्र॒जास्व॑न्नम॒त्ति सर्वा॑ दि॒शोऽभि॑ जयति॒ गाय॑त्रीं पु॒रस्ता॑दुप॒ दधा॑ति
त्रि॒ष्टुभं॑ दक्षि॒णतो॑ जगतीं प॒श्चाद॑नुष्टु॒भमु॑त्तरतः पङ्क्तिं मध्य एष वा ()
अ॒ग्निः सर्व॑तो॒मुखस्तं॑ य एवं वि॒द्वाञ्चि॑नुते सर्वा॒सु प्र॒जास्व॑न्नम॒त्ति
सर्वा॑ दि॒शोऽभि॑ जयत्यथो दि॒श्येव॑ दि॒शं प्र॑ वयति॒ तस्मा॑द्-दि॒शि
दिक् प्रो॑ता । 39 (अपि॑ - स॒यौति॑ - वैश्वा॒नरो॑ य - दे॒ष वै -
पञ्च॑वि॒ंशति॑श्च) (A9)

5.7.10.1

प्र॒जाप॑तिर॒ग्निम॑सृजत॒ सोऽस्मा॑त् सृष्टः प्राङ् प्रा॒द्वत् तस्मा॑ अश्वं
प्र॒त्यास्य॑त् स दक्षि॒णाऽऽव॑र्तत॒ तस्मै॑ वृ॒ष्णिं प्र॒त्यास्य॑त् स
प्र॒त्यङ्वाऽव॑र्तत॒ तस्मा॑ ऋष॒भं प्र॒त्यास्य॑त् स उद॒ङ्वाऽव॑र्तत

तस्मै॑ ब॒स्तं प्र॒त्यास्य॑त् स ऊ॒र्ध्वोऽ॒द्रव॑त् तस्मै॑ पु॒रुषं॑
प्र॒त्यास्य॑द्यत् प॒शुशी॒र्षाण्यु॑प॒दधा॑ति सर्व॑त ए॒वैन॑- [] 40

5.7.10.2

मव॑रु॒द्ध्य चि॑नुत ए॒ता वै प्रा॑णभृ॒त-श्चक्षु॑ष्मती॒रिष्ट॑का यत् प॒शुशी॒र्षाणि॑
यत् प॒शुशी॒र्षाण्यु॑प॒दधा॑ति ताभि॑रेव यज॑मानोऽमु॒ष्मिन् लो॒के
प्राणि॑त्यथो ताभि॑रेवास्मा॒ इमे लो॒काः प्र भा॑न्ति मृ॒दाऽभि॑लिप्योप
दधा॑ति मे॒ध्यत्वाय॑ प॒शुर्वा ए॒ष यद॑ग्निरन्नं प॒शव॑ ए॒ष खलु॑ वा
अ॒ग्निर्यत् प॒शुशी॒र्षाणि॑ यं का॒मये॑त क॒नीयोऽस्या॑न्नञ् - [] 41

5.7.10.3

स्या॑दिति सं॒तरां तस्य॑ प॒शुशी॒र्षाण्यु॑प॒ दध्या॑त् क॒नीय॑ ए॒वास्या॑न्नं
भव॑ति यं का॒मये॑त स॒माव॑दस्या॑न्नञ् स्या॑दिति म॒ध्यत॑स्तस्योप॒ दध्या॑त्
स॒माव॑-दे॒वास्या॑न्नं भव॑ति यं का॒मये॑त भू॒योऽस्या॑ऽन्नञ् स्या॑दित्यन्तेषु
तस्य॑ व्यु॒दूह्यो॑प॒ दध्या॑दन्तत ए॒वास्मा॑ अ॒न्नम॑व रुन्धे भू॒योऽस्या॑न्नं
भव॑ति () । 42 (ए॒न- म॒स्या॑न्नं - भू॒योऽस्या॑ऽन्नं भव॑ति) (A10)

5.7.11.1

स्ते॒गान् द॒ष्ट्रा॑भ्यां म॒ण्डू॒कान् जं॑भ्येभिराद॒कां-खा॑देनोर्ज॒ः
स॒ः सू॒देनाऽऽरण्यं॑ जा॒न्वी॒लेन॑ मृदं॒ ब॒र्स्वे॒भिः शर्क॑राभिरव॒काम॑व॒काभिः
शर्क॑रामुत्सादेन जिह्वा॒मव॑क्रन्देन तालु॒ः सर॑स्वतीं जिह्वा॒ग्रेण॑ । 43

(स्ते॒गान् - द्वावि॑ंशतिः) (A11)

5.7.12.1

वाज॒ः ह॒नू॒भ्यामप॑ आ॒स्ये॒नाऽऽदि॑त्या-ञ्छमश्रु॒भि-रु॒पया॑म-
म॒धरे॑णोष्ठेन स॒दुत्त॑रेणान्तरेणा-नू॒काशं॑ प्र॒काशे॑न बाह्य॒ः स्तन॑यितुं
नि॒र्बा॒धेन॑ सू॒र्याग्नी॑ चक्षु॒भ्यां वि॑द्युतौ क॒नान॑काभ्याम॒शनिं॑ म॒स्तिष्के॑ण
बलं॑ म॒ज्ज॑भिः । 44 (वाजं॑ पञ्चवि॑ंशतिः) (A12)

5.7.13.1

कू॒र्मा-ञ्छ॒फैर॑च्छलाभिः क॒पिञ्ज॑लान्त्साम कु॒ष्ठिका॑भिर्ज॒वं
जङ्घा॑भिरगदं जा॒नु॒भ्यां वी॒र्यं॑ कु॒हाभ्यां॑ भयं प्र॒चाला॑भ्यां
गु॒होप॑पक्षाभ्या-म॒श्विना॑व॒ः सा॒भ्यामदि॑ति॒ः शी॒र्ष्णा निर्ऋ॑तिं
निर्जा॑ल्मकेन शी॒र्ष्णा । 45 (कू॒र्मान् - त्रयो॑वि॑ंशतिः) (A13)

5.7.14.1

योक्त्रं॑ गृ॒द्ध्राभि॑र्यु॒गमा॑नतेन चि॒त्तं म॒न्याभिः॑ संक्रो॒शान् प्रा॒णैः
प्र॒का॒शेन॑ त्वचं॑ पराका॒शेना॑न्तरां म॒शका॑न् केशै॒रिन्द्र॑ꣳ स्वप॒सा
वहे॑न बृ॒हस्प॑तिꣳ शकु॒निसा॑देन रथमु॒ष्णिहा॑भिः । 46

(योक्त्र – मेकविंशतिः) (A14)

5.7.15.1

मि॒त्रावरु॑णौ श्रोणी॑भ्यामिन्द्रा॒ग्नी शि॑खण्डाभ्या-मिन्द्रा॒बृह॑स्पती
ऊ॒रुभ्या॑मिन्द्राविष्णू॑ अ॒ष्टीव॑द्भ्याꣳ सवि॒तारं पु॑च्छेन
गन्ध॑र्वाञ्छेपे॒ना-फ॑सरसो मु॒ष्काभ्यां॑ पव॒मानं॑ पायु॒ना प॑वित्रं
पो॒त्राभ्या॑माक्रमणꣳ स्थू॒राभ्यां॑ प्र॒तिक्र॑मणं कु॒ष्ठाभ्यां॑ । 47

(मित्रावरुणौ – द्वाविंशतिः) (A15)

5.7.16.1

इन्द्र॑स्य क्रो॒डो ऽदि॑त्यै पा॒जस्यं॑ दि॒शां ज॒त्रवो॑ जी॒मूतान्॑
हृद॑यौप॒शाभ्या॑-मन्त॑रि॒क्षं पु॑रि॒तता॑ नभ॑ उद॒र्येणेन्द्रा॑णीं प्ली॒हा व॑ल्मीका॒न्
क्लो॒म्ना गि॒रीन् प्ला॑शिभिः॑ समु॒द्रमु॑दरेण वैश्वान॑रं भस्म॑ना । 48

(इन्द्रस्य - द्वाविंशतिः) (A16)

5.7.17.1

पू॒ष्णो व॒निष्ठु॑रन्धा॒हेः स्थू॑रगु॒दा सर्पा॑न् गु॒दाभि॑र्. ऋ॒तून् पृ॒ष्टीभि॑र्दिवं
पृ॒ष्ठेन॑ वसू॒नां प्र॒थमा॑ की॒कसा॑ रु॒द्राणां॑ द्वि॒तीया॑ ऽऽदि॒त्यानां॑ तृ॒तीया॑
ऽङ्गि॑रसां चतु॒र्थी सा॒ध्यानां॑ पञ्च॒मी वि॒श्वेषां॑ दे॒वानां॑ ष॒ष्ठी । 49

(पूष्ण - श्रुतुर्विंशतिः) (A17)

5.7.18.1

ओ॒जो ग्री॒वाभि॑र्-नि॒र्ऋ॑तिमस्थभि॒रिन्द्र॑ स्वप॒सा वह॑न रु॒द्रस्य॑
वि॒चलः॑ स्कन्धो ऽहो॒रात्रयो॑र्द्वि॒तीयो॑ ऽर्ध॒मासानां॑ तृ॒तीयो॑ मा॒सां चतु॑र्थ
ऋ॒तूनां॑ पञ्च॒मः सँव॑त्सरस्य ष॒ष्ठः । 50

(ओजो - विंशतिः) (A18)

5.7.19.1

आ॒नन्दं॑ न॒न्दथु॑ना का॒मं प्र॒त्यासा॑भ्यां भयं शि॒तीम॑भ्यां प्र॒शिषं॑
प्र॒शासा॑भ्यां सूर्या॒चन्द्र॑मसौ वृ॒क्याभ्या॑ ऽश्यामशब॒लौ मत॑स्नाभ्यां
व्यु॒ष्टिं रूपे॑ण नि॒म्मुक्ति॑मरूपेण । 51 (आ॒नन्दं - षोड॑श) (A19)

5.7.20.1

अ॒ह॒र्मा॒॒से॒न रा॒त्रिं पी॒व॒सा॒ऽपो यू॒षेण॑ घृ॒त॒ र॒से॒न श्यां॑ व॒स॒या
दू॒षी॒काभि॑-ह॒र्हा॒दुनि॑-म॒श्रुभिः॑ पृ॒ष्वां दि॒व॒ रू॒पेण॑ नक्ष॒त्राणि॑ प्र॒ति॒रू॒पेण॑
पृ॒थि॒वीं च॒र्म॒णा छ॒वीं छ॒व्यो पा॒कृ॒ताय॑ स्वा॒हा ऽल॒ब्धाय॑ स्वा॒हा हु॒ताय॑
स्वा॒हा ॥ 52 (अ॒हर - षा॒वि॒॒श॒तिः) (A20)

5.7.21.1

अ॒ग्नेः प॒क्ष॒तिः सर॑स्व॒त्यै नि॒प॒क्ष॒तिः सो॒म॒स्य तृ॒तीया॑ऽपां
च॒तु॒र्थ्यो॒ष॒धीनां॑ पञ्च॒मी सँ॒व॒त्स॒र॒स्य ष॒ष्ठी म॒रु॒ता॒ स॒प्त॒मी
बृ॒ह॒स्प॒ते॒र॒ष्ट॒मी मि॒त्र॒स्य न॒व॒मी व॒रु॒ण॒स्य द॒श॒मीन्द्र॑स्यै॒काद॑शी वि॒श्वे॒षां
दे॒वानां॑ द्वा॒द॒शी द्या॒वापृ॑थि॒व्योः पा॒र्श्वं य॒म॒स्य पा॒टूरः ॥ 53
(अ॒ग्ने - रे॒का॒न्न त्रि॒॒श॒त्) (A21)

5.7.22.1

वा॒योः प॒क्ष॒तिः सर॑स्व॒तो नि॒प॒क्ष॒ति-श्च॒न्द्र॒म॒स-स्तृ॒तीया॑ नक्ष॒त्राणां॑
च॒तु॒र्थी स॒वि॒तुः पञ्च॒मी रु॒द्र॒स्य ष॒ष्ठी सर्पा॑णा॒ स॒प्त॒म्य॒र्य॒म्णोऽष्ट॑मी
त्व॒ष्टुर्न॒व॒मी धा॒तुर्द॒श॒मीन्द्रा॑ण्या ए॒काद॑श्यदि॒त्यै द्वा॒द॒शी द्या॒वापृ॑थि॒व्योः

पार्श्वं॑ य॒म्यै पा॒टूरः॑ । 54 (वा॒यो – र॒ष्टावि॒॑शतिः॑) (A22)

5.7.23.1

प॒न्था॒मनू॒वृग्भ्या॑ꣳ संत॑तिꣳ स्रा॒व॒न्या॑भ्या॒ꣳ शु॒का॒न् पि॒त्तेन॑ ह॒रि॒माणं॑
य॒क्ना ह॒लीक्ष्णान्॑ पा॒पवा॑तेन॒ कू॒श्माञ्छ॑कभिः श॒व॒र्तानू॑व॒ध्येन॑ शु॒नो
वि॒श॒स॒नेन॑ स॒र्पान् लो॑हि॒तग॑न्धेन॒ वया॑ꣳसि प॒क्वग॑न्धेन॒ पिपी॑लिकाः
प्र॒शादे॑न । 55 (प॒न्थां – द्वा॒वि॒॑शतिः॑) (A23)

5.7.24.1

क्र॒मैर॒त्य॒क्र॒मीद्-वा॒जी वि॒श्वैर्दे॒वैर्य॑ज्ञि॒यैः सँ॑वि॒दानः॑ ।
स नो॑ न॒य सु॒कृ॒तस्य॑ लो॒कं तस्य॑ ते व॒यꣳ स्व॒धया॑ म॒देम॑ । 56
(क्र॒मै – र॒ष्टाद॑श) (A24)

5.7.25.1

द्यौ॑स्ते पृ॒ष्ठं पृ॒थि॒वी स॒ध॒स्थ॒मा॒त्मान्तरि॑क्षꣳ स॒मु॒द्रो यो॒निः
सूर्य॑स्ते चक्षु॒र्वा॒तः प्रा॒णश्च॒न्द्र॒माः श्रो॒त्रं मा॒साश्चा॒र्धमा॒साश्च॑
प॒र्वा॒ण्य॒तवो॑ङ्गानि सँ॑व॒त्सरो॑ म॒हि॒मा । 57
(द्यौ – पञ्च॑वि॒शतिः॑) (A25)

5.7.26.1

अ॒ग्निः प॒शु॒रा॒सीत् ते॒ना॒य॒ज॒न्त॒ स ए॒तं लो॒क॒म॒ज॒य॒द्-य॒स्मिन् अ॒ग्निः स
 ते लो॒क॒स्तं जै॒ष्य॒स्य॒था॒व जिघ्र॑ वा॒युः प॒शु॒रा॒सीत् ते॒ना॒य॒ज॒न्त॒ स ए॒तं
 लो॒क॒म॒ज॒य॒द्-य॒स्मिन् वा॒युः स ते लो॒क॒स्तस्मा॑त् त्वा॒ऽन्त॒रे॒ष्या॒मि
 य॒दि ना॒वजिघ्र॑स्यादित्यः प॒शु॒रा॒सीत् ते॒ना॒य॒ज॒न्त॒ स ए॒तं
 लो॒क॒म॒ज॒य॒द् य॒स्मि - () - न्ना॒दि॒त्यः स ते लो॒क॒स्तं जै॒ष्य॒सि
 य॒द्य॒वजिघ्र॑सि । 58 (य॒स्मि - न्न॒ष्टौ च॑) (A26)

Prasna Korvai with starting Padams of 1 to 26 Anuvaakams :-

(यो वा अ॒य॒था॒दे॒वत॑ - न्त्वा॒म॒ग्न - इ॒न्द्र॒स्य - चि॒त्तिं - य॒था वै -
 व॒यो वै - य॒दा॒कू॒ताद् - या॒स्ते अ॒ग्ने - म॒यि गृ॑ह्णामि - प्र॒जा॒प॒तिः
 सो॒ऽस्मा॑त् - स्ते॒गान् - वा॒जं - कू॒र्मान् - यो॒क्त्रं - मि॒त्रा॒व॒रु॒णा
 - वि॒न्द्र॒स्य - पू॒ष्ण - ओ॒ज - आ॒न॒न्द - म॒ह - र॒ग्ने - र्वा॒योः
 - प॒न्थां - क्र॒मै - द्यौ॑स्ते - अ॒ग्निः प॒शु॒रा॒सीत् - षड्वि॑ंशतिः)

Korvai with starting Padams of 1, 11, 21 Series of Panchaatis :-

(यो वा – ए॒वाऽऽहु॑ति – म॒भ॒वन् – प॒थि॑भि – र॒व॒रु॒ध्या – ऽऽन॑न्द
– म॒ष्टौ प॒ञ्च॒शत्)

First and Last Padam of Seventh Prasnam of 5th Kandam :-

(यो वा अ॒य॒थादे॒वतं – य॑द्य॒व॒जिघ्र॑सि)

Kaanda Korvai with starting Padams of 7 Prasnam of Kandam 5:-

(सा॒वि॒त्राणि – वि॒ष्णु॑मु॒खा – उ॒थ्स॑न्न॒यज्ञो – दे॒वा॒सु॒रा – य॒दे॒केन॑
– हि॒र॒ण्य॒वर्णा – यो वा – स॒प्त)

॥ हरिः ओं ॥

॥ कृष्ण यजुर्वेदीय तैत्तिरीय संहितायां पञ्चमकाण्डे सप्तमः प्रश्नः समाप्तः ॥

॥ इति पञ्चमं काण्डं ॥

Details of Anuvakam, Panchati and Padam for Kandam 5

	Anuvakam	Panchati	Padams
Prasna 1	11	59	3081
Prasna 2	12	64	3195
Prasna 3	12	48	2477
Prasna 4	12	58	2906
Prasna 5	24	62	2727
Prasna 6	23	54	2436
Prasna 7	26	58	2582
Total	120	403	19404